

## YOĀM TE TOPA YŌG HĀM'ĀPAK MAX'AX KAX'ĀMI'

*Topa yōg hām'āktux te tikmū'ūn hīnnāhā'*

<sup>1</sup> Hōmā 'ūhittap 'ap xip'ah hām xexka', ha ta' xip Yeyox, tu Yeyox 'āxet'ax nōy hā: Topa yōg Hām'āktux. Kaxīy. Yā tikmū'ūn pu Topa mūg. Topa yōg Hām'āktux te Topa mūti' tihī', tu Topa putuk, yā Topa xe'e'.

<sup>2</sup> Topa te hām xexka mīy, ha Topa mūti' tihī Topa yōg Hām'āktux.

<sup>3</sup> Topa te Yeyox ka'ogāhā', puyīy hāpxop xohix xexka mīy. 'Ok Topa te yāpxehnāg hā' mīy hāpxop? 'Āmhok. 'Ok Topak-tok mūti' mīy hāpxop xohix xexka'? Hamūn, 'ūmīy hāpxop xohix xexka nūmūtik.

<sup>4</sup> Topa yōg Hām'āktux te yōnnā'ī xohix hīnnāhā', ha' hi'ax te kuyānām putuk tikmū'ūn kuxa kopah, tu tikmū'ūn pu hāptupmāhā', puyīy hāmyūmmūg,

<sup>5</sup> ha mō yānām yōn hāpkoxtap kopah, ha hāpkoxtap te kuyānām putex 'ohnāg. Hā kaxīy Yeyox nūn, tu nūktu tikmū'ūn kuxa kopa hāptupmāhā', pa' kummuk xop te Yeyox hupmā yūmmūg 'ohnāg.

<sup>6</sup> Ha ta' xip tihik 'ūxuxet'ax Yoām, ha Topa te' yāykutnāhā', tu' xut tikmū'ūn kopah, tu nū'kutnāhā tikmū'ūn hah.

<sup>7</sup> Ha ta' nūn Yoām, nūy tikmū'ūn pu Topak-tok 'āktux, yā nōm te kuyānām putuk 'āktux, puyīy

tikmũ'ũn xohix hãm'ãktux 'ãpax, nũy tu' kuxa mãm ka'ok.

<sup>8</sup> Yoãm te kuyãnãm putuk'ah, pa' nũn, nũy nãm te kuyãnãm putuk 'ãktux.

<sup>9</sup> Nãm te kuyãnãm xe'e putuk, tu ta' nũn, tu nũktu tikmũ'ũn xohix tu' xupep, yã' nũn Yeyox.

<sup>10</sup> Kuyãnãm, yã Topa yõg Hãm'ãktux, yã Topak-tok, tu' xip nũnte hãm xexka tu'. Hõmã Topa te yãy kutok ka'ogãhã', puyĩy hãm xexka mĩy, pa tikmũ'ũn te Topak-tok yũmmũg 'ohnãg nõmhã'.

<sup>11</sup> Yã' nũn Topa yõg Hãm'ãktux, tu nũktu yãy yõg hãm xexka tu' xupep pa' xape xop tep-tup nõg,

<sup>12</sup> pa tikmũ'ũn yãg te Yeyox putup, tu' kopa' kuxa mãm, ha Topa te nãm xop ka'ogãhã', puyĩy yãyhã xape xop Topa yõg, yã Topak-tok xop.

<sup>13</sup> Yã Topa hã xape xop. 'Ok 'ũtut te' put xi' tak te nõ' tehe', yĩy yãyhã xape xop Topa hã? 'Ãmhok. 'Ok tut tep-tup xi' tak, hu' put? 'Ãmhok. Pa yã Topa mũn hã xape xop. Yã Topa tep-tup, ha yãyhã Topa xape xop.

<sup>14</sup> Ha ta' nũn Topa yõg Hãm'ãktux hãm xexka tu' nũnteh, ha' tut te' put, yã tikmũ'ũn Yeyox, tu tikmũ'ũn mũti' tihĩ'. Yã' max xe'ẽgnãg, yã' max tikmũ'ũn xohix pu', tu hãpxe'e 'ãktux, yã Topa te yãy kutok pit puxet 'ũmax xe'ẽgnãgãhã', yã Topa te' maxnãhã tikmũ'ũn xohix pu', ha hãm yok xohix 'ãktux.

<sup>15</sup> Ha ta' nũn Yoãm, tu nũktu hãm'ãktux ka'ok, hu:

—Hõmã 'ãte xa hãm'ãktux hu: “'Ûg pe' nũn putup tihik. Hamũn xexka', ha tak mũn kutõgnãg, yã 'ũyõg hãm yãxatamuk xohix kux 'ohnãg pa yõgnũ xohix miãx.” Kaxĩy.

16 'Ūkuxa max xe'ēgnāg, hu yūmūg xohix pu hāmmaxnāhā', tu xe hāmmaxnā mōkuma'mōg

17 Hōmā Topa te Mōyyex pu yāy yōg xat'ax popmāhā', puyīy Mōyyex Yoneo xop xat, pa Topa te Yeyox Kunnix pu hāmmaxnāhā', yīy ta Yeyox te tikmū'ūn pu hāmmaxnāhā', tu hāpxe'e 'āktux.

18 Tikmū'ūn te Topa pēnā 'ohnāg, pa Topak-tok puxešnāg te Topa putuk, tu Topa mūti' tihī', ha tikmū'ūn te Topak-tok pēnāhā', hu ta tu' yūmmūg Topah. Yā tute yūmū'ā Topa mūg.

*Yoām te tikmū'ūn putox pix, tu Topa yōg hām'āpak max'ax 'āktux*

19 Ha ta' pip Yoneo xexka xop kōmēn Yenoyanēn tu', tu mō'pok 'āmānex xop xix Nemi yōg xop, puyīy Yoām yīkopit. Ha ta' nūn, tu nūktu' yīkopit, hu:

—'Ū'ūm 'āmūn? Kaxīy.

20 Ha Yoām te hām'āktux xe'e, hu:

—'Ak mūn Kunnix'ah, yā Topa te Kunnix yāyikutnāhā', puyīy tikmū'ūn kuxa kummuk xit. Kaxīy.

21 Ha xe' yīkopit hu: 'Ū'ūm 'āmūn? 'Ok 'Enit? Kaxīy.

Ha Yoām te:

—'Āmhok. Kaxīy.

Ha xe:

—'Ok 'āmūn nō'ōm, tu Topa pupi hām'āktux? 'Ok putpu 'ānūn? Kaxīy.

Ha:

'Āmhok. Kaxīy.

22 Ha:

—'Āpu hām'āktux, 'ū'ūm 'āmūn? 'Ūgmū'āte 'āyūmmūg putup, hu mōg, hu nōm te nūg mūg pok xop pu hām'āktux. Putep 'āktux? Kaxīy.

23 Ha Yoām te:

—Yā yānmūn xupep'ax 'ūgmūn, tu hām'āktux ka'ok hām panip xexka tu', hu: 'Āpu 'āxop putat yoa'. Yūmūg xuxyā nūn. Yā 'ōg hāpxopmā'ax yoa'. Kaxīy.

Yā hām'āktux te' putuk 'Iyait yōg, nōm te Topa pupi hām'āktux.

24 Yā Paniye xop te Yoām yīkopit,

25 hu:

—'A 'āmūn yā Kunnix'ah Topa te nōm yāy kutnāhā', xix 'ap 'Enit'ah, xix 'ap nōy'ah nōm te Topa pupix hām'āktux. Tepte 'āxat xate tikmū'ūn putox pix? Kaxīy.

26 Ha Yoām te:

—'Ātep-tox pix kōnāg hā, pa 'āxop kopa' xip nō'ōm, pa yā 'āxop te' yūmmūg 'ohnāg,

27 hak pe' nūn putup nō'ōm. Hamūn xexka', hakmūn kutōgnāg, hu yōg pataxax ko'ap-tup 'ohnāg. Yāk-tōgnāg 'ūgmūn.

28 Yā nōm hāpxopmāhā xiptuxexka Metān tu' kōnāg kox Yohnām xatapah. Yā Yoām te tikmū'ūn putox pix 'ōnteh.

*Nōm te tikmū'ūn pupi' xok putup kahnēn xok putuk*

29 Hāptup 'īhā' nūn Yeyox Yoām hah, ha Yoām te' pēnāhā', tu:

—'Ūpēnā' nōm te tikmū'ūn pupi' xok putup Topa yōg tihik kahnēn xok putuk. Tute tikmū'ūn xohix kuxa kummuk xit putup.

30 Hōmā 'āte nōm 'āktux, hu: “Tik tek pe' nūn putup, tu' xexkah, ha tak mūn kutōgnāg. Yā 'ūyōg

hāmyāxatamuk xohix kux 'ohnāg, pa yōgnū xohix miāx.” Kaxīy.

<sup>31</sup> Hōmā 'a' yūmmūg'ah nōm tihik, pak nūn, nūy tikmū'ūn putox pix, puyīy tikmū'ūn nōm yūmmūg. Kaxīy.

<sup>32</sup> Tu xe: 'Āte' pēnāhā Topa Koxuk te pexkox tu' yīxohoh, yā kuxxuxtut putuk, tu nūktu tik tu' xupep, tu nōm yīmū' xip ka'ok.

<sup>33</sup> Yā 'āte' yūmmūg'ah tihik, pa Topa te nūgkutnāhā, 'ūyīy tikmū'ūn putox pix. Topa te: “Xate pēnāp-tup Topa Koxuk yīxop-tup, tu nūktu tik yīmū' xip ka'ok putup, ha nōm te tikmū'ūn pu' hōm putup Topa Koxuk.” Kaxīy.

<sup>34</sup> Āte nōm pēnāhā', tu xa' xuktux, tihik yā Topak-tok. Kaxīy.

*Yeyox yōg tik xop te māxap*

<sup>35</sup> Hāptup 'īhā xe' xip Yoām tik tix mūtik, yā Yoām mūtik mōg xop kopa' pip,

<sup>36</sup> ha' nūn Yeyox, tu nōā'yēn, ha Yoām te Yeyox pēnāhā', tu hām'āktux, hu:

—Nōm te tikmū'ūn pupi' xok putup, kahnēn xok putuk, yā' yīy 'ohnāg, yā Topak-tok. Kaxīy.

<sup>37</sup> Ha tik tix te' xupak, tu ta' mōg Yeyox hah, nūy Yeyox pe' mōg, tu' mōg,

<sup>38</sup> Ha Yeyox yōkānām, tu tik tix pēnāhā', tu:

—Tep mūn xak? Kaxīy.

Ha:

—Notot, pi'yā 'āpet yūm?

<sup>39</sup> Ha Yeyox te:

—Mā, nūy pēnā'. Kaxīy.

Ta' mōg Yeyox xix tik tix, tu' pet pēnāhā' māyōn he 'īhā' tihi', 'īhā mōktu yā 'āmāxak.

40 Yā tik tix, ha yāp-xet 'āxet'ax 'Ānene', yā Xīmām Pet taknōy. Yā hōmā tute Yoām yōg hām'āktux 'āpak, hu Yeyox pe' mōg.

41 Tu ta' mōg 'Ānene', nūy yāy taknōy xax, tu' xipihi', tu:

—'Ūgmū'āte Kunnix xipihi', yā Topa te nōm yāyikutnāhā'. Kaxīy.

42 Tu ta' nūn 'Ānene', tu' taknōy Xīmām nūn nā nā' nūn, tu nūktu Yeyox tu' mōxaha', ha Yeyox te Xīmām pēnāhā', tu:

—'Āmūn yā Xīmām, yā Yoām kutok. 'Āte xa 'āxet'ax nōy hōm, yā Xep. Kaxīy.

Yā Xep, yā 'āxet'ax nōy hā: Pet, yā tikmū'ūn yīy'ax hā: mīkaxxap. Kaxīy.

*Yeyox te' xānāhā Pinip xix Nātānāyet*

43 Hāptup 'īhā Yeyox mōg putup hāpxexka Ganninet tu', tu Pinip xak, tu' xipihi', tu:

—Mā, 'ūg pe mōg! Kaxīy.

44 Yā Pinip yōg kōmēn Betxax. Yā 'Ānene yōg kōmēn kamah, xix Pet yōg kamah.

45 Ha ta' mōg Pinip, tu Nātānāyet xak, tu mōktu' xipihi', tu:

—'Ūgmū'āte' xipihi nō'ōm. Hōmā 'ūhittap Mōyyex te nōm kax'āmi Topa yōg xat'ax yōg tappet tu', xix Topa pupix hām'āktux xop te nōm kax'āmi kamah. Yā Yeyox, yā Yoye kutok, yā kōmēn Nāyane yōg tihik. Kaxīy.

46 Ha Nātānāyet te:

—'Ok 'ūm max tikmū'ūn 'ōnte Nāyane kopah? 'Āmhok. Kaxīy.

Ha Pinip te:

—Pu yūmū mōy, pēnā'. Kaxīy.

<sup>47</sup> Tu ta' mōg, pa' xip Yeyox, tu' nōy nūn pēnāhā', tu:

—Pēnā' 'Iyaet xop yōg tik xe'e, yā tik te' koit 'ohnāg. Tik te hāpxopmā yok. Kaxīy.

<sup>48</sup> Ha Nātānāyet te:

—Teptu xatek yūmmūg? Texīy? Kaxīy.

Ha Yeyox te:

—'Āte 'āpēnāhā', yā 'āxip piget kup kakak, ha Pinip te 'āxānāhā'

<sup>49</sup> Ha Nātānāyet te:

—Notot, 'āmūn Topak-tok. Xate 'Īyaet xop xat.

<sup>50</sup> Ha Yeyox te:

—'Āte xa' xuktux 'āte 'āpēnāhā piget kup kakak, yīy 'ākuxa yūm 'ūgkopah. 'Ok kaxīy 'ākuxa yūm? Yā' max nūhū', pa xate xe' pēnāp-tup hāpxopmā max xohix xe'ēgnāg.

<sup>51</sup> 'Āte xa hām'āktux xe'e xate pexkox xōn pēnāp-tup, ha ta pexkox yōg nū'pok xop pepi' mōg putup, tu putpu' yīxop-tup, tu nūktuk mūn xuka' xup putup, yā Tikmū'ūn Kutok xuka' xup putup.

## 2

### *Yeyox te yāyta pēnāhā'*

<sup>1</sup> 'Āmnīy tix nōg, 'Ihā tikmū'ūn yāyap-tup kōmēn Kānā tu' hāpxexka Ganinet kopah, tu 'āmuk xexka mīy, ha Yeyox mūktut xip.

<sup>2</sup> Ha tikmū'ūn te' xānāhā Yeyox xix yōg tik te 12 xop, pu tu xit. Yīy ta' mōg, tu mōktu' mōxaha'.

<sup>3</sup> Ha tikmū'ūn xohix te xupyāg xo'op, ha mōktu' kox, ha ta' xip Yeyox mūktut, tu Yeyox pu hām'āktux, hu:

—'Ūkox xupyāg. 'Ūnōg. Kaxīy.

<sup>4</sup> Ha Yeyox te:

—Māy, hōnhā 'ūkxat hok, 'üyīy hāpxopmā xate nōm putup. 'A hōnhā'ah. Pa hāpxip, 'ihā Topa tek xat putup. Kaxīy.

<sup>5</sup> Ha' tut te kāmānat pu:

—'Āpu hāpxopmā tute 'āxop xat. Kaxīy.

<sup>6</sup> Ha ta' pip naxtox xexkanām mīkaxxap hā nō'ōm 'ūxohix te' 6, ha Yoneo xop te nōm hā yāy pix, xix nax pix, xix kânēy pix, nūy yāy yōg xat'ax mīy. Yā' xexkanām naxtox. Naxtox puxet te' tat nit xohix te' 80, xi' nōy 100.

<sup>7</sup> Ha Yeyox te kāmānat xop pu hām'āktux, hu:

—'Āpu kōnāg pux, pu naxtox hā nū'xih. Kaxīy.

Ha' pux ha nū'xīmnāg.

<sup>8</sup> Ha Yeyox te:

—'Āpu' hep kutōgnāg xut, nūy pax mōg, nūy 'āmuk xexka yōg xat'ax pu' hōm. Kaxīy.

Ha' xut, tu' pax mōg,

<sup>9</sup> ha xat'ax te' hep xo'op, pa 'ap kōnāg'ah, yā yāyhā xupyāg. Hām 'ūm tu' nūn 'ūhep? Yā' yūmmūg 'ohnāg, pa kāmānat te' yūmmūg nōm te' hep xut, ha 'āmuk xexka yōg xat'ax te tik te yāyta xānāhā',

<sup>10</sup> tu:

—Tikmū'ūn xohix te' popmāhā xupyāg max hāmāxap, ha tikmū'ūn te nōm xo'op, tu mōktu hix ka'ok, hak-nāy tu' popmāhā xupyāg kummuk, pa nōmhā' pip xupyāg max 'ohnū'. Kaxīy.

<sup>11</sup> Yā hā kaxīy Yeyox te hāpxopmā ka'ok xe'ēgnāg hāmāxap, yā kōmēn Kānā tu' mīy hāpxexka Ganinet tu' Yeyox max xe'ēgnāg, ha Yeyox yōg tik xop kuxa mām Yeyox kopah.



<sup>12</sup> Hāpxip 'lhā' mōg Yeyox, xi' tut, xi' taknōy xop, xix Yeyox yōg tik xop, tu' nox tihi kōmēn Kapānām tu'.

*Yeyox mōg Topa pet xexka tu'*

<sup>13</sup> Hāpxip 'lhā Yoneo xop te' mīy putup 'āmuk xexka 'ūxuxet'ax Nōā'yēn. Ha ta' mōg Yeyox kōmēn Yenoyanēn tu', tu' mōg, tu mōktu' xupep.

<sup>14</sup> Tu ta' mōg Topa pet xexka tu', pa' kopa' pip tikmū'ūn, tu nōmenex mūnūytut pīt, xix kahnēn, xix kuxxuxtut, tu tayūmak hā' nōy yānān, ha mīmpe xit'ax 'lhā' mām,

<sup>15</sup> ha Yeyox te xikot mīy poxit hā, tu hāptopa papuk kahnēn xix mūnūytut pīt, tu tayūmak nū'xok, yā tayūmak hā' nōy yānān xop yōg, tu' yōg mīmpe xit'ax nū'xok kamah.

<sup>16</sup> Tikmū'ūn te kuxxuxtut nōnenex, ha Yeyox te nōm pu:

—'Āpu kuxxuxtut mōgā nūpeheh. 'Ūmīy hok nāpet nūnte 'ātak pet kopah. Kaxīy.

<sup>17</sup> Ha Yeyox mūtik mōg xop te' xutigāhā', yā Topa yōg tappet tu' kax'āmi hu: “Yā kuxap putuk 'ūgkuxa kopah, yā 'āte Topa pet putuppax, tu Topa pet hā yīpkumīy.” Kaxīy.

<sup>18</sup> Ha Yoneo xexka xop te:

—'Āpu hāpxopmā ka'ok xe'ēgnāg, 'ūyīy yūmmūg Topa te nū'ākutnāhā', xayīy xohix papuk Topa pet kūnāpah. Kaxīy.

<sup>19</sup> Ha Yeyox te:

—'Āxop te nū' pet putxok, kopxix xe' mīy'ax 'āmnīy tikoyuk hā. Kaxīy.

<sup>20</sup> Ha:

—'Ok xate' mīy'ax 'āmnīy tikoyuk hā? Tikmū'ūn te Topa pet xexka mīy hāmyāxatamuk xohix te' 46 hā. Kaxīy.

<sup>21</sup> Pa 'āmhok, Yeyox te yāy yīn 'āktux, yā Topa xip Yeyox kopah, Topa pet putuk.

<sup>22</sup> Hāpxip ha ta Yeyox putpu' hi', 'ihā Yeyox yōg tik xop te' xutigāhā Yeyox yōg hām'āktux, hu' kuxa mām ka'ok Topa yōg hām'āktux kopa xix Yeyox yōg hām'āktux kopah.

### *Yeyox te tikmū'ūn xohix yūmmūg*

<sup>23</sup> 'Ūxip Yeyox kōmēn Yenoyanēn tu', 'ihā tikmū'ūn te' mīy 'āmuk xexka 'āxet'ax Nōā'yēn, ha Yeyox te hāpxopmā ka'ok xe'ēgnāg punethok. Yā tikmū'ūn te' mīy yūmmūg 'ohnāg. Tikmū'ūn te' pēnāhā', hu' xohix kuxa mām ka'ok Yeyox kopah.

<sup>24</sup> Pa Yeyox kuxa yūm 'ohnāg tikmū'ūn kopah xix yōg hāmyūmmūg kopah, tute tikmū'ūn xohix yūmmūg tu'.

<sup>25</sup> 'Ok Yeyox pu tikmū'ūn yūmmūgāhā'? 'Āmhok. Yā tute tikmū'ūn xohix kuxa yūmmūg.

## 3

### *Yeyox xix Nīkonēm*

<sup>1</sup> 'Ūxip tihik 'ūxuxet'ax Nīkonēm, yā Yoneo xop yōg xat'ax xop yōg tihik, yā Paniye xop kopa' xip.

<sup>2</sup> 'Āmnīy 'ihā' nūn Yeyox hah, nūy hām'āktux, hu:  
—'Ūgmū'āte' yūmmūg Topa te nū'ākutnāhā'. Yā xate hāpxopmā ka'ok xe'ēgnāg. Paxpu Topa 'āyōkāmū mōg hok, ha ta hāpxopmā ka'ok xe'ēgnāg 'ohnāg. Kaxīy.

<sup>3</sup> Ha Yeyox te:

—Āte xa hām'āktux hāpxop xe'e. Tep-te Topa pēnāp-tup xix yāy yōg tikmū'ūn, ĩhā Topa te yāy yōg tikmū'ūn xat putup, ha' yīpkox pip? Yā nōm nāhā 'ūxeheh. 'Ap nōy te' pēnāp-tup'ah. Kaxīy.

<sup>4</sup> Ha Nīkonēm te:

—Tep texīy tik xiptap 'ūm nāhā 'ūxeheh? 'Ok 'ūtut hā mō'nāhā 'ūxeheh, ha xe' put? Kaxīy.

<sup>5</sup> Ha Yeyox te:

—Āte xa hāpxe'e 'āktux. Yūmūg xakux. Yūmūg tut te yūmūg pop, ha ta Topa Koxuk te yūmūg mīy Topa yōg tikmū'ūn. Hā kaxīy yūmūg xakux 'ūxeheh, yā yūmūg xakux tix. Yūmūg xe xakux 'ohnāg, koxix yūmūg mōxakux 'ohnāg Topa yōg tikmū'ūn xop kopah.

<sup>6</sup> 'Ūn tek-tok pop, ha' hi 'ūk-tok. Ha ta Topa Koxuk te' hīnnāhā Topa yōg tikmū'ūn.

<sup>7</sup> Āte xa hām'āktux, hu: “Āpu nāhāy 'ūxeheh. Hām'āktux hok hu: Xok 'ūm?” Kaxīy.

<sup>8</sup> Āmuuh mōg hām 'ūm tup-tup, ha xate 'āmuuh 'āpak. Pi'a' nū'? Xate' yūmmūg'ah. Pi'a' mōg? Xate' yūmmūg'ah. Yā xate' pēnā 'ohnāg. Hā kaxīy xate' yūmmūg 'ohnāg, Topa Koxuk te' mīy Topa yōg tikmū'ūn, tu' hīnnāhā nōm xakux 'ūxeheh.

<sup>9</sup> Ha Nīkonēm te:

—Texīy? Kaxīy.

<sup>10</sup> Ha Yeyox te:

—Xate 'Iyaet yōg tikmū'ūn pu hāmyūmmūgāhā', pa' yūmmūg 'ohnāg Topa Koxuk te' mīy Topa yōg tikmū'ūn.

<sup>11</sup> Hamūn, 'āte xa hām'āktux xe'e'. 'Ūgmū'āte hāmyūmmūg, hu nōm 'āktux, tu hāmpēnāhā, hu nōm 'āktux, pa 'āxop te yōgnū hām'āktux 'āpak 'ohnāg.

12 'Āte xa hām xexka yōg xop yōg hāpxopmā'ax 'āktux, pa 'ākuxa yūm 'ohnāg. 'Āte xa pekkox yōg xop yōg hāpxopmā'ax 'āktux. Texīy 'ākuxa yūm putup? 'Ap yūm putup'ah.

13 Tikmū'ūn te pekkox tu' mōg 'ohnāg, tu yīxo 'ohnāg hām xexka tu', tu pekkox yōg xop yōg hāpxopmā'ax 'āktux 'ohnāg. 'Ūkpuxet yā Tikmū'ūn Kutok te nōm 'āktux, pekkox tuk yīxohoh tu'.

14—Hōmā 'ūhittap Mōyyex te kāyā komut mīy hām panip xexka tu', tu mīm yīpaka' xup. Hā kaxīy tikmū'ūn tek mūn yīpaka xup putup, yā Tikmū'ūn Kutok yīpaka xup putup,

15 puyīy xohix 'ūm 'ūkuxa mām 'ūgkopah, tu' hi xe'ēgnāg mōkuma' mōg, ha' kux 'ohnāg.

16 Yā Topa te mō'yāyxe'ēgnāg hām xexka yōg xohix xop, hu yāy kutok pit puxehnāg nū'kutnāhā' hām xexka tu', puyīy xohix 'ūm 'ūkuxa mām ka'ok Topak-tok kopah, hu' xakix ka'ok putup'ah, pa' hi xe'ēgnāg mōkuma' mōg putup, ha' kux 'ohnāg.

17 Topa te yāy kutok nū'kutnāhā hām xexka tu', nūy nōm hā hām xexka yōg xohix xop kuxa kummuk xit, nūy kuxa maxnā', nūy nōm yōg hāpkummuk mīy'ax hā yānān hok.

18 —Topa te' kuxa mām xop yōg hāpkummuk mīy'ax hā yānān 'ohnāg, pa' yānān 'ūkuxa mām 'ohnāg xop yōg hāpkummuk mīy'ax hā, yā' kuxa mām 'ohnāg Topak-tok puxet kopa hah.

19 Teptu Topa te hāpkummuk mīy'ax hā yānān? Yā Yeyox nūn, yā kūyānām nūn putuk, tu nūktu' xupep nūnte hām xexka tu', pa tikmū'ūn tep-tup hāpkoxtap, 'ap putup'ah kūyānām, yā Yeyox putup'ah, hāpkummuk mīy tu'.

20 Yā hāpkummuk mīy'ax xop tep-tup nōg kūyānām, tu' mōg 'ohnāg kūyānām hah, nūy hāpkummuk mīy'ax pēnā hok.

21 Pa hāmyoa'ax xop mōg Yeyox hah, yā kuyānām putuk hah, puyīy xohix pēnā', yā Topa 'āpak, hu hāmyok mīy. Kaxīy.

*Yeyox xix Yoām, yā nōm tep-tox pix*

22 Tu ta' mōg Yeyox xix yāy yōg tik xop, tu mōktu hāpxexka Yonex tu' mōxaha', tu' nox tihi', tu tikmū'ūn putox pix.

23 Ha ta' xip Yoām, yā 'Ēnōm tu' xip, yā Xanīn yīkak, tu tikmū'ūn putox pix, kōnāg punethok hah, ha ta' nūn 'ūxohix, hap-tox pix.

24 Yā xonat te Yoām mō'tat putup kanet ka'ok hā, pa hōnhā' xip'ah kanet kopah.

25 Ha ta' pip Yoām mūtik mōg yāg xop, tu yāy mǎnōg kōnāmāhā Yoneo puxet mūtik. Yā Yoneo xop yōg 'āmuk xexka tu yāy mǎnōg, yā 'āmuk xexka 'āxet'ax Yāy Pix. Kaxīy.

26 Ta' nūn Yoām mūtik mōg xop Yoām hah, tu:

—Yāyā, hōmā' xip tihik 'āmūtik kōnāg kox xat-apa', yā hōmā xate nōm 'āktux. Hōnhā tik tep-tox pix, ha tikmū'ūn xohix te ha nū' yāy xix. Kaxīy.

27 Ha Yoām te:

—Pexkox yōg Topa te tikmū'ūn xexka mīy, ha tikmū'ūn xohix te nōm pe' mōg, pa' xexka mīy hok, puxix tikmū'ūn nōm pe' mōg 'ohnāg.

28 Hōmā 'āte xa yāy 'āktux, hu: "'Ūgmūn 'ap Kun-nix'ah, yā 'āte tikmū'ūn kuxa kummuk xit 'ohnāg, pa Topa te nūgkutnāhā, 'ū mōg hāmāxap, hak-nāy tu nōm nūn.'" Kaxīy. Ha xate' xupak, tu' yūmmūg.

29 Yā hā kaxīy putuk: Tikmū'ūn te yāytap-tup, ha 'ūn te yāytaha yā tik te yāytaha yōg. Ha ta' xip tik te yāytaha xape', tu hām'āktux 'ohnāg, pa hām'āpak, tu tik te yāytaha yōg hām'āktux 'āpak, hu' kuxa hittup xexka', tu' yāykūmīy 'ohnāg. Yāg mūn putuk. 'Āte tik te yāytaha xape putuk, tuk kuxa hittup xexka nōmhā, yā tikmū'ūn xohix te Yeyox pe' mōg.

30 Yā' max, nōm xexka nōy nā' mōg, pu tikmū'ūn xohix nōm pēnā', ha ta' max, 'ūgmūn kutōgnāg nōy nāg mōg, pu tikmū'ūn 'ūgmūn pēnāk-tōgnāg.

### *Nōm te pexkox tu' yīxohoh*

31 Hōmā nōm xip pepi', tu' yīxohoh. Hamūn 'ūxexkanām, ha ta' xohix nōy 'ap xexka'ah. Hām xexka yōg tikmū'ūn yā hām xexka yōg xop xe'e', tu hām xexka yōg tikmū'ūn yōg hāpxop 'āktux. Ha ta nōm te pexkox tu' yīxohoh yā' xexkanām.

32 Tute hāpxop pēnāhā pexkox tu', tu' pēnā'ax 'āktux, tu' xupak'ax 'āktux, pa tikmū'ūn te yōg hām'āktux kopa' kuxa mām 'ohnāg.

33 Pa tikmū'ūn 'ūm te 'ūyōg hām'āktux kopa' kuxa mām, puxix hām'āktux hu: "Topa 'ūmax xe'e.'" Kaxīy.

34 Topa te yāy kutok nū'kutnāhā', ha tute Topa yōg hām'āktux 'āktux, ha Topa te nōm pu' hōm Topa Koxuk, ha nōm hā nū'xīmnāg Topa Koxuk hā, tu Topa Koxuk 'āpaknām.

35 Yā' tak Topa te yāy kutok mō'yāy xe'ēgnāg, tu' nōy pu hāpxop xohix popmāhā', puyīy 'ūxohix xop xat.

36 Tikmū'ūn 'ūm kuxa yūm Topak-tok kopah, tu' hi xe'ēgnāg mōkuma'mōg, ha' kux 'ohnāg. Ha ta' nōy 'ūm te Topak-tok pit 'āpak 'ohnāg, tu 'a' hi

xe'ēgnāg mōkuma'mōg putup'ah, pa Topa te nōm tu' gāy mōkunā'mōg, ha' kux 'ohnāg.

## 4

### *Yeyox xix hāpxexka Xāmānit yōg 'ūhūn*

<sup>1</sup> Ta tikmū'ūn xohix te hām'āktux, ha Paniye xop te' xupak. Yā hām'āktux Yeyox mūtik hāpkumep xop xohix nōy nā' mōg xexka', ha ta Yoām mūtik hāpkumep xop xohix tapax 'ohnāg. Tikmū'ūn te kama' hām'āktux, Yeyox te tikmū'ūn xohip-tox pix, ha ta Yoām te tikmū'ūn tīgnāg putox pix.

<sup>2</sup> Pa 'āmhok. Yeyox te 'ap-tox pix'ah, pa Yeyox yōg tik xop tep-tox pix.

<sup>3</sup> Ha Yeyox te nōm 'āpak, tu ta' mōg hāpxexka Yonex kūnāpah, tu putpu' mōg hāpxexka Ganinet tu'.

<sup>4</sup> Pa' xip hāpxexka Xāmānit, ha nōm hā yāyikutut, yā Topa tep-tup.

<sup>5</sup> Tu ta' nūn, tu nūktu kōmēn Xik tu' xupep hāpxexka Xāmānit kopah, yā Yako yōg hām yīkah. Yā hōmā Yako te yāy kutok Yoye pu hām hōm.

<sup>6</sup> Yā' xip Yako yōg kōnāg xupup kox, ha ta' tuknōg Yeyox, hu kōnāg xupup kox kux tu' yūm, 'ihā māyōn te yāy kote' yūm.

<sup>7</sup> Ha ta' nūn 'ūhūn hāpxexka Xāmānit yōg, nūy kōnāg tat xut. Ha Yeyox te:

—'Ā kōnāg 'ūm tat, 'ū xo'op. Kaxīy.

<sup>8</sup> Yā Yeyox yōg tik xop 'ap xip'ah. 'Ūmōg kōmēn tu', nūy yāy xit'ax pop.

<sup>9</sup> Ha 'ūn te:

—'Āmūn yā Yoneo xop kopa 'āxip, pak mūn yā Xāmānit xop kopak xip. Teptu 'ātu 'ākax, hu: “'Ā kōnāg 'ūm tat”? Kaxīy.

Yā Xāmānit xop te hāpxopmā 'ohnāg Yoneo xop mūtik.

<sup>10</sup> Ha Yeyox te:

—'Ok xate' yūmmūg Topa te tikmū'ūn pu nōm hok hōm, tu nū' nōm kutnāhā'? 'Ok xate' yūmmūg 'ūgmūn 'ū'ūm? Xate' yūmmūg, nūy ta 'ātu 'ākax, yīy 'āte xa' hōm kōnā'āg, nōm te tikmū'ūn hīnnā xe'ēgnāg. Kaxīy.

<sup>11</sup> Ha 'ūn te:

—Notot, naxtox 'ūm yūm hok, ha kōnāg xupup kox tox. Tep hā' xut xate kōnā'āg, nōm te tikmū'ūn hīnnā xe'ēgnāg?

<sup>12</sup> Yūmū yōg mōnāyxop Yako te yūmū'ā hōm nūhū' kōnāg xupup kox. Yako te' xo'op nūhū' kōnā'āg, xik-tok te', xix yōg xokxop tut xop te'. 'Ok 'āmūn xexka', ha ta Yakok-tōgnāg? Kaxīy.

<sup>13</sup> Ha Yeyox te:

Tikmū'ūn te' xo'op kōnā'āg nūhū', pa hāpxip 'īhā kōnāg tup-tup xūy 'ūxeheh.

<sup>14</sup> Pa 'āte tikmū'ūn pu kōnāg nōy hōm, ha tikmū'ūn te nōm xo'op, tu xe kōnāg putup xūy pip putup'ah. 'Āte tikmū'ūn pu' hōm nō'ōm kōnā'āg, ha nōm te nāgyīkox putuk tikmū'ūn kuxa kopah, tu tikmū'ūn hīnnā xe'ēgnāg mōkuma'mōg, ha' kux 'ohnāg. Kaxīy.

<sup>15</sup> Ha 'ūn te:

—'Ā' hōm nō'ōm kōnā'āg, ha xe kōnāg putup xūy 'ūm pip putup'ah, ha 'āte putpuk nūn putup'ah nūnteh, nūy kōnāg tat xut. Kaxīy.

<sup>16</sup> Ha Yeyox te:



—Mōg, nūy 'āyīpxox xānā', pu nū'. Kaxīy.

<sup>17</sup> Ha 'ūn te:

—'Ap xip'ah 'ūgyīpxox. Kaxīy.

Ha Yeyox te:

<sup>18</sup> —Hamūn, xate hām'āktux xe'e', 'a' xip'ah 'āyīpxox. Pa hōmā xate 'āyīpxox mūtik yāytaha', tu' nīm, nūy nōy mūtik yāyta', tu mōktu 'āyīpxox xohix te' 5 te kaxīy, ha ta hōnhā 'ātihi tik mūtik, pa yā 'a' īpxox'ah. Xate hām'āktux xe'e', 'ap koit'ah. Kaxīy.

<sup>19</sup> Ha 'ūn te:

—'Āte' yūmmūg nōmhā, xate Topa pupi hām'āktux, yā 'ūgyūmmūg xexkah.

<sup>20</sup> 'Ūgmū yōg mōnāyxop te Topa pu nūktettex yīktix tu' nūhū', pa 'āxop te' xuktux, 'ūmax, pu Topa pu nūktettex kōmēn Yenoyanēn tu'. Kaxīy.

<sup>21</sup> Ha Yeyox te:

—Nixxix, 'ūxupax. Hāpxip puxix tikmū'ūn te Topa pu nūktettex putup, pa yīktix tu nūktettex hok, xix Yenoyanēn tu' nūktettex hok.

<sup>22</sup> 'Āxop te Topa pu nūktettex, pa nōm yūmmūg 'ohnāg. 'Ūgmū'āte Topa pu nūktettex, tu nōm yūmmūg. 'Ūgmūg xop yā Yoneo xop, ha ta' xip tik puxet Yoneo xop kopah, tu nōm te tikmū'ūn kuxa kummuk xit, tu' kuxa maxnāhā'.

<sup>23</sup> Pa hāpxip 'īhā, yā hōnhā 'īhā tikmū'ūn te Topa pu nūktettex putup, tu Topa 'āktux max xe'ep-tup yāy kuxa kopah, tu Topa yōg hāmyūmmūg xe'e yūmmūg putup. Topa tep-tup, puyīy tikmū'ūn Topa pu nūktettex hā kaxīy.

<sup>24</sup> Topa yā' koxuk, 'ap yīn xip'ah. Yā' max, pu tikmū'ūn Topa pu nūktettex yāy kuxa hā, tu Topa yōg hāmyūmmūg xe'e yūmmūg. Kaxīy.

25 Ha 'ũn te:

—'Ũnũn putup nõ'õm. Topa te nõm nõ'kutnãp-tup, yã' xuxet'ax Kunnix, yã Topa te nõm yãy'kutnãhã'. 'Ăte' yũmmũg 'ũnũn putup, tu yũmũ'ã hãpxop xohix xexka yũmmũgãp-tup. Kaxĩy.

26 Ha Yeyox te:

—Yã hamũn, yãg mũn, nõm te 'ãmũtik hãm'ãktux. Kaxĩy.

27 Ha ta' nũn Yeyox yõg tik xop, tu nũktu' pẽnãhã' Yeyox te hãm'ãktux 'ũn mũtik, tu' yëy, tu 'ũn pu' yĩkopit 'ohnãg, hu: “Putep putup?” Kaxĩy. Tu Yeyox pu' yĩkopit 'ohnãg, hu: “Tep mũn 'ãktux?” Kaxĩy.

28 Ha 'ũn te yãy yõg naxtox nĩm, tu ta' mõg kõmẽn tu', tu tikmũ'ũn pu hãm'ãktux, hu:

29 —Mã, nũy pẽnã tihik, tute' xuktux 'ãte hãpxopmã xohix xexka'. 'Ok nõ'õm yã Kunnix, yã Topa te nõm yãy'kutnãhã'? Kaxĩy.

30 Ha ta' mõg tikmũ'ũn, nũy Yeyox pẽnã'.

31 Ha ta' pip Yeyox yõg tik xop, tu Yeyox mũtik hãm'ãktux, hu:

—Yãyã, 'ãpu 'ãxit'ax mã'. Kaxĩy.

32 Ha:

—'Ũxip xit'ax yõgnũ' xate' yũmmũg'ah. Kaxĩy.

33 Ha Yeyox yõg tik xop te yãy mũtik hãm'ãktux, hu:

—'Ok tikmũ'ũn te tu' hõm 'ũxit'ax? Kaxĩy.

34 Ha Yeyox te:

—Pute 'ũm 'ũgxit'ax? Yã 'ãte hãpxopmã Topa te nõm putup. Yã 'ũgxit'ax putuk. Topa te nũg'kutnãhã', hak hãm kuxyãp-tup. Yã 'ãte Topa puk hãm, yã' xit'ax putuk. Yã 'ãxop tep-tuppax 'ãxit'ax, ha 'ãtep-tuppax 'ũghãm Topa te nõm putup.

<sup>35</sup> Xate hām'āktux, hu: “Māyōnhex 'ānuk xohix te' 4 nōg putup, 'ihā' ta' mīnta'.” Kaxīy. Pa 'āte xa hām'āktux, hāmpēnā'! Hōnhā 'ūta'. 'Ūnūnnā', pu' max hōnhā'. Pēnā tikmū'ūn nūn hōnhā, nūy kuxa mām 'ūgkopah, yā mīnta ta nūnnā putuk hōnhā.

<sup>36</sup> Tikmū'ūn te mīnta ta nūnnāhā', ha xuxyā te tu' pago. Hā kaxīy nōm te 'ātu tikmū'ūn nūnnāhā', puyīy hi xe'ēgnāg mōkuma'mōg, ha' kux 'ohnāg, yīy ta' kuxa hittup nōm te hāpxop xap xok xix nōm te mīnta ta nūnnāhā', yā' hittup 'ūtix. Hā kaxīy tik te tikmū'ūn puk mūn yūmmūgāhā', ha ta' nōy te tikmū'ūn māmāhā 'ūgkopah, yā' kuxa hittup 'ūtix.

<sup>37</sup> Yā hām'āktux xe'e': “Tik te hāpxop xap xok, ha ta' nōy te mīnta ta nūnnāhā'”. Kaxīy. Hā kaxīy tik te tikmū'ūn puk mūn yūmmūgāhā', ha ta' nōy te tikmū'ūn kuxa māmāhā 'ūgkopah.

<sup>38</sup> 'Āte mō 'āxop pok, xa mīnta ta nūnnā'. Xate hāmxa 'ohnāg. 'Ūnoy te hām xaha', ha xate mīnta nūnnāhā'. Yā xate tikmū'ūn kuxa māmāhā 'ūgkopah. Kaxīy.

<sup>39</sup> Ha ta' kuxa mām ka'ok Yeyox kopa kōmēn Xāmānit yōg tikmū'ūn xohix. Yā 'ūn te hām'āktux, hu: “Mā, nūy pēnā tihik, tute hām'āktux 'āte hāpxopmā xohix xexka'”. Kaxīy.

<sup>40</sup> Ta' nūn kōmēn Xāmānit yōg tikmū'ūn, tu nūktu Yeyox tu' kax, pu nox xip. Ha' nox tihī' nūmūtik 'āmnīy tix hā.

<sup>41</sup> Ha xe xape xohix te Yeyox yōg hām'āktux 'āpak, hu' kuxa mām ka'ok Yeyox kopah,

<sup>42</sup> tu 'ūn pu hām'āktux, hu:

—Hōmā 'ūgmū'āte 'ōg hām'āktux 'āpak, pa hōnhā Yeyox yōg hām'āktux 'āpak, hu' yūmmūg Yeyox te

hām xexka yōg tikmũ'ũn kuxa kummuk xit, nũy kuxa max mō'tat, 'ũyānān tu'. Kaxĩy.

*Yeyox te tik xexkak-tok hittupmāhã'*

<sup>43</sup> 'Āmnĩy tix nōg, ha ta' mōg Yeyox hāpxexka Ganinet tu'.

<sup>44</sup> Yā, hōmā Yeyox te' xuktux hu: “'Ūxape xop te Topa pupi hām'āktux xop 'āpak 'ohnāg yāy yōg hām tu', pa hām nōy yōg tikmũ'ũn te nōm 'āpak. Kaxĩy.

<sup>45</sup> Ta' nũn Yeyox, tu nũktu' xupep hāpxexka Ganinet tu', ha Ganinet yōg tikmũ'ũn tep-tup Yeyox. Yā hōmā Ganinet yōg tikmũ'ũn te' pēnāhã Yeyox te hāpxopmā ka'ok xe'ēgnāg punethok kōmēn Yenoy-anēn tu', 'thā' xip 'āmuk xexka 'āxet'ax Nōā'yēn.

<sup>46</sup> Ha ta' mōg Yeyox, tu mōktu' xupep kōmēn Kānā tu' hāpxexka Ganinet kopah. Yā hōmā Yeyox te kōnāg hā xupyāg mĩy Kānā tu', yā yāyhā xupyāg.

Ha ta' xip Kānā tu kōmēn Kapānām yōg tik xexka' hak-tok pakut.

<sup>47</sup> Tik te Yeyox nũn 'āpak, tu ta' mōg, tu mōktu Yeyox tu' kax, pu nũ', nũyk-tok pit hittupmā', yā 'ūxok putũmnāg.

<sup>48</sup> Ha Yeyox te:

—'Āte hāpxopmā ka'ok xe'ēgnāg 'ohnāg, ha ta 'ākuxa yũm 'ohnāg. Kaxĩy.

<sup>49</sup> Ha tik te:

—Yāyā, mā hōnhā mō'ka'ok. 'Ūxok putũmnāg 'ūgkutok! Kaxĩy.

<sup>50</sup> Ha Yeyox te:

—Mōg, 'āk-tok hip-tup. Kaxĩy.

Ha tik kuxa yũm Yeyox yōg hām'āktux kopah, tu ta' mōg,

51 pa yōg kāmānat xip putat kopah, tu hām'āktux, hu:

—'Ūhi 'āk-tok. Kaxīy.

52 Ha tik te:

—Pi'yā' yūm māyōn, 'ihā' hittup kōnāmāhā'? Kaxīy.

Ha:

—Yā māyōn te yāy kote' yūm, 'ihā xuxi'. Kaxīy.

53 Ha tik te' yūmmūg yā māyōn te yāy kote' yūm 'ihā Yeyox te: “Āk-tok hip-tup”. Kaxīy.

Ha tik kuxa mām Yeyox kopah, xix' xape xop kuxa mām kamah.

54 Yā Yeyox te hāpxopmā ka'ok xe'ēgnāg tix hāpxexka Ganinet tu'. Yā hōmā Yeyox xip hāpxexka Yonex tu', tu ta' nūn hāpxexka Ganinet tu'.

## 5

### *Yeyox te' hittupmāhā tik yīn mōg hok*

1 Hāpxip 'ihā' xip'ax Yoneo xop yōg 'āmuk xexka kōmēn Yenoyanēn kopah, ha ta' mōg Yeyox Yenoyanēn tu', tu mōktu' xupep.

2 'Ūxup puxhep max kōmēn yōg hāmpak'ax yīkox yīkah. Yā hāmyīkox 'ūxuxet'ax kahnēn yōg hāmyīkox, ha puxhep max 'ūxuxet'ax Metex, yā Yoneo xop yīy'ax kopah. Yā' pip kuxkaxax xohix te' 5 puxhep max yīmap.

3 Ha kuxkaxax kopa' pip pakut xop, yā' pa hok xop xix hāpkumep hok xop xix yīn mōg hok xop. 'Ūxohix te kōnāg yo'ok hip.

4 Hāpxip ha ta' xupep pexkox yōg nū'kutnā'ax, tu kōnāg kanop, ha ta' pakut xop mōg kōnāg hah, ha nōm mō'nāhā hāmāxap, puxix tu' hittup.

<sup>5</sup> Ha ta' xip tihik, tu' pakutpax hāmyāxatamuk xohix te' 38 hā.

<sup>6</sup> Ha Yeyox te' pēnāhā', tu' yūmmūg tik pakut mōkuma'mōg, ha Yexox te:

—'Ok xatep-tup 'āhittup? Kaxīy.

<sup>7</sup> Ha tik pakut te:

—Yāyā, 'ap xip'ah 'ūnōy, nōm tek mōgāhā puxhep max tu', 'ihā kōnāg yo'ok. 'Āte mīkaxxap ku'īn hāg yīxohoh, pa' nōy xupep hāmāxap. Kaxīy.

<sup>8</sup> Ha Yeyox te:

—Pu 'āg-nīhā xip! 'Ōg 'īxtet pa', nūy ta mōg! Kaxīy.

<sup>9</sup> Ha tik hittup mō'ka'ok, tu 'īxtet paha', tu ta' mōg.

<sup>10</sup> Pa' pip Yoneo xop, tu tik pu hām'āktux, hu:

—Hōnhā nit xap. Yā' kax'āmi tikmū'ūn yōg xat'ax yōg tappet tu', tu hām'āktux, hu: “Nit xap hā 'īxtet tat hok”. Kaxīy.

<sup>11</sup> Ha tik te:

—Tik tek hittupmāhā', tu 'ā hām'āktux, hu: “Pu 'ōg 'īxtet pa', nūy ta mōg. Kaxīy.

<sup>12</sup> Ha:

—'Ū'ūm tihik nō'ōm, nōm te hām'āktux hu: “Pu 'ōg 'īxtet pa'”? Kaxīy.

<sup>13</sup> Pa tik te' yūmmūg 'ohnāg, yā' mōg Yeyox. Yā' pip tikmū'ūn xohix 'ōnteh, yīy ta' mōg.

<sup>14</sup> Hāpxip 'ihā' mōg Yeyox Topa pet xexka ha', tu mōktu tik xipihī', tu:

—'Āpu yāy pēnā', yā 'āhittup. Pu 'ūxe hāpkummuk mīy hok. Hāpkummuk mīy, nūy ta putpu 'āpakut xexkanām. Kaxīy.

<sup>15</sup> Ta' mōg tihik, tu Yoneo xop pu hām'āktux hu:

—Yeyox tek hittupmāhā'. Kaxīy.

16 Yīy ta' gāy Yoneo xop, hu Yeyox kute'ex kum-muk. Yā nit xap 'ihā tik hittupmāhā'.

17 Pa Yeyox te tu hām'āktux, hu:

—Yōgnū 'ātak hām mōkuma'mōg, tu' hup 'ohnāg, ha tak hām kamah. Kaxīy.

18 Yīy ta' gāy xexka Yoneo xop, hu Yeyox putex putup. Yā Yeyox te nit xap yōg xat'ax koxyōy, tu Topa 'āktux hu: “Yognū 'ātak”. Kaxīy. Yā Topa putuk Yeyox. Yīy ta' gāy Yoneo xop.

### *Topak-tok te' xat*

19 Ha Yeyox te:

—'Āte hām'āktux xe'e, 'ap koit'ah. 'Ūgmūn, yā 'ātak kutok pit, tu yāp-xehnāg hā hāpxopmā 'ohnāg, pa yōg 'ātak te hāpxopmā', ha 'āte' pēnāhā', tu kama' mīy, hā' putuk.

20 'Ātak te mōgyāy xe'ēgnāg, yā mō yāy kutok yāy xe'ēgnāg, tuk-tok pu yāy yōg hāpxopmā'ax xohix mūg, puyīy pēnā'. Hōnhā tute tikmū'ūn pu hāpxopmā'ax mūg, ta hāpxip 'ihā hāpxopmā'ax max xe'ēgnāg mūg putup, xayīy 'ākuxa yēy.

21 Yōgnū 'ātak te xakix xop putpu' hīnnāhā', yā tute' hīnnāhā', xixk mūn Topak-tok te tikmū'ūn hīnnāhā kamah, tu tikmū'ūn 'ūm putup tu nōm hīnnāhā'.

22 Yōgnū 'ātak te tikmū'ūn yōg hāpxopmā'ax kopit 'ohnāg, nūy yōg hāpkummuk mī'ax hā yānān 'ohnāg. Tute yāy kutok xat, pu kopit,

23 puyīy 'ūgmūn pe tu paxeh xexkah, yā tikmū'ūn te 'ātak pe'paxex xexka putuk. Tikmū'ūn 'ūm tek-tok pe'paxex xexka 'ohnāg, tu 'ātak pe'paxex xexka 'ohnāg kamah. Yā 'ātak te yāy kutok nū'kutnāhā'.

24 —Nūhū yā hām'āktux xe'e'. Tikmū'ūn 'ūm te yōgnū hām'āktux 'āpak, tu Topa kopa' kuxa mām ka'ok, puxix hi xe'ēgnāg mōkuma'mōg, ha' kux 'ohnāg. Topa te nūgkutnāhā'. Āte nōm yōg hāpkummuk mīy'ax hā yānān putup'ah, ha' xakix xe'e putup'ah, pa' hi xe'ēgnāg mōkuma'mōg, ha' kux 'ohnāg.

25 Nūhū hām'āktux xe'e. Hāpxip 'īhā, yā hōnhā 'īhā kamah, xakix xop te Topak-tok yōg hām'āktux 'āpak putup, tu' xupak xop hip-tup.

26 Ātak kopa' xip 'ūhi'ax, yā tute hi'ax hōm. Tute yāy kutok pu' hōm, ha' xip 'ūhi'ax Topak-tok pit kopah. 'Ūgmūn, yā Topak-tok, tu hi'ax hōm kamah,

27 ha 'ātak te yāy kutok xat, pu tikmū'ūn yōg hāpkummuk mīy'ax kopit. Hamūn, 'ūgmūn yā Tikmū'ūn Kutok.

28 —Texīy 'ākuxa te' yēy? Hāpxip 'īhā xukpot tu xakix xohix xop te yōgnū hām'āktux 'āpak putup,

29 tu xukpot nīm putup, tu ta' mōg. Nōm te hāpxopmā max te putpu' hip-tup, tu hi xe'ēgnāg mōkuma'mōg, ha' kux 'ohnāg, ha ta nōm te hāpkummuk mīy te putpu' hip-tup, ha' kopit putup 'ūyōg hāpkummuk mīy'ax, nūy hāpkummuk mīy'ax hā' yānān.

### *Yeyox te' xat*

30 Yeyox te xe:

—Āte yāp-xehnāg hā hāpxopmā 'ohnāg, pa Topa te hām'āktux, ha 'āte' xupak 'ūxohix xexkah. Hā kaxīy 'āte tikmū'ūn yōg hāpxopmā'ax kopit, tu' kopit xe'e'. Āte' mīy 'ohnāg 'āte nōm putup, pa 'āte' mīy Topa te nōm putup. Tute nūgkutnāhā 'ūgmūn.



31 —'Āte yāy 'āktux, ha ta 'āxop hām'āktux, Yeyox max'ah, yā hām'āktux 'ap xe'e'ah.

32 Pa' nōy tek mūn 'āktux kamah. Yā 'ātak tek mūn 'āktux kamah. 'Āte' yūmmūg tutek mūn 'āktux xe'e'.

33 Hōmā 'āxop te mō' nōy pok Yoām hah, ha Yoām tek mūn 'āktux xe'e'.

34 'Ap 'ātep-tup'ah, pu tikmū'ūn tek mūn 'āktux. Pa 'āte xa Yoām 'āktux, xayīy 'āxop Yoām yōg hām'āktux 'āpax, puyīy Topa 'āxop kuxa kummuk xit, nūy kuxa max mō'tat, 'ūyānān tu'.

35 —Yoām te kuyānām tat'ax putuk, ha xatep-tup, tu 'ākuxa hittup Yoām yōg kuyānām kopah. Yā kuyānām xip, ha tikmū'ūn te hāmyūmmūg, tu Topa yōg putat max pēnāhā'. Yā' xip Yoām, ha tikmū'ūn tek mūn yūmmūg xix hāmmax yūmmūg.

36 Yoām tek mūn 'āktux, yā' max. Pa 'āte hāpxopmā max. Yā' max xe'ēgnāg. Yōg 'ātak te nūgkutnāhā', 'ūyīy hāpxopmā ka'ok xe'ēgnāg. Nōm te xak mūn mūg, ha xate' yūmmūg yōgnū 'ātak te nūgkutnāhā'.

37 'Ātak tek mūn 'āktux max kamah. Tute nūgkutnāhā nūnteh. 'A xate Topa te hām'āktux 'āpak'ah, tu Topa pēnā 'ohnāg,

38 ha 'ap xip ka'ok'ah Topa yōg hām'āpak max'ax 'ākuxa kopah, 'ākuxa mām 'ohnāg Topa yōg hām'āpak max'ax kopah hah. Topa te nūgkutnāhā', pa 'ākuxa mām 'ohnāg 'ūgkopah.

39 'Āxop te Topa yōg tappet mōkupix punethok, tu hāmpe'āpaxex Topa yōg tappet mōkupix, xayīy hi xe'ēgnāg mōkuma'āmōg, ha' kux 'ohnāg. Pa 'āmhok. Yā Topa yōg tappet tek mūn 'āktux,

40 pa 'a 'āxop tep-tup'ah, nūy 'ūg ha nū', nūy hi

xe'ēgnāg mōkuma'āmōg, ha' kux 'ohnāg.

<sup>41</sup> —'A 'āte' xak'ah, pu tikmū'ūn 'ūgmūn 'āktux max.

<sup>42</sup> Yā 'āte 'āxop yūmmūg, yā 'āxop te Topap-tuppax 'ohnāg 'ākuxa hā.

<sup>43</sup> Yōgnū 'ātak te 'ā' hōm yāy yōg xuxet'ax, ha 'āte yāy 'ātak pupik xip, pa 'a 'āxop tek mūn pa 'ohnāg 'ākuxa hā. Yā 'āxop tek putup nōg. Ha ta' nōy nūn, yā 'ūyāy yōg xuxet'ax hā' nūn, ha ta' 'āxop nōy pap-tup 'ākuxa hā, tu' nōy putup pax putup.

<sup>44</sup> 'Āxop tep-tup, pu tikmū'ūn 'āxop 'āktux max, pa 'āxop tep-tup'ah, pu Topa mūn 'āxop 'āktux max. Texīy 'ākuxa mām putup?

<sup>45</sup> Hāmpē'āpaxex hok 'āte yōgnū 'ātak pu 'āxop 'āktux kummuk putup. 'Āmhok. 'Ākuxa mām Mōyyex kopah, ha Mōyyex te Topa pu 'āxop 'āktux kummuk putup.

<sup>46</sup> 'Ākuxa mām xe'e Mōyyex kopah, nūy ta 'āxop kuxa mām 'ūgkopah, tuk mūn 'āpak. Hamūn Mōyyex tek mūn kax'āmi'.

<sup>47</sup> Pa 'ākuxa mām xe'e 'ohnāg Mōyyex yōg tap-pet kopah. Texīy 'āxop kuxa mām putup yōgnū hām'āktux kopah, tu nōm 'āpak? Kaxīy.

## 6

### *Yeyox te tikmū'ūn pu xit'ax nīm*

<sup>1</sup> Hāpxip 'īhā' mōg Yeyox, tu kōnāg xexka xak, yā kōnāg xexka 'āxet'ax Ganinet yōg xix 'āxet'ax nōy yā Timenit.

<sup>2</sup> Ha tikmū'ūn xohix te Yeyox pe' mōg. Yā Yeyox te hāpxopmā ka'ok xe'ēgnāg, tu pakut xop hittupmāhā', ha tikmū'ūn te' pēnāhā', hu' pe' mōg.

<sup>3</sup> Ha ta' mōg Yeyox xix yāy yōg tik xop yīktix tu', tu' mām.

<sup>4</sup> Ha' xip'ax Yoneo xop yōg 'āmuk xexka 'āxet'ax Nōā'yēn.

<sup>5</sup> Ha Yeyox te' pēnāhā', pa' nūn tikmū'ūn xohix, ha Yeyox te Pinip pu hām'āktux, hu:

—Pi'yā yūmū'āte' pop'ax xit'ax tikmū'ūn xohix pu'? Kaxīy.

<sup>6</sup> Yā Yeyox te nōm 'āktux, nūy Pinip yōg hāpxopmā'ax kopit. Yā Yeyox te' yūmmūg tute hāpxopmāp-tup.

<sup>7</sup> Ha Pinip te:

—Pām yōg tayūmak xohix. Yā tik hām mey te' 4, nūy tayūmak pop, nūy nōm hā' pop pām, ha ta tikmū'ūn te pām kutōgnāg māp-tup. Kaxīy.

<sup>8</sup> Ha 'Ānene te hām'āktux, yā 'Ānene te Yeyox yōg tik xop kopa' xip, yā Pet taknōy. 'Ānene te:

<sup>9</sup> —Ūxip nūnte kaxop pit, tu yōg pām te xemat hā' mīy, tu' xohix te' 5, xix yōg mām tix pip kamah. Tu texīy tikmū'ūn xohix pu'? Kaxīy.

<sup>10</sup> Ha Yeyox te:

—'Āpu 'ūxat, pu tikmū'ūn māhām. Kaxīy. Yā' xux xohix pip. Ha' xat, ha' mām tikmū'ūn, yā' xohix te' 5.000 tihik, ha 'ūn pip kamah xix kaxop.

<sup>11</sup> Ha Yeyox te pām pop, tu Topa pu hām'āktux, hu:

—'Ūmax pām xix māhām. Puxi'. 'Āmax. Kaxīy.

Tu pām koxip, tu tikmū'ūn pu' nīm, tu mām koxip kamah, tu tikmū'ūn pu' nīm, ha tikmū'ūn te xohix pop, hu ta' kux, 'ap nōy putup'ah. Puxix.

<sup>12</sup> Tu' mā kux, tu' hix ka'ok, ha Yeyox te yāy yōg tik xop pu:

—'Āpu yā 'āxit'ax yāg xohix mām tikmū'ūn te nōm putup'ah. Nōm putyōn hok. Kaxīy.

<sup>13</sup> Ha Yeyox yōg tik xop te' xit'ax yāg mām, tu manax hā' tat, yā manax xohix te' 12, tikmū'ūn te nōm mā 'ohnāg. Yā Yeyox te pām xemat te' 5 hā' mīy xohix.

<sup>14</sup> Ha tikmū'ūn te' pēnāhā', yā Yeyox te hāpxopmā ka'ok xe'ēgnāg. Tikmū'ūn te:

—Topa yōg tappet tu' xuktux, 'ūnūn putup tik te Topa pupi hām'āktux hām xexka tu'. Hamūn, Yeyox yā nō'ōm. Kaxīy.

<sup>15</sup> Tikmū'ūn tep-tup, nūy Yeyox mōgā mō'ka'ok, nūy Yeyox mīy tikmū'ūn yōg xat'ax, pa Yeyox te' yūmmūg, hu ta' mōg yīktix tu', tu yāp-xehnāg xip.

*Yeyox te kōnāg yīmū' mōg pata hā*

<sup>16</sup> 'Āmāxak ha ta' mōg Yeyox yōg tik xop, tu yīktix tu yīxoho' tu mōktu' mōxaha kōnāg xexka tu',

<sup>17</sup> tu mīpkox tu' mōxaha', tu nōm mōxakux, tu kōnāg tu' mōg kōmēn Kapānām tu'. 'Āmnīy, ha ta' xupep 'ohnāg Yeyox yāy yōg tik xop tu'.

<sup>18</sup> Pa 'āmuuh xexka te mō'kouk, ha kōnāg tot xexkah,

<sup>19</sup> ha Yeyox yōg tik xop te mīpkox mōgāhā', tu mōktu 5 kīnōm ha' mōg pe' 6 ha' mōg, tu' pēnāhā', pa' xip Yeyox, ha kōnāg yīmū' hāpkumep, yā' kōnāg yīmū' mōg pata hā, tu mīpkox yīka' nūn, ha ta' yīpkutuk Yeyox yōg tik xop,

<sup>20</sup> ha Yeyox te:

—'Ūgyīpkutuk hok, yāg mūn. Kaxīy.

<sup>21</sup> Tu ta mīpkox hā mō'nāhā Yeyox, yīy ta' hittup Yeyox yōg tik xop, yā mō'nāhā', ta hāpxip 'ohnāg ha ta' xupep mīpkox hāpkux nōy tu'.

*Tikmũ'ũn te Yeyox xak*

<sup>22</sup> Hăptup ha ta tikmũ'ũn te kōnăg xexka xatapa' pip hăpkux nōy tu', tu' pēnăhă mīpkox kutōgnăg yăp-xehnăg mōg nōm te Yeyox yōg tik xop tat, pa Yeyox mō'tat 'ohnăg.

<sup>23</sup> Ha ta' nūn kōmēn Timenit tu' mīpkox xape xohix, tu nūktu' mōxaha hăpkux tu'. Yă hōmă tikmũ'ũn te pām măhă 'ōnteh. Yă Yeyox te Topa pu pām 'ăktux 'ōnteh.

<sup>24</sup> Ha tikmũ'ũn te' pēnăhă 'ap xip'ah Yeyox, ha Yeyox yōg tik xop 'ap pip'ah kamah. Tikmũ'ũn te mīpkox tu' mōxaha', tu ta' mōg kōmēn Kapănăm tu', nūy Yeyox xax.

*Yeyox te pām putuk, tu tikmũ'ũn hīnnăhă'*

<sup>25</sup> Tu ta' mōg tikmũ'ũn, tu kōnăg xexka xak, tu mōktu' mōxaha hăpkux nōy tu', tu Yeyox xak, tu' xipihī', tu Yeyox pu:

—Notot, hām'ũmhă 'ăxu pep nūnteh? Kaxīy.

<sup>26</sup> Ha:

—'Ăte xa hăpxe'e 'ăktux. 'Ăxop tek xak, xayīy pām mă', tu mōktu' 'ăhix ka'ok. 'Ăte hăpxopmă', pa 'ăxop te nōm yūmmūg 'ohnăg. 'Ūgka'ok, pa 'ăxop te nōm yūmmūg 'ohnăg.

<sup>27</sup> 'Ăpu pām xax hok, yă hăpxip kutōgnăg 'ihăgnox pām. 'Ăpu pām nōy xax, yă' nōy xip ka'ok hămyăxatamuk xohix kux 'ohnăg hă. 'Ūgmūn, yă Tikmũ'ũn Kutok, tu xa' popmăp-tup pām nō'ôm. Hamūn, Topa tek xat, 'ũ' hōm nō'ôm. Kaxīy.

<sup>28</sup> Ha tikmũ'ũn te:

—Topa te putep putup, pu tikmũ'ũn mīy? Kaxīy.

<sup>29</sup> Ha Yeyox te:

—Topa tep-tup nūhū'. Tutep-tup, pu tikmū'ūn kuxa mām nōm kopah Topa te nōm nū'kutnāhā'. Kaxīy.

<sup>30</sup> Ha tikmū'ūn te:

—'Āpu hāpxopmā ka'ok xe'ēgnāg, puyīy tikmū'ūn kuxa mām 'ākopah. Putep mūn mīy putup?

<sup>31</sup> Hōmā 'ūhittap yūmū yōg mōnāyxop te' māhā nōm te pām putuk 'ūxuxet'ax mānā', yā hām panip xexka tu' māhā'. Hāmūn, Topa yōg tappet te: “Topa te pekkox tu' putxok pām, puyīy tikmū'ūn mā'. Kaxīy.

<sup>32</sup> Ha Yeyox te:

—'Āte xa hāpxe'e 'āktux. 'A' Mōyyex te xa' pōpmā 'ohnāg pekkox yōg pām, pa yōgnū 'ātak te xa' popmāhā pekkox yōg pām xe'e'.

<sup>33</sup> Topa te pām 'ūm popmāhā'? Yā nōm te pekkox tu' nūn, ha nōm te tikmū'ūn xohix hīnnā mōkuma'mōg, ha' kux 'ohnāg. Kaxīy.

<sup>34</sup> Ha tikmū'ūn te:

—Notot, 'āpu 'ūgmū'ā popmā' nō'ōm pām. 'Āpu nōm popmā mōkumamōg. Kaxīy.

<sup>35</sup> Ha Yeyox te:

—'Āte pām putuk nō'ōm pekkox yōg. Pām te tikmū'ūn hīnnāhā', ha 'āte tikmū'ūn hīnnāhā', puyīy hi xe'ēgnāg mōkuma'mōg. Tikmū'ūn tek ha' nūn, puxix putup xūy nōāp-tup 'ūkuxa kopah. Tikmū'ūn tek mūn kopa' kuxa mām, puxix kōnāg putup xūy putuk nōāp-tup 'ūkuxa kopah, yā 'a xe kōnāg putup xūy putuk xip putup'ah 'ūkuxa kopah.

<sup>36</sup> Pa 'āte xa' xuktux, 'āxop tek pēnāhā', pa 'ākuxa mām ka'ok 'ohnāg.

37 Yōgnū 'ātak te 'ā' popmāhā tikmū'ūn, puyīy' kuxa mām 'ūgkopah, ha nōm tek ha' nūn putup, ha 'āte xohix pop putup, tu 'ātep-tup nōg 'ohnāg putup, yā yōg xop, 'āte mō nōm yāy xe'ēgnāg.

38 Hamūn, 'āte pexkox tuk nūn tuk yīxoho', nūy mīy Topa te nōm putup. Yā tute nūgkutnāhā'. 'Ak nūn'ah, nūy mīy 'āte nōm putup.

39 Topa te nūgkutnāhā', 'ūyīy hāpxopmā', yā 'āte yāy yōg tikmū'ūn xaxok 'ohnāg. Yā nōm te' kuxa mām'ax xaxok putup'ah, ha Hāmgyāgnāg te nōm pop putup'ah. 'Ātak te 'ā nōm popmāhā', ha 'āte nōm putpu' hīnnāp-tup hāmyāxatamuk xohix xox putox 'īhā'.

40 Hamūn, yōgnū 'ātak tep-tup hā kaxīy. 'Ūp-tup, puyīy nōm hi xe'ēgnāg mōkuma'mōg, yā nōm xohix te Topak-tok pēnāhā', hu' kuxa mām Topak-tok kopah. Ha ta hāmyāxatamuk xohix xox putox 'īhā putpu' hīnnāp-tup 'āte'. Kaxīy.

41 Ha Yoneo xop te Yeyox 'āktux kummuk kōnāmāhā'. Yā Yeyox te: "Ūgmūn yā pām putuk, nōm te pexkox tu' yīxoho'". Kaxīy.

42 Ha Yoneo xop te:

—Yā tihik nūhū', yā Yeyox. 'Ok Yoyek-tok? Yūmū'āte' yūmmūg 'ūyōg 'ātak xi' tut. Teptu hām'āktux pexkox tu' yīxoho'? Kaxīy.

43 Ha Yeyox te:

—Āhup. Yāy mūtik hām'āktux kummuk hok!

44 Yōgnū 'ātak tek ha tikmū'ūn nūnnāhā', yā' kuxa mām 'ūgkopah. Ha Topa te tikmū'ūn nūnnāp-tup'ah, yā' kuxa mām putup'ah 'ūgkopah. Ha ta hāmyāxatamuk xohix xox putox 'īhā' 'āte yāy yōg xop putpu' hīnnāp-tup.

45 Hōmā 'ūhittap tik te Topa pupi hām'āktux xop te' kax'āmi, hu: "Topa te tikmū'ūn xohix xexka pu hāmyūmmūgāhā'. 'Ūxohix te 'ātak 'āpak, hu hāmyūmmūg, yā nōm xohix 'ūg ha' nūn putup.

46 'Ap 'āte hām'āktux'ah tik 'ūm te Topa pēnāhā'. Nōm te Topa ha' nūn, yā nōm puxehnāg te Topa pēnāhā'.

47 —'Āte xa hāpxe'e 'āktux. Tikmū'ūn kuxa mām ka'ok 'ūgkopah, puxix hi xe'ēgnāg mōkuma'mōg, ha' kux 'ohnāg.

48 'Ūgmūn yā pām putuk, tu tikmū'ūn hīnnāhā'.

49 Hōmā 'ūhittap mōnāyxop te pām mānā māhā hām panip xexka tu', pa' xakix pax.

50 Pa tikmū'ūn 'ūm te pām nōy māhā', puxix xakix ka'ok putup 'ohnāg.

51 'Ūgmūn yā pām putuk, tu tikmū'ūn hīnnāhā', ha' hi xe'ēgnāg mōkuma'mōg, ha' kux 'ohnāg. 'Āte pexkox tuk yīxohoh. Tikmū'ūn 'ūm te' māhā', puxix hi xe'ēgnāg mōkuma'mōg, ha' kux 'ohnāg. Pute 'ūm pām nō'ōm 'āte tikmū'ūn pu nōm hōm? Yā yāy yōg yīn. 'Āte yāy yīn hōm, puyīy tikmū'ūn xohix hi xe'ēgnāg mōkuma'mōg, ha' kux 'ohnāg. Kaxīy.

52 Ha ta' gāy Yoneo xop, tu yāy mūtik hām'āktux, hu:

—Texīy tik te yūmū'ā yāy yīn hōm, 'ū mā'? Kaxīy.

Yā tikmū'ūn kuxa mām'ax te' putuk tikmū'ūn te Yeyox yīn māhā'.

53 Ha Yeyox te:

—'Āte xa hāpxe'e 'āktux. Tikmū'ūn te Tikmū'ūn Kutok yīn mā 'ohnāg, yāg yīn mā 'ohnāg, pixix hi xe'ēgnāg mōkuma'mōg 'ohnāg. Tikmū'ūn te



Tikmũ'ũn Kutok hep 'āta xo'op 'ohnāg, puxix hi xe'ēgnāg mōkuma'mōg 'ohnāg.

54 'Ūxohix tek yīn māhā', tuk hep 'āta xo'op, puxix hi mōkuma'mōg, ha' kux 'ohnāg, ha ta hāmyāxatamuk xohix xox putox 'īhā 'āte nōm putpu' hīnnāp-tup.

55 Hamũn, 'ūgyīn yā xit'ax xe'e, xik hep 'āta yā hep xe'e'.

56 Tikmũ'ũn 'ũm tek yīn māhā' xik hep 'āta xo'op, yā nōm kuxa mām 'ūgkopah, hak xip ka'ok nūmūtik.

57 Yōgnũ 'ātak te nūgkutnāhā', tuk hīnnāhā'. Hā kaxīy 'āte tikmũ'ũn hīnnāhā', nōm tek yīn māhā', yā' kuxa mām 'ūgkopah.

58 'Āte pām putuk, tu pexkox tuk yīxohoh, yā' putuk'ah pām nōy. Mōnāyxop te nōm māhā', pa' xakixpax. 'Ūxohix 'ũm tek yīn māhā', yā' kuxa mām 'ūgkopah, puxix hi xe'ēgnāg mōkuma'mōg, ha' kux 'ohnāg. Kaxīy.

59 Hā kaxīy hām'āktux Yeyox Yoneo yōg Topa pet kopah kōmēn Kapānām tu'.

*Yeyox yōg hām'āktux'ax te tikmũ'ũn hīnnāhā'*

60 Yā hām'āktux 'āpak tikmũ'ũn xohix, nōm te Yeyox pe' mōg, tu:

—Yā tute yūmũ'ā hāmyūmmūg ka'ok yūmmūgāhā'. 'Ū'ũm te nōm 'āpak, nūy yīpkox pi'? Yā tik 'ohnāg. Kaxīy.

61 Hā kaxīy hām'āktux kummuk Yeyox pe' mōg xop. Tikmũ'ũn te Yeyox pu hām'āktux 'ohnāg, pa Yeyox te tikmũ'ũn yōg hām'āktux'ax yūmmūg, tu:

—'Ok yōgnũ hām'āktux te 'āxop kuxa nōā'?

<sup>62</sup> Paxpu 'āxop te' pēnāhā 'ūgmūn, yā Tikmū'ūn Kutok pēnāhā', 'ihāg mōg pepix putpu' yāy yōg xip'ax tu', nūy ta putep pe 'āxop paxex putup?

<sup>63</sup> Tikmū'ūn koxuk pip, puxix hi tikmū'ūn. Yōgnū hām'āktux te' koxuk putuk, tu tikmū'ūn hīnnāhā'.

<sup>64</sup> Pa' pip 'āxop kopah tikmū'ūn kuxa mām 'ohnāg. Kaxīy.

Yā hōmā 'ūhittap Yeyox te' yūmmūg mōkuma'mōg yāg xop kuxa mām 'ohnāg, tu kama' yūmmūg tik te' gāy xop mōgāp-tup Yeyox hah, puyīy xūygā'.

<sup>65</sup> Ha Yeyox te:

—Hamūn 'āte xa hām'āktux, Topa tek ha tikmū'ūn nūnnāhā, puxix 'ūg ha nū'. Pa Topa tek ha tikmū'ūn nūnnā 'ohnāg, puxix nūn 'ohnāg, yā 'ūgkopa' kuxa mām putup'ah. Kaxīy.

<sup>66</sup> Yīy ta Yeyox nīm tikmū'ūn xohix te', tu xe Yeyox pe' mōg 'ohnāg,

<sup>67</sup> ha Yeyox te yāy yōg tik te 12 xop pu:

—'Ok 'āxop tek nīm putup kamah, nūy ta mōg? Kaxīy.

<sup>68</sup> Ha Xīmām Pet te:

—Tep pek mūg mōg putup? 'Ōg hām'āktux'ax tek mūg hīnnāhā', hak mūg hi hāmyāxatamuk xohix kux 'ohnāg hā.

<sup>69</sup> 'Ūgmū'āte' yūmmūg 'āmūn yā Kunnux, ha Topa te 'āmūn yāy kutnāhā'. Yā Topa tu 'ānūn. Kaxīy.

<sup>70</sup> Ha Yeyox te:

—'Ok 'āte 'āxop yīmōgātux tikmū'ūn kopah? Pa 'āxop kopa' xip yāp-xet, yā Hāmgāyāgnāg xop yōg tik te 'āxop kopa' xip. Kaxīy.

<sup>71</sup> Hamūn, Yeyox te Yot 'āktux, yā Xīmām kutok Yot, yā' xip Yeyox yōg tik te 12 xop kopah, pa hāpxip

'Īhā Yot te' gāy xop mōgāp-tup Yeyox hah, puyīy Yeyox xūygā'.

## 7

### *Yeyox xix' taknōy xop*

<sup>1</sup> Ta' mōg Yeyox, tu hāpkumep hāpxexka Ganinet tu'. 'A' putup'ah, nūy hāpkumep hāpxexka Yonex tu', yā Yoneo xexka xop tep-tup, nūy Yeyox putex Yonex tu'.

<sup>2</sup> Hāpxip kutōgnāg 'Īhā' xip'ax 'āmuk xexka 'āxet'ax Mīptutnāg Yōg 'Āmuk Xexka'.

<sup>3</sup> Ha ta' pip Yeyox taknōy xop, tu:

—'Āpu mōg Yonex tu', puyīy 'āmūtik hāpkumep xop pēnā' xate hāpxopmā ka'ok xe'ēgnāg.

<sup>4</sup> Xatep-tup, pu tikmū'ūn 'āyūmmūg, ha ta yāy yōg hāpxopmā'ax xaptop putup'ah. Xate hāpxopmā ka'ok xe'ēgnāg. 'Āpu 'ūmīy, puyīy tikmū'ūn xohix pēnā', nūy 'āyūmmūg. Kaxīy.

<sup>5</sup> Yā 'a' taknōy xop mūn te Yeyox kopa kuxa mām 'ohnāg

<sup>6</sup> Ha Yeyox te:

—Hōnhā 'ūmīy hok pu' max. 'Ap xe'e'ah hōnhā, pa 'āmnīy xohix 'ūxe'e 'āxop yōg.

<sup>7</sup> Tikmū'ūn xohix te 'āxop putup nōg yūmmūg 'ohnāg, pa tikmū'ūn xohix tek putup nōg, yā 'āte hām'āktux punethok tikmū'ūn te hāpkummuk mīy.

<sup>8</sup> 'Āpu mōg 'āmuk xexka hah. 'Ap 'ūgmōg putup'ah nōmhā. 'A' 'āmnīy xe'e'ah yōgnū'. Kaxīy.

<sup>9</sup> Hā kaxīy Yeyox te hām'āktux, tu' nox xip hāpxexka Ganinet tu'.

### *Yeyox mōg 'āmuk xexka hah*

10 Ha ta' mōg 'ūtaknōy xop 'āmuk xexka hah, ha hāpxip 'īhā' mōg kama Yeyox, pa yāy xaptop, yā tikmū'ūn te' pēnā 'ohnāg.

11 Ha Yoneo xexka xop te Yeyox xak 'āmuk xexka tu', tu tikmū'ūn yīykopit, hu:

—Pi'yā' xip Yeyox? Kaxīy.

12 Ha tikmū'ūn te hām'āktux pū'ūgnāg punethok, ha' yāg te:

—Yā tik max nō'ōm. Kaxīy.

Pa' yāg nōy te:

—Tute mō'āmā'. Kaxīy.

13 Pa' xohix te hām'āktux pū'ūgnāg, yā hām'āktux xaptop, Yoneo xexka xop yīpkutuk tu'

14 Hāpxip 'āmuk xexka kote 'īhā' mōg Yeyox, tu mōktu Topa pet xexka hā mō'nāhā', tu tikmū'ūn pu hāmyūmmūgāhā kōnāmāhā',

15 ha Yoneo xexka xop te' yēy, tu:

—Texīy kāy te hāmyūmmūg xexka', pa tappet mīy 'ohnāg? Kaxīy.

16 Ha Yeyox te:

—A 'āte yāy yōg hāmyūmmūg yūmmūgā'ah, pa Topa yōg, yā tute nūg mūn kutnāhā'.

17 Tikmū'ūn 'ūm tep-tup, nūy mīy Topa te nōm putup, puxix yūmmūg putup 'āte Topa yōg hāmyūmmūg 'āktux, 'a yōg'ah.

18 Tikmū'ūn 'ūm te yāy yōg hāmyūmmūg 'āktux, puxip-tup, pu tikmū'ūn hāmpē'paxex yā' xexka nō'ōm. Ha ta' nōy tep-tup, pu tikmū'ūn hāmpē'paxex yā' xexka Topah. Yā Topa te nū nōm kutnāhā', yā tik yok, yā' koit 'ohnāg.

19 Hōmā Mōyyex te xa' popmāhā Topa te nōm xat. Hamūn, pa 'āxop xohix te' mīy 'ohnāg Topa yōg xat'ax. Teptu 'āxop tep-tup, nūy 'ūkputex? Kaxīy.

20 Ha tikmū'ūn te:

—Yāmīy kummuk xip 'ākopah. Tep-te 'āp-tex putup? Kaxīy.

21 Ha Yeyox te:

—Āte hāpxopmā ka'ok xe'ēgnāg puxet, yīy 'āxop kuxa te' yēy.

22 Hōmā 'ūhittap mōnāyxop tek-tok pit xop xax mep 'ūyīmap hāmāxap, ha ta hāmyāxatamuk punethok nōg, 'ihā Mōyyex te' xat, pu' mīy nō'ōm, yīy ta hōnhā 'āxop te' mīy 'āmnīy hām hok 'ihā'.

23 'Āxop tek-tok pit xax mep 'ūyīmap 'āmnīy hām hok 'ihā', nūy Mōyyex yōg xat'ax mīy. Texīy 'āxop gāy, yā 'āte tik hittupmāhā 'āmnīy hām hok 'ihā'?

24 'Āxop te hāmpēnāhā mō'ka'ok, tu yōgnū hāpxopmā'ax kopit mō'ka'ok, tu hām'āktux mō'ka'ok 'ūgkummuk. Kaxīy hok! 'Āpu yōgnū hāpxopmā'ax kopit mō'ka'ok hok! Kaxīy.

*'Ok Topa te Yeyox yāyikutnāhā'?*

25 Ha ta kōmēn Yenoyanēn yōg yāg xop te:

—'Ok nō'ōm tihik? 'Ok tikmū'ūn te' kāy putex putup?

26 Pēnā! Tute tikmū'ūn xohix mūtik hām'āktux, pa tikmū'ūn te Yeyox pa 'ohnāg, yā' mūg 'ohnāg. 'Ok xexka xop te' yūmmūg 'ohnāg yā Yeyox, Topa te nōm yāyikutnāhā'?

27 'Ūnūn nō'ōm, Topa te nōm yāyikutnāhā', puxix tikmū'ūn yūmmūg putup'ah 'ūyōg xip'ax, xix hām tu' nūn yūmmūg putup'ah, pa yūmūg xohix te'

yūmmūg Yeyox yōg xip'ax, xix yōg hām tu' nūn, xix yōg 'ātak, xi' tut. Kaxīy.

<sup>28</sup> Ha ta' xip Yeyox Topa pet xexka kopah, tu tikmū'ūn pu hāmyūmmūgāhā', tu hām'āktux ka'ok, hu:

—'Ok 'āxop tek mūn yūmmūg xe'e'? 'Ok 'āxop te' yūmmūg hām tuk nūn? 'Ak puxet nūn'ah, yā Topa xe'e te nūgkutnāhā', pa 'āxop te Topa yūmmūg 'ohnāg.

<sup>29</sup> Pa 'āte nōm yūmmūg. Yā 'āte nōm tuk nūn, ha tute nūgkutnāhā'. Kaxīy.

<sup>30</sup> Ha tikmū'ūn te' kax, pu xonat xop Yeyox mūy, pa' mūg 'ohnāg, yā Yeyox mūg yōg 'āmnīy xe'e xupep 'ohnāg.

<sup>31</sup> Pa tikmū'ūn punethok kuxa mām ka'ok Yeyox kopah, tu:

—Kunnix nūn, yā Topa te nōm yāyikutnāhā', ha' nūn, tu hāpxopmā ka'ok xe'ēgnāg. Yā Yeyox te' mīy punethok te kaxīy. Kaxīy.

### *Xonat xat, pu Yeyox mūy*

<sup>32</sup> Yā tikmū'ūn xohix te hām'āktux pū'ūgnāg te kaxīy, ha Paniye xop te' xupak, hu xonat xat xix 'āmānex xexka xop te xonat xat, pu Yeyox mūy.

<sup>33</sup> Ha Yeyox te:

—Hāpxip kutōgnāg hāg xip'ax 'āxop kopah, tu tak mōg putup nōm hah, yā nōm te nūgkutnāhā', yā nōm hak mōg putup.

<sup>34</sup> 'Āxop tek xak putup, pak xipi tapax 'ohnāg. Yā 'ūgmōg putup nōm hām tu', pa 'āmōg yūmmūg 'ohnāg. Kaxīy.

<sup>35</sup> Ha Yoneo xexka xop te yāy mūtik hām'āktux, hu:

—Pi'yā' mōg putup? Texīy yūmū'āte nōm xipi tapax 'ohnāg? 'Ok mōg putup kōmēn tu' hāpxexka Genex tu'? Yā Yoneo xop pip 'ōnteh. 'Ok Genex yōg xop pu hāmyūmmūgāp-tup?

<sup>36</sup> Putep 'āktux? Tute: “Āxop tek xak putup, pak xipi tapax 'ohnāg. 'Āmōg yūmmūg 'ohnāg.” Kaxīy. Putep xuktux Yeyox? Kaxīy.

*Kōnāg kox putuk tikmū'ūn kuxa kopah*

<sup>37</sup> Ta 'āmuk xexka yōg 'āmnīy xox putox, yā 'āmuk xexka yōg 'āmnīy xexka', 'īhā' xip Yeyox, tu hām'āktux ka'ok, hu:

—'Ū'ūm te kōnāg putup xūynāg putuk 'ākuxa kopah. Mā 'ūg ha, nūy xo'op putuk.

<sup>38</sup> Yā Topa yōg tappet te: “Tikmū'ūn 'ūm 'ūgkopa' kuxa mām, tu' kuxa kopa' mōg putup kōnāg kox xexka punethok putuk, yā kōnāg xet putuk, tu hāptopa' mōg putup”. Kaxīy.

<sup>39</sup> Yā Yeyox te Topa Koxuk 'āktux, yā kōnāg kox putuk Topa Koxuk tikmū'ūn kuxa kopah, tu tikmū'ūn hīnnāhā'. 'Ūkuxa mām xop te Topa Koxuk pap-tup. Pa nōm 'āmnīy 'īhā Yeyox te hām'āktux, 'īhā' hōm 'ohnāg Topa Koxuk. Nāy, pu Yeyox xok, tu putpu' hi', tu yōg hām xe'ēgnāg tu' mōg hāmāxap, tuk-nāy tu Topa Koxuk hōm putup.

*Tikmū'ūn hāmpē'paxex'ax yāy pot*

<sup>40</sup> Tikmū'ūn te' xupak, ha punethok te:

—Yā tute Topa pupi hām'āktux xe'e'. Kaxīy.

<sup>41</sup> Ha ta' yāg te:

—Nōm yā Kunnix, yā Topa te nōm yāykutnāhā'. Topa yōg tappet te hām'āktux Kunnix nūn putup. Kaxīy.

Pa tikmũ'ũn nõy te:

—'A' Ganinet tu' nũn putup'ah Kunnix.

<sup>42</sup> Topa yõg tappet te hãm'ãktux Kunnix te Namix yõg xupepmã xop kopa' xip putup, tu nãp-tup kãmẽn Menẽg tu', yã Namix yõg xip'ax Menẽg. Kaxĩy.

<sup>43</sup> Ha tikmũ'ũn hãmpe'paxex'ax yã pot.

<sup>44</sup> Yã yãg xop tep-tup, pu xonat Yeyox mũy, pa' mũg 'ohnãg.

*Yoneo xexka xop kuxa mãm 'ohnãg Yeyox kopah*

<sup>45</sup> Ha ta' mõg putpu' xonat xop 'ãmãnex xexka xop hah, tu paniye xop ha' mõg, ha' yĩkopit, hu:

—Tepu Yeyox nũnnã 'ohnãg? Kaxĩy.

<sup>46</sup> Ha xonat xop te:

—Yã hãm'ãktux max Yeyox te'. Tep-te hãm'ãktux nõm tik yõg hãm'ãktux putuk? Yã tik 'ohnãg. Hãm'ũmhã hãm'ãktux nõm tik yõg hãm'ãktux putuk? Yã hãm'ãktux 'ohnãg. Kaxĩy.

<sup>47</sup> Ha Panixet xop te:

—'Ok 'ãkuxa mãm 'ũyõg mõ'ãmã'ax kopa kamah?

<sup>48</sup> Tik xexka 'ũm kuxa yũm kãy kopah, xix Paniye 'ũm? Hãm'ũmhã'? Yã tik xexka 'ohnãg xix Paniye 'ohnãg kuxa mãm kãy kopah. 'Ãmhok.

<sup>49</sup> Tikmũ'ũn te' yũmmũg 'ohnãg Mõyyex yõg xat'ax, yĩy Topa te nõm xũygãp-tup. Kaxĩy.

<sup>50</sup> Pa' xip Nĩkonẽm, yã hõmã Yeyox ha' mõg Nĩkonẽm, yã Paniye xop kopa' xip. Tute:

<sup>51</sup> —Yũmũ yõg xat'ax te hãm'ãktux, hu: “Åpu tik yõg hãpxopmã'ax kopit hãmãxap, tuk-nãy tu' xuktux 'ũkummuk tihik.” Kaxĩy.

<sup>52</sup> Ha' nõy te:



—'Ok hāpxexka Ganinet tu 'ānūn kamah Yeyox putuk? 'Āpu mōkupix max Topa yōg tappet, ha xate' yūmmūg putup Topa pupi hām'āktux xop te hāpxexka Ganinet tu' nūn 'ohnāg. Kaxīy.

<sup>53</sup> Ha ta' nūn tikmū'ūn yāy pet hah.

## 8

### *'Ūn te' nōy hā' xupxet*

<sup>1</sup> Ha ta' mōg tikmū'ūn xohix xexka yāy pet hah, ha ta' mōg Yeyox yīktix 'Onimet Kup tu'

<sup>2</sup> Hāptup māyōn xupep 'īhā' mōg Yeyox tu mōktu putpu' xupep Topa pet xexka tu', pa tikmū'ūn xop xexka te Yeyox xakot, ha Yeyox yūm, tu tikmū'ūn pu hāmyūmmūgāhā kōnāmāhā'.

<sup>3</sup> Ha ta' pip kama tik te hāmyūmmūg xop xix Paniye xop, tu' nūnnāhā 'ūhūn. Hōmā 'ūn te' nōy hā' xupxet, ha tikmū'ūn te' pēnāhā'. Nōm te 'ūn xix tikmū'ūn keppah, hak-nīhā' xip.

<sup>4</sup> Ha nōm xop te Yeyox pu hām'āktux, hu:

—Notot, nū 'ūn te' nōy hā' xupxet, ha tikmū'ūn te' pēnāhā'. Yā' xonnix.

<sup>5</sup> Ha ta' hōmā Mōyyex te' kax'āmi yūmū yōg xat'ax yōg tappet tu', tu kax'āmi, pu tikmū'ūn 'ūn te kaxīy tu' mīkaxxap hā tux, tu nōp-tex. Putep xuktux 'āmūn nōmhā'. Putep mūn mīy putup yūmū'āte'? Kaxīy.

<sup>6</sup> Yā Paniye xop yōg hām'āktux te pamāg putuk. Yā 'ūp-tup, puyīy Yeyox hām'āktux kummuk, puyīy tikmū'ūn xuktux Yeyox 'ūkummuk. Pa Yeyox nū'xup, tu' yīm kutok hā' kax'āmi hām tu'.

<sup>7</sup> Ha tik te xe' yīykopit punethok, ha' yok Yeyox, tu:

—'Ok xip nūnte tik te hāpkummuk mīy 'ohnāg?  
'Ūxip, puxix mō xap yōn hāmāxap putup. Kaxīy.

<sup>8</sup> Yeyox nū'xup 'ūxeheh, tu xe kax'āmi hām tu',

<sup>9</sup> ha' xupak xop 'ūp-xet hu' mōg, yā kutut mōg  
hāmāxap, tu mōktu tik xip 'ohnāg Yeyox mūtik xix  
'ūn mūtik. Yā' xip Yeyox xix 'ūhūn,

<sup>10</sup> ha Yeyox yok, tu:

—Nixxix, pi'yā' mōg tihik? Pi'ā' pip tik te  
hām'āktux 'ākummuk? Kaxīy.

<sup>11</sup> Ha:

—Yāyā, 'ūmōg ka'mām, yā' pip'ah. Kaxīy.

Ha Yeyox te:

—Hamūn, 'a 'āte hām'āktux'ah 'ākummuk, 'a yā  
'ākummuk'ah. Mōg, nūy xe hāpkummuk mīy hok.  
Kaxīy.

*Yeyox te tikmū'ūn xohix yōg kūyānām putuk*

<sup>12</sup> Ta xe' xip Yeyox xix tikmū'ūn, ha Yeyox te:

—'Āte kuyānām putuk tikmū'ūn xohix pu'. Nōm  
te 'ūg pe' mōg, yā' xip kuyānām putuk 'ūkuxa kopah,  
yā hi'ax kux 'ohnāg yōg kuyānām, ha nōm xop 'a'  
pip'ah hāpkoxtap kopah. Kaxīy.

<sup>13</sup> Ha Paniye xop te:

—Nōmhā 'āp-xehnāg te yāy 'āktux, yīy 'ōg  
hām'āktux 'ūxe'e 'ohnāg. Kaxīy.

<sup>14</sup> Ha Yeyox te:

—Paxpuk puxehnāg te yāy 'āktux, puxix 'ūxe'e  
yōg hām'āktux. Hamūn, 'āte' yūmmūg hām tuk nūn,  
xix hām tuk mōg putup kama' yūmmūg. Pa xate'  
yūmmūg 'ohnāg hām tuk nūn, xix hām tuk mōg  
putup kama xate' yūmmūg 'ohnāg.

15 Āxop te hām'āktux mō'ka'ok 'ūnōy kummuk, yā 'āxop te tikmū'ūn xohix putuk. Pa 'āte hām'āktux 'ohnāg 'ūnōy kummuk.

16 Paxpu 'āte hām'āktux 'ūnōy kummuk, kopxix 'ūnōy yōg hāpxopmā'ax kopit xe'e'. 'Ūgpuxehnāg xip 'ohnāg, pa yōgnū 'ātak xip 'ūgmūtik. Tute nūgkutnāhā'.

17 Yā 'ūkax'āmi 'ōg xat'ax yōg tappet tu', 'ūtix te pēnā xop 'āktux, ha hām'āktux tix te yāy putuk, puxi' xe'e 'ūyōg hām'āktux.

18 Āte yāy 'āktux, ha yōgnū 'ātak tek mūn 'āktux kamah, yā hām'āktux tix te yāy putuk. Tute nūgkutnāhā' Kaxīy.

19 Ha nōm te:

—Pi'yā' xip 'ōg 'ātak? Kaxīy.

Ha Yeyox te:

—'Ap 'āxop tek yūmmūg'ah xix yōgnū 'ātak 'ap yūmmūg'ah kamah. Paxpu 'āxop 'ūgyūmmūg, hu ta yōgnū 'ātak yūmmūg kamah. 'A 'āxop tek 'ūgyūmmūg'ah. Kaxīy.

20 Hā kaxīy Yeyox te xohix pu hāmyūmmūgāhā Topa pet xexka kopah. 'Ōnte tikmū'ūn te mīpkox kopa tayūmak nīm. 'A' xonat te Yeyox mūg'ah, yā yōg 'āmñy xe'e'ah, yī' mūg 'ohnāg.

### *'Ū'ūm Yeyox*

21 Ta xe hām'āktux Yeyox tikmū'ūn mūtik, hu:

—'Ūgmōg putup nūpeheh, ha xatek xak putup, pa' pip 'ōg hāpkummuk mīy'ax, 'īhā 'āxakix putup, hu 'āmōg yūmmūg 'ohnāg yōgnū xip'ax, tu 'a' nōm tu 'āmōg putup'ah. Kaxīy.

22 Ha Yoneo xexka xop te:

—Tute hām'āktux: “Āmōg yūmmūg 'ohnāg yōgnū xip'ax. Putep xuktux? 'Ok yāy putex putup? Kaxīy.

<sup>23</sup> Ha Yeyox te:

—'Ōg pip'ax pip nūnte hām xexka tu', pa 'ūkxip'ax pip pepix pexkox tu'. 'Ōgnū pip'ax yā hām xexka', pa 'ūkxip'ax xip'ah hām xexka tu'.

<sup>24</sup> Hā kaxīy 'āte xa hām'āktux, 'ūpip 'ōg hāpkummuk mīy'ax, 'īhā 'āxakix putup. 'Āxop kuxa mām 'ohnāg 'ūgmūn kopah, 'īhā 'ōg hāpkummuk mīy'ax pip ka'ok 'āxop mūtik. Hamūn, 'ākuxa mām 'ohnāg 'ūgmūn kopah, yā 'ūkxuxet'ax nōy yā 'ūgmūn yāg mūn. Kaxīy.

<sup>25</sup> Ha nōm te:

—'Āmūn 'ū'ūm? Kaxīy.

Ha Yeyox te:

—Hōmā 'āte xa nōm 'āktux punethok

<sup>26</sup> 'Āte xe xa hām'āktux punethok, tu xe 'ōg hāpxopmā'ax kopit putup punethok, nūy hām'āktux 'āxop te hāpkummuk mīy punethok. Topa te nūgkutnāhā', yā' xe'e', ha 'āte nōm yōg hām'āktux 'āpak, tu nōm 'āktux tikmū'ūn xohix pu', tu hāpxop nōy 'āktux 'ohnāg. Kaxīy.

<sup>27</sup> Ha tikmū'ūn te' yūmmūg 'ohnāg Yeyox yōg hām'āktux, yā Yeyox yōg 'ātak 'āktux'ax yūmmūg 'ohnāg.

<sup>28</sup> Ha Yeyox te:

—'Āxop tek mūn Tikmū'ūn Kutok xup putup pepix mīpkupnix tu', hak xup putup, tuk xok putup, 'īhā 'āxop te' yūmmūg putup 'ūgmūn yāg mūn, tu 'āxop te' yūmmūg putup 'āte yāp-xehnāg hā hāpxopmā 'ohnāg, pa yōgnū 'ātak yōg hāmyūmmūg 'āktux 'āte', tu hāpxop nōy 'āktux 'ohnāg,

<sup>29</sup> ha Topa te nũgkutnãhã', yã' xip 'ũgmũtik, tuk nĩm putup'ah. Yã hamũn, 'ãte hãpxopmã', hã Topa tep-tuppax, ha hãpxop nõy mĩy 'ohnãg. Kaxĩy.

<sup>30</sup> Ha tikmũ'ũn te' xupak Yeyox yõg hãm'ãktux, ha' punethok kuxa mãm Yeyox kopah.

*Nõm te hok hã hãm putuk*

<sup>31</sup> Ha Yeyox te Yoneo xop yõg kuxa mãm ka'ok xop pu hãm'ãktux, hu:

—'Ăxop te yõgnũ hãmyũmmũg tu 'ĩpkox pip, tu' mĩy, nõy ta 'ãxop yã yõgnũ xop.

<sup>32</sup> 'Ăxop te nõm te hok hã hãm putuk, ha' nõy te 'ãxop xatpax. Pa 'ãxop te' yũmmũg putup hãmyũmmũg'ax xe'e, ha hãmyũmmũg xe'e'ax te 'ãxop mõy putup, xayĩy mõg, tu xe nõm te hok hã hãm xop putuk'ah. Kaxĩy.

<sup>33</sup> Pa tikmũ'ũn te:

'Amanãm yõg xupepmã xop kopak mũg pip, tu nõm te hok hã hãm putuk 'ohnãg. Yã' nõy tek mũg xatpax 'ohnãg. Teptu xate hãm'ãktux, 'ũgmũg mõy, nõy ta mõg? Kaxĩy.

<sup>34</sup> Ha Yeyox te:

—'Ăte xa hãm'ãktux hãmyũmmũg xe'e'. Tikmũ'ũn 'ũm te hãpkummuk mĩy, ha hãpkummuk mĩy'ax putup xũy'ax te tikmũ'ũn xatpax, ha tikmũ'ũn te nõm te hok hã hãm putuk.

<sup>35</sup> 'A' nõm te hok hã hãm xip ka'ok'ah xuxyã xop kopah, pa' mõg putup. 'A' xip ka'ok'ah. Ha tak-tok xip ka'ok xuxyã xop kopah, tu' mõg putup'ah, yã' xip ka'ok.

<sup>36</sup> Pak mũn Topak-tok te 'ãxop mõy, xa mõg, yã 'ãmõg putup xe'e', tu nõm te hok hã hãm putuk

putup 'ohnāg, ha hāpkummuk mīy'ax te 'āxop xat putup 'ohnāg.

<sup>37</sup> 'Āte' yūmmūg 'āxop yā mōnāyxop 'Amanām yōg xupepmā xop. Pa 'āxop tep-tup, nūy 'ūkputex. 'Āxop te yōgnū hāmyūmmūg pa 'ohnāg, hup-tup, nūy 'ūkputex.

<sup>38</sup> Yōgnu 'ātak te 'ā' mūg hāpxop punethok, ha 'āte xa nōm 'āktux, pa 'āxop te' mīy 'ōgnū 'ātak yōg xat'ax. Kaxīy.

<sup>39</sup> Ha tikmū'ūn te:

—Yōgnū 'ātak yā 'Amanām. Kaxīy.

Ha Yeyox te:

Paxpu 'āxop yā 'Amanām yōg xop, nūy ta hāpxopmā yā 'Amanām putuk.

<sup>40</sup> Topa te 'ā hām'āktux, ha 'āte xa nōm 'āktux, yā hāpxop nōy 'āktux 'ohnāg. Pa 'āxop tep-tup, nūy 'ūkputex, yā 'a 'Amanām putuk'ah.

<sup>41</sup> 'Āxop te hāpxopmā 'ōgnū 'ātak putuk. Kaxīy.

Ha tikmū'ūn te:

—Topa mūn yā 'ūgmū yōg 'ātak, yā Topap-xehnāg, yāg mūg yā Topak-tok xe'e, yā 'ap 'āmūn putuk'ah. Kaxīy.

<sup>42</sup> Ha Yeyox te:

—Paxpu Topa yā 'ōgnū 'ātak, nūy ta 'āxop putup-pax 'ūgmūn. Hamūn, 'āte Topa tuk nūn, tu nūktuk xupep nūnteh. 'A 'āte nū yāy kutnā'ah, pa yā Topa te'.

<sup>43</sup> Teptu 'āxop te' yūmmūg 'ohnāg yōgnū hām'āktux. 'Ok 'āxop te nōā' tot 'ohnāg yōgnū hām'āktux?

<sup>44</sup> 'Āxop yā Hāmgāyāgnāg kutok, tu 'āxop te' mīy 'ōgnū 'ātak te nōm putup. Yā hām xexka

yōg hāmyāxatamuk tox hā Hāmgāyāgnāg te' kix-pax. Tutep-tup nōg hok'ah hāmyūmmūg'ax xe'e, yā Hāmgāyāgnāg 'ūyok 'ohnāg, tu' koitpax, yā Hāmgāyāgnāg te kaxīy, tu' koitpax, yā koit'ax xohix xexka mīy. Koit'ax yā Hāmgāyāgnāg kutok.

<sup>45</sup> 'Āte xa hāpxe'e 'āktux, yā' koit 'ohnāg, pa 'āxop kuxa mām 'ohnāg yōgnū hāmyūmmūg'ax kopah.

<sup>46</sup> Pi'yā 'āxop kopa te' xuktux'ax 'āte hāpkummuk mīy? Yā tik te nōm 'āktux 'ohnāg, 'Āte hāpxe'e 'āktux. Teptu 'āxop tek kopa 'ākuxa mām 'ohnāg?

<sup>47</sup> Topa yōg tikmū'ūn te Topa yōg hām'āktux'ax 'āpak, tu' yīpkox pip. Pa 'āxop 'a' Topa yōg'ah, hu 'āyīpkox pip 'ohnāg. Kaxīy.

### *Yeyox xix 'Amanām*

<sup>48</sup> Ha Yoneo xexka xop te:

—'Ok 'ūgmū'āte hāpxe'e 'āktux 'āmūn te Xāmānit xop kopa 'āxip, ha' xip yāmīy kummuk 'ākopah? Yā hamūn. Kaxīy.

<sup>49</sup> Ha Yeyox te:

—'Ap xip'ah yāmīy kummuk 'ūgkopah. 'Āte yōgnū 'ātak max 'āktux, ha ta 'āxop tek mūn 'āktux kummuk.

<sup>50</sup> 'A 'āte' xak 'ohnāg, puyīy tikmū'ūn 'ūgmūn 'āktux max. 'Āte' xak 'ohnāg, puyīy tikmū'ūn 'ūgmūn xexka mīy. Yā' nōy puxet tek mūn 'āktux max, tuk xexka mīy, tu' ōg hāpxopmā'ax kopit, tu' xuktux 'āxop kohe', pak mūn yok.

<sup>51</sup> 'Āte hāpxe'e 'āktux. Nōm 'ūm te yōg hām'āktux'ax 'āpak, tu' yīpkox pip, puxix hi xe'ēgnāg mōkuma' mōg, ha' kux 'ohnāg yā xakix xe'e putup 'ohnāg. Kaxīy.

<sup>52</sup> Ha Yoneo xop te:

—'Ūgmũ'āte' yūmmũg nōmhā' 'ūxip yāmīy kummuk 'ākopah. 'Amanām xok, xix tik te Topa pupi hām'āktux xop xakix kamah, pa xate' xuktux, hu: “Nōm 'ūm te yōg hām'āktux'ax 'āpak, tu' yīpkox pip, puxix xakix xe'e putup 'ohnāg.

<sup>53</sup> Yūmũ yōg 'ātak 'Amanām xok. Xate putep mūn 'āktux? 'Ok 'āmūn xexka', pa 'Amanām kutōgnāg? Yā Topa pupi hām'āktux xop xakix kamah. 'Ok xate hāmpē'āpaxex 'āxexkanām? Kaxīy.

<sup>54</sup> Ha Yeyox te:

—Paxpu 'āte yāy max 'āktux, tu yāy xexka mīy, puxix tu' kummuk, yā hām'āktux kummuk. Pa yōgnū 'ātak tek mūn max 'āktux, tuk xexka mīy. Yā yōgnū 'ātak te' mīy. Yōgnū 'ātak yā 'āxop te' xānāhā', hu: “Topa yūmũ yōg”.

<sup>55</sup> Pa 'āxop te nōm yūmmũg 'ohnāg hok'ah, pa 'āte nōm yūmmũg. Paxpu 'āte hām'āktux nōm yūmmũg 'ohnāg, kopxix koit, yā 'āxop putuk. Pa 'āte nōm yūmmũg, tu yōg hām'āktux'ax 'āpak, tuk yīpkox pip.

<sup>56</sup> Hōmā 'ūhittap 'ōg 'ātak 'Amanām kuxa hittup yā tute' yūmmũg 'āte hāpxopmā'ax, tu' yūmmũg, hu' kuxa hittup. Kaxīy.

<sup>57</sup> Ha Yoneo xop te:

—'A 'ōg hāmyāxatamuk te 50'ah. 'Ok xate 'Amanām pēnāhā'? Kaxīy.

<sup>58</sup> Ha Yeyox te:

—'Āte xa hāpxe'e 'āktux. Hōmāg xip ha kunāy tu' xip 'Amanām. 'Ūg xip mōkumakmōg. Kaxīy.

<sup>59</sup> Ha tikmũ'ūn te mīkaxxap pop, nūy nō Yeyox tux, nūy putex, pa Yeyox te yāy xaptop, tu ta' mōg Topa pet xexka kūnāpah.



## 9

*Yeyox xix tik pa hok*

<sup>1</sup> Ta xe hāpkumep Yeyox, pa' xip tihik, tu' pa hok. 'Ūtut te' put, 'Īhā' pa hok, tu yōg hāmyāxatamuk tox hā' pa hok.

<sup>2</sup> Ha ta' pip Yeyox yōg tik xop, tu Yeyox pu' yīkopit, hu:

—Yāyā', tep-te hāpkummuk mīy, yīy tik pa hok, 'Īhā' tut te' put? 'Ok pe tik te hāpkummuk mīy, 'ok pe' tak xi' tut? Kaxīy.

<sup>3</sup> Ha Yeyox te:

—'A' tik te yāy pa hokgā'ah, xi' tak te' pa hokgā'ah, xi' tut te' pa hokgā'ah. Yā tik pa hok, puyīy tikmū'ūn yūmmūg Topa ka'ok xexka te tik pu' mīy putup hāpxop max xe'ēgnāg.

<sup>4</sup> 'Āpu yūmū hām mōkumakmōg. Yā Topa te nūgkutnāhā', 'ū hām. 'Āpu yūmū hām. Hāpxip 'Īhā yūmūg hām putup 'ohnāg, yā 'āmnīy putuk 'Īhā tikmū'ūn hām 'ohnāg.

<sup>5</sup> 'Ūkxip nūnte hām xexka tu', tu 'āte tikmū'ūn pu Topa mūg xix hāmmax mūg. Yā 'āte kuyānām putuk, yā tikmū'ūn pu hāpxop xohix tupmāhā'. Kaxīy.

<sup>6</sup> Ta Yeyox te mō' yīyhep yōn hām tu', tu hām kotīnnāhā', tu putōy mīy, tu putōy hā tik pa mō'nīy,

<sup>7</sup> tu tik pu hām'āktux, hu:

—Mōg, nūy yāy pa pix puxhep Xino'e tu'. Yā kōnāg kox te puxhep xetnāhā'. Kaxīy.

Yā Xino'e te tikmū'ūn yīy'ax hā: “Mōkutnāhā” Kaxīy.

Ha ta' mōg tihik, tu yāy pa pix, tu hāmpēnāhā', tu putpu' nūn, tu nūktu' xupep.

<sup>8</sup> Ha ta' pip tik xape xop xix tikmũ'ũn nŏy. Hŏmã nŏm te tik pĕnãhã', 'ĩhã tik te ta tu hãpxop kax xix tayũmak xak. Ha' xohix te:

—'Ok nŏ'ŏm tihik. 'Ok hŏmã' yũm, tu ta tu' kax, nũy tayũmak pop? Kaxĩy.

<sup>9</sup> Ha' yãg te:

—Hamũn nŏ'ŏm. Kaxĩy.

Ha ta' yãg nŏy te:

—'Ãmhok, yã nŏm putuk. Kaxĩy.

Pa tik te:

—Yãg mũn. Kaxĩy.

<sup>10</sup> Ha tikmũ'ũn te:

—Texĩy xate hãmpĕnãhã nŏmhã'? Tep-te 'ãpa mĩy? Kaxĩy.

<sup>11</sup> Ha tik te

—'Ûxip tihik 'ũxuxet'ax Yeyox, tu putŏy mĩy, tu nŏm mŏg pa nĩy, tuk xat hu: “Mŏg, nũy yãy pa pix puxhep Xino'e tu”. Kaxĩy. Ha tak mŏg, tu yãy pa pix, tu hãpxip 'ohnãg 'ĩhã 'ãte hãmpĕnãhã'. Kaxĩy.

<sup>12</sup> Ha tikmũ'ũn te:

—Pi'yã' xip nŏm tihik? Kaxĩy.

Ha tik te:

—'İntu', 'a 'ãtep yũmmũg'ah. Kaxĩy.

### *Paniye xop te' yĩkopit*

<sup>13</sup> Ha ta tik mŏgãhã tikmũ'ũn te Paniye xop hah.

<sup>14</sup> Yã nit xap, yã Yoneo xop yŏg 'ãmnĩy hãm hok 'ĩhã Yeyox te putŏy mĩy, tu tik pa mĩy.

<sup>15</sup> Ha Paniye xop te xe tik hã' yĩkopit, texĩy hãmpĕnãhã nŏmhã'. Ha tik te:

—Yã tute putŏy hã mŏ 'ũgpa nĩy, ha 'ãte yãy pa pix, hu nŏmhã hãmpĕnãhã'. Kaxĩy.

<sup>16</sup> Ha Paniye yãg xop te:

—Nōm te' nōy pa mīy, 'ap Topa yōg tik'ah. Yā tute 'āmnīy hām hok yōg xat'ax 'āpak 'ohnāg. Kaxīy.

Pa yāg nōy te:

—'Ok tik kummuk te hāpxop ka'ok xe'ēgnāg texīy mīy? 'Āmhok. Kaxīy.

Yā yāg tep-tup nōg Yeyox, ha ta yāg tep-tup, yā nōm putox puxet 'ohnāg.

<sup>17</sup> Ha Paniye xop te xe:

—Tep-te xa 'āpa mīy? Xate putep mūn 'āktux? Texīy nō'ōm tihik? Kaxīy.

Ha tik te xe:

—Yā nōm te Topa pupi hām'āktux xop kopa' xip. Kaxīy.

<sup>18</sup> Ha Yoneo xop yōg xexka xop kuxa mām 'ohnāg. Hōmā tik pa hok, pa hōnhā hāmpēnāhā', pa nōm kuxa mām 'ohnāg, hu' xānāhā tik yōg 'ātak xi' tut,

<sup>19</sup> yīy ta' nūn, tu nūktu' mōxaha'. Ha Yoneo xexka xop te:

—'Ok nūhū 'āk-tok pit? Xate hām'āktux, xate' put, tu ta pa hok. Texīy hōnhā hāmpēnāhā'? Kaxīy.

<sup>20</sup> Ha' tak xi' tut te:

—Hamūn, 'ūgmūg kutok, hak mū'āte' yūmmūg 'ūnāhā', tu ta' pa hok,

<sup>21</sup> pak mū'āte' yūmmūg'ah tu texīy tu hōnhā hāmpēnāhā', tuk mū'āte' yūmmūg'ah, tep-te tu pa mīy. 'Āpu 'ūgmūk-tok yīkopit. Yā' xiptap, tu hāmyūmmūg. Tute xa hām'āktux putup. Kaxīy.

<sup>22</sup> Yā 'ātak te Yoneo xexka xop yīpkutuk xi' tut te', hu kaxīy hām'āktux. Yā Yoneo yōg xexka xop te' xat, pu tikmū'ūn Yoneo xop yōg Topa pet hā mōxa hok nōm te hām'āktux Yeyox yā Kunnix, yā Topa nū nōm kutnāhā'.

23 Yīy ta hām'āktux hã kaxīy 'ātak xi' tut, yã hām'āktux hu: “Yã' xiptap. 'Āpu' yīkopit”. Kaxīy.

24 Ha Yoneo xexka xop te xe' xānāhã tihik, yã' tut te nōm put, tu ta pa hok. Ha ta tik nūn, ha' nōy te:

—'Āpu hām'āktux xeh Topa keppah. 'Āpu koit hok. 'Ūgmũ'āte' yūmmũg 'ūkummuk Yeyox, yã hãpkummuk mīy. Kaxīy.

25 Ha tik te:

—'Āte' yūmmũg'ah 'ok pe tu' max, 'ok pe tu' kummuk nō'ōm, pa 'āte' yūmmũg hōmã 'ūkpa hok, pa hōnhã 'āte hãmpēnāhã'. Kaxīy.

26 Ha: Texīy? Putep mūn mīy? Tep texīy 'āpa mīy? Kaxīy.

27 Ha tik te:

—'Āte xa hām'āktux, pa 'āyīpkox 'ohnãg. Tep texīy 'āxop te xe yīkopit? Kaxīy.

Ha' nōy te:

—'Ok xatep-tup, nūy Yeyox mūtik mōg? Kaxīy.

28 Tuk-te'ex kummuk, tu:

—Yeyox mūtik 'āmōg, pak mūg mōg Mōyyex mūtik.

29 'Ūgmũ'āte' yūmmũg Topa te Mōyyex mūtik hām'āktux, pa nō'ōm, yã hām 'ūm tu' nūn? Yã' yūmmũg'ah. Kaxīy.

30 Ha tik te:

—Texīy 'āxop te' yūmmũg 'ohnãg? 'Āxop te' yūmmũg'ah hām 'ūm tu' nūn, pa tutek pa mīy.

31 Yūmũ'āte' yūmmũg Topa te hãpkummuk mīy'ax xop 'āpak 'ohnãg, pa Topa te' nōy xop 'āpak, yã nōm te Topa 'āpak, tu' yīpkox pip, tu' mīy Topa te nōm putup.

32 Hām xexka yōg hãmyāxatumuk xohix xexka 'ihã tikmũ'ūn te hãpxopmã ka'ok xe'ēgnãg 'ohnãg,

yā nōm putuk 'ohnāg. 'Ok xate' xupak tikmū'ūn te' pa mīy, nōm nāhā, hu ta pa hok? Āmhok.

<sup>33</sup> Paxpu Topa yōg tik 'ohnāg 'ōhōm, puxix hāpxopmā ka'ok xe'ēgnāg 'ohnāg. Kaxīy.

<sup>34</sup> Ha:

—Āmūn, 'ānāhā hāpkummuk mīy'ax mūtik, tu hāpkummuk mīypax. 'Ok xatek mū'ā hāmyūmmūgā'? Āmhok. Kaxīy.

Tu' ta tik putyōn Yoneo xop yōg Topa pet kūnāpah, tu' xat, pu xe mō'nā hok.

### *Pa hok xop putuk*

<sup>35</sup> Yā' putyōn, ha Yeyox te' xupak, tu ta' mōg, nūy tik xax, tu' xipihī', tu:

—'Ok 'ākuxa yūm ka'ok Tikmū'ūn Kutok kopah? Kaxīy.

<sup>36</sup> Ha tik te:

—Yāyā, 'āpu hām'āktux, 'ū'ūm nō'ōm? 'Ūgkuxa yūm putup nōm kopah. Kaxīy.

<sup>37</sup> Ha Yeyox te:

Yāk mūn, 'āte 'āmūtik hām'āktux nōmhā. Kaxīy.

<sup>38</sup> Ha tik te:

—Yāyā, 'ūgkuxa yūm ka'ok 'ākopah. Kaxīy.

Tu' kopaxux hā' xip Yeyox keppah.

<sup>39</sup> Ha Yeyox te:

—'Ūgnūn hām xexka tu', nūy tikmū'ūn yōg hāpxopmā'ax kopit, nūy tikmū'ūn xatat. Tikmū'ūn yāg te hām'āktux, hu: “'Ūgmū'āte Topa yōg hām'āktux yūmmūg kutōgnāg, pak mū'ātep-tup, 'ū hāmyūmmūg”. Kaxīy. Yā nōm te' pa hok xop putuk, pa hāpxip 'ihā hāmpēnāhā'. Ha ta tikmū'ūn yāg nōy te hām'āktux hitop, hu: “'Ūgmū'āte Topa

yōg hām'āktux yūmmūg". Kaxīy. Yā nōm te pa hok xop putuk. Kaxīy.

<sup>40</sup> Ha Paniye xop te' xupak, ha' yāg te' yīkopit, hu:  
—Texīy, 'ok 'ūgmūg pa hok xop putuk? Kaxīy.

<sup>41</sup> Ha Yeyox te:

—'Āxop te hām'āktux Topa yōg hām'āktux yūmmūg kutōgnāg, pap-tup, nūy hāmyūmmūg, nūy ta' pa hok xop putuk, tuk-nāy tu hāmpēnāhā', yā 'āmax Topa keppah. Pa 'āxop te kaxīy 'ohnāg. Yā 'āxop te hitop 'āktux Topa yōg hām'āktux yūmmūg, nūy ta' pa hok xop putuk, tu 'ākummuk Topa keppa mōkuma 'āmōg. Kaxīy.

## 10

### *Kahnēn*

<sup>1</sup> Ta xe tikmū'ūn pu hām'āktux Yeyox te, hu:

—'Āte xa' yūmmūgāp-tup hāpxop, tu hāpxe'e 'āktux putup. 'Ūxip kahnēn yōg hāmpak'ax, ha' xupxet te hāmpak'ax 'ātex, pa hāmpak'ax yīkox hā' xupep 'ohnāg,

<sup>2</sup> pa kahnēn yōg pēnā'ax te hāmpak'ax yīkox hā' xupep,

<sup>3</sup> ha hāmyīkox pēnā'ax te hāpxōn, ha' xupep kahnēn yōg pēnā'ax, tu kahnēn xānāhā', yā xuxet'ax xohix hā' xānāhā kahnēn, ha kahnēn te' xupak, hu' pe' mōg, ha kahnēn yōg pēnā'ax te kahnēn mōgāhā hāptopah,

<sup>4</sup> tu hāptopa' pip, tu' pēnā'ax te māxap tu' mōg, ha kahnēn te' pe' mōg, kahnēn te' yūmmūg pēnā'ax yōg hām'āktux tu',

<sup>5</sup> ha kahnēn te' nōy pe' mōg 'ohnāg. 'Ūnōy te kahnēn xānāhā', pa kahnēn nūpanām, kahnēn te' yūmmūg 'ohnāg 'ūnōy yōg hām'āktux tu'. Kaxīy.

<sup>6</sup> Yeyox te nōm 'āktux, nūy tikmū'ūn pu hāpxop nōy yūmmūgāhā', pa tikmū'ūn te hāmyūmmūg 'ohnāg. Tikmū'ūn te hāmpē'paxex texīy hām'āktux.

*Yeyox te kahnēn yōg pēnā'ax max putuk*

<sup>7</sup> Ta xe hām'āktux Yeyox te, hu:

—'Āte xa hāpxe'e 'āktux. Kahnēn te hāmpak'ax yīkox hā mōxakux hāmpak'ax kopah. Yā' pip'ūkopah, ha' nōy te kahnēn koxyōy 'ohnāg. Hā kaxīy 'āte yōg kuxa mām ka'ok xop pēnāhā', ha' nōy te nōm koxyōy 'ohnāg.

<sup>8</sup> Kahnēn te xupxet 'āpak 'ohnāg. Hā kaxīy yōg kuxa mām ka'ok xop te nōm te koit hā' yūmmūgā xop 'āpak 'ohnāg.

<sup>9</sup> Kahnēn te hāmpak'ax yōg hāmyīkox hā mōxakux hāmpak'ax kopah, tu ta' mōg nōmhā hato'ah kamah, nūy tu xit. 'Ūnōy te kahnēn koxyōy 'ohnāg. Hā kaxīy 'āte yōg kuxa mām xop pēnāhā', ha' nōy te nōm koxyōy 'ohnāg.

<sup>10</sup> Ha ta xupxet nūn, nūy tu xupxet, nūy kahnēn kix, nūy xohix koxyōy. Hā kaxīy 'ūnōy tep-tup, nūy yōg kuxa mām ka'ok xop kix, nūy koxyōy. Pa 'āte yōg kuxa mām ka'ok xop pēnā max, ha' kuxa mām, tu' hittup, yā' kuxa hittup xexkah.

<sup>11</sup> —Ta 'āte kahnēn pēnā'ax max putuk kamah. Kahnēn pēnā'ax max te kahnēn pupi tu xok, yā' āte tikmū'ūn pupik xok putup.

<sup>12</sup> Ha ta' xip kāmānat. Xuxyā te nōm pu pago, pu tu kahnēn pēnā', pa 'ap kahnēn yōg pēnā'ax xe'e'ah, yā kāmānat, yā 'ūyōg'ah kahnēn. Ta kokexkata

nūn, ha ta mōxupaha kāmānat, yīy ta kokexkata te kahnēn pop, ha kahnēn xohix nūpānām.

<sup>13</sup> Kāmānat mōxupaha'. Hamūn, tayūmak tu' hām, tu kahnēn putuppax 'ohnāg.

<sup>14-15</sup> Pa 'āte kahnēn yōg pēnā'ax max putuk. Yōgnū 'ātak tek yūmmūg, ha 'āte yāy yōg 'ātak yūmmūg. 'Āte yāy yōg kuxa mām xop yūmmūg, ha yōg kuxa mām ka'ok xop tek yūmmūg, ha 'āte mō nōm yāyxe'ēgnāg, hu nōm pupik xok putup.

<sup>16</sup> —Ha ta kahnēn nōy xohix pip hāmpak'ax kūnāpah. Hā kaxīy tikmū'ūn panip xop kuxa mām ka'ok putup 'ūgkopah. Nōm tek mūn 'āpak putup, ha' kuxa mām ka'ok xop nōy mōxakux putup, ha xohix kuxap-xet, tup-tox puxet, ha 'āte xohix xexka pēnāp-tup.

<sup>17</sup> —'Āte' tux hok, pu tikmū'ūn 'ūkputex, puxix tikmū'ūn 'ūkputex, ha putpuk hip-tup. Hā kaxīy 'ātak Topa tek mōyāy xe'ēgnāg.

<sup>18</sup> 'Āte tux hok, pu tikmū'ūn 'ūkputex hok, puxix tikmū'ūn 'ūkputex hok. 'Ātep-tup, puxix tikmū'ūn 'ūkputex. Topa te' xat, ha 'ātep-tup, kopxik xok putup, tu putpuk hip-tup. Kaxīy.

<sup>19</sup> Tikmū'ūn te' xupak Yeyox yōg hām'āktux, tu yāy yōg hāmpē'paxex'ax te yāy putuk 'ohnāg.

<sup>20</sup> Tikmū'ūn punethok te:

—Yā' xip yāmīy kummuk Yeyox kopah! 'Ūp-tox kummuk! Teptu 'āxop te nōm 'āpak? Kaxīy.

<sup>21</sup> Ha ta tikmū'ūn nōy te:

—Tik te hām'āktux max hā kaxīy 'ohnāg nōm kopa' xip yāmīy kummuk. Texīy tute tik pa hok pu' pa mīy? Kaxīy.



*Yoneo xop te Yeyox putup nōg*

<sup>22</sup> Ha ta' xip 'āmuk xexkah kōmēn Yenoyanēn tu', yā Topa pet xexka yōg 'āmuk xexkah. Yā hōmā 'ūhittap tikmū'ūn te xe' mīy Topa pet xexka', tu nō 'āmuk xexka mīy. Yā hām'āxīynāg.

<sup>23</sup> Ha ta' hāpkumep Yeyox te Topa pet xexka kux kaxax kaka', yā kux kaxax 'āxet'ax Xanomām Yōg Kux Kaxax.

<sup>24</sup> Ha ta' nūn Yoneo xop, tu nūktu Yeyox xakot, tu:  
—Āmnīy xohix texīy hāg mū'āte' hip'ax, nūy hāmyūmmūg? 'Āpu hāpxe'e 'āktux. 'Ok 'āmūn yā Kunnix, Topa te nōm yāyikutnāhā'? Kaxīy.

<sup>25</sup> Ha Yeyox te:

—Hōmā 'āte xa hām'āktux, pa 'ākuxa mām 'ohnāg 'ūgkopah. 'Āte hāpxopmā max yōgnū 'ātak te nōm putup, ha 'āxop te' pēnāhā', tu nōm hāg yūmmūg'ax.

<sup>26</sup> Pa 'āxop tep-tup 'ohnāg, nūy 'ākuxa mām, 'a 'āxop te yōgnū kahnēn putuk'ah tu', yā yōgnū kuxa mām ka'ok xop putuk'ah.

<sup>27</sup> Āte yāy yōg kuxa mām ka'ok xop xānāhā', ha nōm tek 'āpak, tu' yīpkox pip. 'Āte nōm yūmmūg, ha nōm tek pe' mōg, yā kahnēn putuk, yā kahnēn te kahnēn pēnā'ax pe' mōg putuk.

<sup>28</sup> Yā yōg kuxa mām ka'ok xop, ha' nōy te nōm pop putup'ah. 'Āte yāy yōg xop hīnnāhā', ha' pip hāmyāxatamuk xohix kux 'ohnāg hā Topa yīka', yā' xakix xexkap-tup'ah.

<sup>29</sup> Yōgnū 'ātak 'ā kuxa mām xop popmāhā'. Ha yōgnū 'ātak 'ūxexkanām. 'Ūkuxa mām xop yā yōgnū 'ātak yōg, ha' nōy te nōm pop putup'ah.

<sup>30</sup> Yōgnū 'ātak 'ūxexka xik mūn yā yāy putuk. Kaxīy.

<sup>31</sup> Ha Yoneo xop te mīkaxxap pop, nūy Yeyox tux, nūy putex.

<sup>32</sup> Ha Yeyox te:

—'Āte hāpxopmā max punethok 'āxop kopah. Yā yōgnū 'ātak te' xat, 'ū mīy. Hāpxopmā'ax 'ūm 'ūkummuk, yīy 'āxop tek tux putup mīkaxxap hā? Kaxīy.

<sup>33</sup> Ha Yoneo xop te:

—'Ūgmū'ātep-tup, nūy 'ātux mīkaxxap hā. Yā xate hāpxop kummuk mīy, yā Topa 'āktux kummuk, yā xate' xuktux 'āmūn yā Topah, pa 'āmhok, yā tihik 'āmūn. Kaxīy.

<sup>34</sup> Ha Yeyox te:

—'Ūkax'āmi 'ōg xat'ax yōg tappet tu', hu: “'Āxop te Topa putuk”. Kaxīy.

<sup>35</sup> Tu xe:

—Topa te nōm pu' hōm yāy yōg hām'āktux, tu nōm xānāhā', hu: “Topa putuk xop”. Kaxīy. Yā' kax'āmi Topa yōg tappet tu nō'ōm, ha Topa yōg tappet te' koit 'ohnāg.

<sup>36</sup> Ha Topa tek mūn yāy kutnāhā', tu nūgkutnāhā nūnte hām xexka tu', ha 'āte' hām'āktux 'ūgmūn yā Topak-tok. Texīy 'āxop tek mūn 'āktux kummuk?

<sup>37</sup> Paxpu 'āte yōgnū 'ātak pu hāpxopmā 'ohnāg, ha ta 'āpu 'ākuxa mām hok.

<sup>38</sup> Pa 'āte yōgnū 'ātak pu hāpxopmāhā'. 'Āxop tek kopa 'ākuxa mām 'ohnāg, pa 'āpu 'ākuxa mām yōg hāpxopmā'ax kopah, yā yōg hāpxopmā'ax ka'ok xe'ēgnāg kopah, nūy yūmmūg xe'e yōgnū 'ātak xip 'ūgmūtik, xik xip yōgnū 'ātak mūtik. Kaxīy.

<sup>39</sup> Ha Yoneo xop te xonat xat, pu Yeyox mūy, pa Yeyox te tikmū'ūn kopa' xip, tu' mōg,

<sup>40</sup> tu mōktu kōnāg kox Yohnām xak putpuk, tu mōktu' xupep Yoām yōg xip'ax tu', yā hōmā Yoām te tikmū'ūn putox pix nōnteh, ha Yeyox te' nox xip.

<sup>41</sup> Ha ta' nūn tikmū'ūn punethok, tu nūktu Yeyox tu' mōxaha', tu hām'āktux, hu:

—Yoām te hāpxopmā ka'ok xe'ēgnāg 'ohnāg, pa Yoām te Yeyox 'āktux, ha hām'āktux xohix 'ūxe'e', yā' koit 'ohnāg. Kaxīy.

<sup>42</sup> Ha ta tikmū'ūn punethok kuxa mām ka'ok Yeyox kopah.

## 11

### *Nay xok*

<sup>1</sup> Ha ta' xip tihik 'āxet'ax Nay, yā' xip xiptuxexka Metān tu', tu' pakut. Ha ta kama' tihi' Metān tu Mānix xi' tutnōy, yā Mā'at.

<sup>2</sup> Yā hōmā Mānix te hep haxnāg max pux, yā' takat, tu Yeyox pata yīmū' pux, tu' xe hā' pata nagāhā', yā Mānix te Yeyox putuppax. Manix taknōy yā Nay pakut.

<sup>3</sup> Mānix te' nōy mō'kutnāhā xix Mā'at te', puyīy Yeyox xānā', hu:

—Yāyā, yā 'āxape 'ūpakut. Xate nōm mō'yāy xe'ēgnāg. Kaxīy.

<sup>4</sup> Ha Yeyox te:

—Yā' pakut, pa' pakut, puyīy tikmū'ūn pēnā' Topa te hāpxopmā ka'ok xe'ēgnāg. Tikmū'ūn te' pēnāp-tup yā' max xe'ēgnāg Topa xix Topak-tok. Kaxīy.

<sup>5</sup> Yeyox te mō'yāy xe'ēgnāg Mā'at xi' tutnōy xix Nay.

<sup>6</sup> Nay pakut, ha Yeyox te' xupak, tuk-nāy tu' nox xip 'āmnīy tix hã, yã' mōg'ah Nay hah.

<sup>7</sup> Ũnōg 'āmnīy tix, ha Yeyox te yāy yōg tik te 12 xop pu hãm'āktux, hu:

—Āpu yūmū mōg hāpxexka Yonex tu'. Kaxīy.

<sup>8</sup> Ha Yeyox yōg tik xop te:

—Yāyã, hōmã hāpxip kutōgnãg 'ĩhã Yoneo xop tep-tup, nūy mīkaxxap hã 'āp-tex 'ōnteh. 'Ok xatep-tup, nūy putpu mōg. 'Āmōg hok!

<sup>9</sup> Ha Yeyox te:

—Māyōn mōg puxet yōg 'ot xohix te' 12. Tik 'ūm te hāpkumep hāptup hah, hu nāp-tup'ah, yã hāmpēnãhã 'ĩhã' xip kuyãnãm. Kuyãnãm xip 'ĩhã 'āte hāpxopmãhã'.

<sup>10</sup> Pa tik 'ūm te hāpkumep 'āmnīy 'ĩhã, hu' nāp-tup, yã hāpkoxtap. Hāpxip 'ĩhã hāpkoxtap'ax, 'ĩhã 'āte hāpxopmã 'ohnãg. Kaxīy.

<sup>11</sup> Tu xe:

—Yūmūg xape Nay te mō'yōn, pak mōg putup, nūy tuhuk. Kaxīy.

<sup>12</sup> Ha Yeyox yōg tik xop te:

—Yāyã, mō'yōn, puyã xip, 'ūhittup putup. Kaxīy.

<sup>13</sup> Pa Yeyox te xok'ax 'āktux, yã' xok, pa Yeyox yōg tik xop te hāmpē'paxex, Yeyox te mō'yōn'ax 'āktux.

<sup>14</sup> Yīy Yeyox te hãm'āktux ka'ok, hu:

—Nay 'ūxok.

<sup>15</sup> 'Ak xip'ah Nay mūtik, 'ĩhã' xok, pak kuxa hit-tup, yã 'āte 'āxop kuxa māmmap-tup. Āpu yūmū mōg Nay hah. Kaxīy.

<sup>16</sup> Ha Tōmē', yã' xuxet'ax nōy te 'Ūktonnix, yã Tōmē te:

—'Āpu yūmū mōg yāyā mūtik, nūy xakix nūmūtik. Kaxīy.

*Yeyox te tikmū'ūn hīnnāhā'*

<sup>17</sup> Ha ta' mōg Yeyox, tu' xupak tikmū'ūn te hām'āktux hōmā 'āmnīy te' 4 'ihā Nay hāpkot.

<sup>18</sup> Xiptuxexka Metān xix kōmēn Yenoyanēn yōg kinōm te' 3 kōmnāg.

<sup>19</sup> Yīy ta' mōg Yoneo xohix, nūy Mā'at kuxa hit-tupmā' xix Manix kuxa hittupmā', yā' taknōy xok, ha' potaha'.

<sup>20</sup> Ūnūn Yeyox, ha Mā'at te' xupak, tu ta' mōg, nūy yāy tu xakux, pa Mānix nox xip yāy pet tu'.

<sup>21</sup> Ha ta' mōg Mā'at Yeyox hah, tu mōktu' xupep, tu:

—Yāyā, pax xa xip nūnteh, puxix 'ūktaknōy xok 'ohnāg.

<sup>22</sup> Pa 'āte' yūmmūg, xate Topa tu' xak hāpxop 'ūm nōmhā, puxix xa hāpxopmā'. Kaxīy.

<sup>23</sup> Ha Yeyox te:

—'Ātaknōy te putpu' hip-tup. Kaxīy.

<sup>24</sup> Ha Mā'at te:

—'Āte' yūmmūg, hāmyāxatamuk xohix xox putox 'ihā putpu' hip-tup. Kaxīy.

<sup>25</sup> Ha Yeyox te:

—'Āte tikmū'ūn putpu' hīnnāhā', tu hi'ax hōm, yā hām'hīnnā'ax xip 'ūgkopah. Tikmū'ūn 'ūm kuxa mām 'ūgkopah, hu' hip-tup. Tikmū'ūn xakix, puxix tu hip-tup.

<sup>26</sup> Ha tikmū'ūn 'ūm pip, tu' kuxa mām ka'ok 'ūgkopah, puxix tu xok xexka putup 'ohnāg. 'Ok 'ākuxa mām nū' hām'āktux kopah? Kaxīy.

<sup>27</sup> Ha Mā'at te:

—Yāyā, hamūn, 'ūgkuxa yūm. 'Āte' yūmmūg, 'āmūn yā Kunnix, yā Topak-tok, tu 'ānūn nūnte hām xexka tu'. Kaxīy.

*Yeyox potaha'*

<sup>28</sup> Tu ta' nūn Mā'at, tu nūktu' xupep, tu' tutnōy Mānix mūtik hām'āktux, yā' tix te yāy mūtik hām'āktux, 'ap nōy xip'ah. Mā'at te:

—Yāyā xip, tu 'āxak. Kaxīy.

<sup>29</sup> Ha Mānix te' xupak, tu ta' mōg mō'ka'ok, nūy Yeyox ha mōg.

<sup>30</sup> Yā Yeyox xupep 'ohnāg xiptuxexka tu', pa' xip nōm xip'ax tu', yā hōmā hām'āktux Mā'at mūtik 'ōnteh.

<sup>31</sup> Ha ta' pip Yoneo xop mīptut kopah, nūy Mānix kuxa hittupmā', tu Mānix pēnāhā'. Yā' yok Mānix, tu ta' mōg mō'ka'ok hāptopah, ha Yoneo xop te hāmpē'paxex Mānix mōg xukpot tu', nūy pohoh.

<sup>32</sup> Ta' mōg Mānix, tu mōktu Yeyox ha' xupep, tu Yeyox pēnāhā', tu hām tu' xip Yeyox pata yīkak, tu:

—Yāyā, pax xa xip nūnte, puxix 'ūktaknōy xok 'ohnāg. Kaxīy.

<sup>33</sup> Mānix potaha', ha Yeyox te pota pēnāhā' xix Yoneo xop pota pēnāhā' nōm nūn Mānix mūtik, tu' kuxa ka' xexkah,

<sup>34</sup> tu:

—Pī'yā 'āxop te nō hāpkot? Kaxīy.

Ha' nōy te:

—Yāyā, mā, nūy pēnā'. Kaxīy.

<sup>35</sup> Ha Yeyox potaha'

<sup>36</sup> Yīy Yoneo xop te:

—'Ūpēnā', Yeyox te Nay mō'yāy xe'ēgnāg xexka'. Kaxīy.

37 Pa' yāg te:

—'Ok tute tik pa hok pu' pa mīy? Hamūn. Paxpu Nay hittupmā, puxix tu xok 'ohnāg. Kaxīy.

*'Ūputpu' hi Nay*

38 Ha' kuxa ka' xexka 'ūxehet Yeyox, tu ta' mōg xukpot tu', ha' xip Nay yōg mīkaxxap kox, ha mīkaxxap te mōhāmnīnyīn mīkaxxap kox.

39 Ha Yeyox te xat, hu:

—'Āpu' xut mīkaxxap. Kaxīy.

Ha Mā'at, yā tik mūktutnōy te:

—Yāyā, 'ūhax kummuk xexka'ax. Yā' xok hōmā 'āmnīy te' 4. Kaxīy.

40 Ha Yeyox te:

—'Ok 'āte xa hām'āktux, 'ākuxa yūm, hu ta' pēnāp-tup Topa te hāpxopmā max xe'ēgnāg mīy putup? Kaxīy.

41 Ha tikmū'ūn te mīkaxxap yōkānāmāhā', ha Yeyox te pepi pēnāhā', tu:

—Yōgnū 'ātak, 'āmax, xate yōg hām'āktux 'āpak.

42 'Āte' yūmmūg, xate yōg hām'āktux 'āpak mōkuma'āmōg. Pa 'āte nū 'āktux, puyīy tikmū'ūn hām'āktux 'āpax, hu' kuxa mām 'ūgmūn kopah, yā xate nūgkutnāhā'. Kaxīy.

43 Ta hāpxip 'īhā Yeyox te' xānā ka'ok, hu:

—Ney, 'āpep, nūy nū'! Kaxīy.

44 Ha ta nōm xok xupep, yā' yīm kīy xix pata', yā xakix xop yōg topixxax kīy'ax hā, xix pa yīn kīy kamah. Ha Yeyox te:

—'Āpu 'ūko'a', nūy xut, pu mōg. Kaxīy.

*Tikmū'ūn tep-tup puyīy xonat Yeyox putex*

45 Yā' pip Yoneo punethok, tu' pēnāhā', hu' kuxa mām ka'ok Yeyox kopah. Yā' nūn, nūy Manix mūtik pip, tu' pēnāhā' Yeyox te Nay putpu' hīnnāhā', hu' kuxa mām ka'ok Yeyox kopah.

46 Ha ta' yāg mōg putpu', nūy Paniye xop pu Yeyox yōg hāpxopmā'ax 'āktux, tu hām'āktux,

47 yīy ta' yāy tu nū'nāhā' Paniye xop xix 'āmānex xexka xop xix tik pa te hāmyūmmūg xop, tu:

—Putep mūn mīy putup yūmū'āte'? Tik te hāpxopmā ka'ok xe'ēgnāg punethok.

48 Yūmū'āte' tux hok, pu mīy hāpxopmā ka'ok xe'ēgnāg hā kaxīy, puxix tikmū'ūn xohix xexka kuxa mām ka'ok putup Yeyox kopah, ha ta' nūn putup Hōm yōg xop, tu yūmū yōg Topa pet koxyōy putup, xix yūmūg xop xohix xexka kix putup. Kaxīy.

49 Pa' xip yāp-xet 'ūxuxet'ax Kaxpax, yā nōm hāmyāxatamuk 'īhā 'āmānex xop xat Kaxpax te', tu:

—'Āxop te hāmyūmmūg 'ohnāg.

50 'Ok 'āxop te hāmpē'āpaxex 'ohnāg? Yā' max, pu tik puxet tikmū'ūn pupi' xok, pa yā' kummuk, pu yūmūg xohix xexka xakix. Kaxīy.

51 Yā Kaxpax te yāy yōg hāmpē'paxex'ax 'āktux 'ohnāg, pa yā nōm hāmyāgxatamuk 'īhā 'āmanex xop xat Kaxpax te', tu Topa pupi' hām'āktux, tu Yeyox xok'ax 'āktux. Yā Yeyox te Yoneo xop pupi' xok putup.

52 Yā Yeyox te Yoneo xop pupi' xok putup, tu' xok putup, nūy yāytunū'xoh nōm nōy kamah, yā hām panip tu' pip hāpxexka xohix tu', yā Topak-tok xop, tu Yoneo xop hā' mīy putup xi' nōy hā', pu tu' pip puxet, yā xop puxet.



<sup>53</sup> Ha ta Yoneo xexka xop te yăy mŭtik hăm'ăktux kŏnămhă nŏmhă texŭy Yeyox putex putup,

<sup>54</sup> yŭy ta Yeyox te yăy xaptop hă hăpkumep hăpxexka Yonex tu', tu hăpxip 'ŭhă' mŏg, tu mŏktu' xupep hăm nak yŭka', tu' nox xip kŏmĕn 'Epayŭy tu' yăy yŏg tik xop mŭtik.

<sup>55</sup> Ha ta hămhŭmnăg Yoneo xop yŏg 'ămuk xexka xuxet'ax Nŏă'yĕn, ha ta' mŏg tikmŭ'ŭn punethok kŏmĕn Yenoyanĕn tu', nŭy yăy pix, nŭy Yoneo yŏg xat'ax mŭy.

<sup>56</sup> Ha ta tikmŭ'ŭn te Yeyox xak kŏmĕn tu', tu yăy mŭtik hăm'ăktux, hu:

—Putep hămpe'ăpaxax, 'ok nŭn putup Yeyox 'ămuk xexka hah? Kaxŭy.

<sup>57</sup> Ha ta' xat 'ămănex xexka xop te' xix Paniye xop te', pu tikmŭ'ŭn 'ŭm Yeyox pĕnă', mă', nŭy nŏm 'ăktux, puyŭy xonat xat, pu Yeyox mŭy.

## 12

### *Yeyox xip xiptuxexka Metăn tu'*

<sup>1</sup> Ta xe 'ămnŭy te' 6 'ŭhă' xip'ax 'ămuk xexka 'ŭxuxet'ax Nŏă'yĕn, ha ta' mŏg Yeyox, tu mŏktu' xupep xiptuxexka Metăn tu', yă Nay pet yŭm Metăn tu', yă hŏmă Yeyox te nŏm putpu' hŭnnăhă'.

<sup>2</sup> Ha ta' puk 'ămuk, tu Mă'at te xit'ax nŭnnăhă', nŭy tikmŭ'ŭn pu' nŭm, ha ta' yŭm Nay mŭmpe xit'ax tu' Yeyox mŭtik,

<sup>3</sup> ha Manix te' paha hep haxnăg max takat xexkah, yă' kit xahix, yă mŭnnut năn hă' mŭy. Manix te nŏm pux Yeyox pata yŭmŭ', tu yăy xe hă' pata nagăhă'. 'Ŭhax măynăg 'ŭhep yŏg, tu hăpxip 'ŭhă mŭptut hă nŭ'xip 'ŭhax max.

<sup>4</sup> Ha ta' xip Yot 'Ixkanot, yā Yeyox yōg tik te 12 xop kopa' xip, yā' gāy xop mōgāp-tup, puyīy Yeyox xūygā'.

<sup>5</sup> Yot te:

—Teptu hep haxnāg nōmenex 'ohnāg, nūy 2 xēmān yōg hām hā' pop tayūmak, nūy hok xop pu tayūmak nīm? Kaxīy.

<sup>6</sup> Yā Yot te hām'āktux te kaxīy, pa hok xop putup-pax 'ohnāg, pa' xupxet putup, yā tute' tat tayūmak Yeyox yōg xix Yeyox yōg tik xop yōg, tu nōm hā tat'ax kopa yāy pu tayūmak mōypax.

<sup>7</sup> Ha Yeyox te:

—Pu yā xip 'ūhūn. Hām'āktux kummuk hok. Tute hep tat, nūy 'ūgyīn muk, yā 'ūkxok putup.

<sup>8</sup> 'Ūhok xop pip ka'ok mōkuma'mōg 'āxop kopah, pa noxk xip ka'ok 'ohnāg 'āxop kopah. Kaxīy.

*'Ūxexka xop tep-tup, nūy Nay putex*

<sup>9</sup> Ha ta tikmū'ūn xohix xexka te' xupak hato'a Yeyox xip xiptuxexka Metān tu', tu ta' mōg, nūy Yeyox pēnā' xix Nay pēnā', yā putpu' hi'.

<sup>10</sup> Yīy ta 'āmānex xexka xop te yāy mūtik hām'āktux texīy yīp-tex Nay kamah.

<sup>11</sup> Yā Yeyox te Nay putpu' hīnnāhā', ha Yoneo punethok te' pēnāhā', tu' xupak, hu yāy yōg xexka xop nīm, nūy kuxa mām Yeyox kopah, yīy ta' xexka xop tep-tup nūy Nay putex.

*Yeyox te kōmēn Yenoyanēn ha mō'nāhā'*

<sup>12</sup> Hāptup ha ta' pip tikmū'ūn 'āmuk xexka tu' 'āxet'ax Nōā'yēn, tu' xupak Yeyox nūn kōmēn Yenoyanēn tu'.

<sup>13</sup> Ha tikmū'ūn xohix te' pop patxap kup māg, tu ta' mōg Yeyox hah, tu' mōg, tu hām'āktux ka'ok hu:

—'Ūmax xe'ēgnāg Topah. Topa, 'āpu nōm pu hāmmaxnā' xate nū nōm kutnāhā', yā tute 'Iyaet xop xat. Topa, 'āpu nōm pu hāmmaxnā'. Kaxīy.

<sup>14</sup> Ha Yeyox te' paha yomēn kutok, tu nōm yīmū' yūm. Yā Topa yōg tappet te:

<sup>15</sup> “Kōmēn Xiām yōg tikmū'ūn, 'āpu 'ākuxa nōg hok. 'Ūnūn 'ōg tik xexkah, yā yomēn kutok yīmū' yūm”. Kaxīy.

<sup>16</sup> Ha Yeyox yōg tik xop te nōm kax'āmi xutigā 'ohnāg, pa Yeyox mōg putup pepi pexkox tu', 'ihā' yūmmūg putup Topa yōg tappet yōg hām'āktux xix tikmū'ūn te hāpxopmā yūmmūg putup kamah.

<sup>17</sup> Yā tikmū'ūn te' pēnāhā Yeyox te Nay xānāhā mīkaxxap kox kopah, tu putpu' hīnnāhā', ha tikmū'ūn te' xape xohix pu nōm 'āktux.

<sup>18</sup> Ha' nōy te' xupak Yeyox te hāpxopmā ka'ok xe'ēgnāg, hu ta' mōg Yeyox hah.

<sup>19</sup> Yīy ta yāy mūtuk hām'āktux Paniye xop te', hu: —Pēnā'. Tikmū'ūn tek mūg 'āpak 'ohnāg, pa tikmū'ūn xohix xexka te Yeyox pe' mōg. Kaxīy.

*Genex yōg xop mōg, nūy Yeyox pēnā'*

<sup>20</sup> Yā' pip tikmū'ūn xohix Yenoyanēn tu 'āmuk xexka tu', tu Topa pu nūktettex, ha nōm xop kopa' xip hāpxexka Genex yōg xop,

<sup>21</sup> tu' nūn, tu nūktu Pinip ha' mōxaha', tu:

—Yāyā, 'ūgmū'ātep-tup, nūy Yeyox pēnā'. Kaxīy.

Yā Pinip yōg kōmēn yā Metxax, yā hāpxexka Ganinet kopa' xip.

<sup>22</sup> Tu ta' mōg Pinip, tu mōktu 'Ānene pu' xuktux nō'ōm, ha ta' mōg tik tix, tu mōktu Yeyox pu' xuktux nō'ōm,

<sup>23</sup> ha Yeyox te:

—'Ūgmūn yā Tikmū'ūn Kutok. Hāpxip kutōgnāg 'īhāg xok putup, hak-nāy tu Topa te 'ūkxexka mīy putup, ha tikmū'ūn xohix tek mūn 'āktux max putup.

<sup>24</sup> Tikmū'ūn te hāpxop xap xok. Yāk-tōgnāg hāpxopxap, pa hāpxip 'īhā yāyhā kup, tu mīnta ta xohix popmāhā', yā' max xe'ēgnāg. Hā kaxīy putuk 'ūgmūn. 'Ūkxok putup, pa putpuk hip-tup, ha nōmhā' max xe'ēgnāg.

<sup>25</sup> Hā kaxīy kama tikmū'ūn. Tikmū'ūn te yāy yōg putup'ax mīy 'ohnāg, puxi' pop putup hāpxop max xe'ēgnāg, yā Topa yīka' pip putup hāmyāxatamuk xohix kux 'ohnāg hā. Ha ta' nōy te yāy yōg putup'ax mīy, puxi' pop putup'ah hāpxop max xe'ēgnāg, yā Topa yīka' pip putup'ah hāmyāxatamuk xohix kux 'ohnāg hā.

<sup>26</sup> Yōgnū kāmānat te yāy putup'ax mīy'ah, pa' mīy 'āte nōm putup, tuk pe' mōg putup, nūy 'ūgmūtik pip, ha Topa te nōm xexka mīy putup. Kaxīy.

*Yeyox te hām'āktux 'ūxok putup*

<sup>27</sup> Tū Yeyox te xe:

—Hōnhā 'īhāg kuxa hittup 'ohnāg. 'Āte putep 'āktux putup? 'Ok 'āte hām'āktux putup, hu: “Yōgnū 'ātak, 'āpu 'ūkxūy xut”. Kaxīy. 'Āmhok, 'āte nōm 'āktux putup'ah. Pak nūn, nūy tu xok.

<sup>28</sup> 'Ātak, 'āpu 'āxexka nōy nā mōg tikmū'ūn xop kopah! Kaxīy.

Ha ta' hām'āktux Topa pexkox tu', hu:

—'Āte yāy xexka mīy nōy nāg mōg tikmū'ūn xop kopah, tu xe' mīy putup. Kaxīy.

<sup>29</sup> Ha tikmū'ūn te' xupak, tu hām'āktux, hu:

—Yā tex tīnnāhā'. Kaxīy.

Pa' nōy te:

—Yā peḡkox yōg nū'pok xop te hām'āktux. Kaḡīy.

<sup>30</sup> Pa Yeyox te:

—Topa te hām'āktux, xayīy 'āxop xupax. Kaḡīy.

<sup>31</sup> Hāpxip kutōgnāg, 'ihā Topa te hep yāy koxuk xop yōg hāpxopmā'ax kopit putup, nūy yōg hāpkummuk mīy'ax hā' yānān. Hāpxip kutōgnāg 'ihā Topa te' pu'ugāp-tup nōm te Topap-tup 'ohnāg xop xat.

<sup>32</sup> Āte mīpkupnix yīmūg xup putup, tu yāy pu' pop putup tikmū'ūn xohix hāpxexka xohix tu'. Kaḡīy.

<sup>33</sup> Yā Yeyox te hām'āktux hā kaḡīy, hu tikmū'ūn pu hāmyūmmūgāhā te kaḡīy xok putup.

<sup>34</sup> Ha tikmū'ūn te:

—Pak mū'āte' mōkupix xat'ax yōg tappet tu Kun-nix xip'ax hāmyāxatamuk xohix kux 'ohnāg hā, pa xate hām'āktux Tikmū'ūn Kutok xup putup mīpkupnix yīmū', tu' xok putup. 'Ū'ūm Tikmū'ūn Kutok? Kaḡīy.

<sup>35</sup> Ha Yeyox te:

—Hāpxip kutognāg hāg xip'ax nūnteh. 'Āpu 'ūg 'āpax, nūy hāmyūmmūg, 'ihāg xip nūnteh. Yā 'āte kuyānām putuk. 'Ūkxip, ha tikmū'ūn te hāmyūmmūg. Kuyānām xip, ha tikmū'ūn te hāmpēnāhā'.

<sup>36</sup> Āpu 'ākuxa mām ka'ok 'ūgkopah, 'ihāg xip, nūy hāmyūmmūg. Kaḡīy.

*Yoneo xop kuxa mām 'ohnāg Yeyox kopah*

Yeyox te hām'āktux kux, tu ta' mōg, tu yāy xap-top,

<sup>37</sup> tu hăpxopmă ka'ok xe'ëgnăg punethok, ha tikmũ'ũn te' pēnăhă', pa' kuxa măm 'ohnăg Yeyox kopah.

<sup>38</sup> Yă hōmă 'ũhittap 'Iyait te Topa pupi hăm'ăktux, yă hōnhă putuk hăpxopmă'ax. 'Iyait te: “Topah, 'ũ'ũm kuxa măm yũmũ yōg hăm'ăktux kopah? Yă' kuxa măm 'ohnăg. Tep-te' yũmmũg, yă Topa te hăpxopmă ka'ok xe'ëgnăg? Yă' yũmmũg 'ohnăg”. Kaxĩy.

<sup>39</sup> Hă kaxĩy 'ũkuxa măm yũmmũg 'ohnăg. Hamũn, 'Iyait te:

<sup>40</sup> “Topa te tikmũ'ũn pa te hămyũmmũg 'ohnăg mĩy, tu tikmũ'ũn putox ka'ok mĩy, puyĩy tikmũ'ũn pa hămyũmmũg 'ohnăg, puyĩy tikmũ'ũn hămyũmmũg hok, puyĩy tikmũ'ũn hăpkummuk mĩy kux hok, puyĩy Topa tikmũ'ũn kuxa kummuk xit hok.” Kaxĩy.

<sup>41</sup> 'Iyait te hăm'ăktux, tute' yũmmũg Yeyox 'ũmax xe'ëgnăg tu', hu Yeyox 'ăktux.

<sup>42</sup> Pa Yoneo xexka xohix xop kuxa măm Yeyox kopah, pa nōm te Paniye xop yĩpkutuk, hu hăm'ăktux xaptop, puyĩy Paniye xop xat hok, pu Yoneo xop yōg Topa pet hă mōxakux hok.

<sup>43</sup> Yă' xexka xop tep-tup punethok, pu tikmũ'ũn nōm 'ăktux max, pap-tup kutōgnăg, pu Topa nōm 'ăktux max.

*Yeyox yōg hăm'ăktux'ax te tikmũ'ũn yōg hăpxopmă'ax kopit*

<sup>44</sup> Ha ta xe hăm'ăktux Yeyox, hu:

–Tikmũ'ũn 'ũm kuxa măm 'ũgkopah, yă' kuxa măm kama nōm kopah, nōm te nũgkutnăhă'.

45 Tikmũ'ũn 'ũm tek pēnāhā', yā nōm pēnāhā kamah, nōm te nūgkutnāhā'.

46 'Ūgnũn hām xexka tu', tuk mũn, yā hām xexka yōg tikmũ'ũn yōg kuyānām putuk, yā' kuxa mām 'ūgkopa xop kuxa te hāpkoxtap kopa' pip 'ohnāg.

47 Tikmũ'ũn 'ũm te yōgnũ hām'āktux 'āpak, pa' yīpkox 'ohnāg, koxix yōg hāpxopmā'ax kopit putup'ah. Yā 'ūgnũn hām xexka tu', nūy tikmũ'ũn kuxa kummuk xit, tu' kuxa max mō'tat, 'ūyānān tu', nūy yōg hāpkummuk mī'ax hā yānān hok.

48 Tikmũ'ũn 'ũm tek putup nōg, xix yōg hām'āktux putup nōg, puxix Topa hām'āktux putup, hu: "Yā' kummuk nō'ōm. Nōm te Yeyox yōg hām'āktux 'āpak 'ohnāg. Kaxīy Topa te hām'āktux putup hāmyāxatamuk xohix xox putox 'ihā'.

49 Hamũn 'āte yāp-xehnāg hā hām'āktux 'ohnāg, pa yōgnũ 'ātak te nūgkutnāhā', tu 'ā' hōm hām'āktux'ax, 'ūyīy tikmũ'ũn pu nōm 'āktux.

50 Ha 'āte' yūmmūg Topa yōg xat'ax te tikmũ'ũn mōgāhā', puyīy hi xe'ēgnāg mōkuma' mōg, ha' kux 'ohnāg. Yōgnũ 'ātak te 'ā' hōm hām'āktux'ax, 'ūyīy tikmũ'ũn pu nōm 'āktux.

## 13

### *Yeyox te yāy yōg tik xop pata pix*

1 Hāmhūmnāg, yā 'āmnīy puxet 'ihā' xip'ax 'āmuk xexka 'ūxuxet'ax Nōā'yēn 'ihā Yeyox te' yūmmūg, hāpxip 'ihā hām xexka nīm putup, nūy yāy 'ātak ha mōg. Tute mō'yāy xe'ēgnāg yāy yōg kuxa mām xop, tu mō'yāy xe'ēgnāg kux 'ohnāg.

2 Ta' xit Yeyox yāy yōg tik te 12 xop mūtik. Hōmā Hāmgāyāgnāg te Yot 'Ixkanot mōgāhā', pu

hāmp'e'paxex texīy gāy xōp mōgāp-tup Yeyox hah, puyīy' xūygā'.

<sup>3</sup> Ha Yeyox te' yūmmūg yāy yōg 'ātak te tu' popmāhā 'ūxohix xexkah, puyīy nōm xat. Yeyox te' yūmmug Topa tu' nūn, tu Topa ha' mōg putup putpu'.

<sup>4</sup> Yeyox yūm mīmpe xit'ax tu', tu tak-nīhā' xip, tu topixxax xut 'ūyīmū nō'ōm, tu topixxax yāy nagā'ax paha', tu nō yāy kunāy hīy,

<sup>5</sup> tu' pux kōnā'āg pa pix'ax kopah, tu yāy yōg tik xop pata pix kōnāmāhā', tu topixxax yāy nagā'ax hā nagāhā' nōm tek-nāy hīy hā,

<sup>6</sup> tu' xupep Xīmām Pet yīkak, pa Pet te:

—Yāyā, 'āmhok. 'Ok 'ūkpata pix putup? Kaxīy.

<sup>7</sup> Ha Yeyox te:

—Hōnhā xate' yūmmūg'ah 'āte hāpxopmāhā', pa hāpxip 'īha' yūmmūg putup xate'. Kaxīy.

<sup>8</sup> Ha Pet te:

—Xatek pata pix putup 'ohnāg. 'Āmhok!

Pa Yeyox te:

Paxpu 'āpata pix 'ohnāg, ha ta 'āmūn yā yōg'ah. Yā 'āxip'ah yōg tik xop kopah. Kaxīy.

<sup>9</sup> Ha Xīmām Pet te:

—Yāyā, 'āpu 'ūkpata pix, xik yīm xik putox! Kaxīy.

<sup>10</sup> Ha Yeyox te:

—Tikmū'ūn te tatxok, hu' xexka tup. 'A xe tatxok putup'ah, pa' pata pix putup 'ūxeheh. 'Āxop xohix kuxa tup, pa yāp-xet 'āmhok, yā' xutputux.

<sup>11</sup> Hamūn, Yeyox te' yūmmūg nōm te' gāy xop mōgāp-tup Yeyox hah, puyīy xūygā'. Hā kaxīy hām'āktux hu: “Āxop xohix kuxa tup, pa yāp-xet, 'āmhok, yā' xutputux”. Kaxīy.



12 Yeyox te' pata pix kux, tu topixxax mō'tat putpu', tu ta' mōg yāy yōg xip'ax tu' mīmpe tu' xit'ax tu', tu:

—'Ok 'āxop te' yūmmūg teptu 'āte 'āpata pix?

13 'Āxop tek xānāhā, hu: “Notot”, Kaxīy, xix: “Yāyā”. Kaxīy. Hamūn, yāg mūn.

14 'Āte 'āxop xat, tu 'āte 'āxop pu hāmyūmmūgāhā', tu 'āpata pix kamah. Yā 'ūkxexka', pa 'āpata pix, yīy ta 'āxop te' nōy pata pix, pu' max. Yā 'āte 'āxop hāg teheh. 'Āpu tikmū'ūn hā 'ātehet.

15 'Āte hāpxopmā', xayīy 'āxop pēnā', nūy mīy kamah.

16 'Āte xa hāpxe'e 'āktux nōm te' xat yā' xexka', pa kāmānat yāk-tōgnāg. Nōm te mō nōy kutnāhā' yā' xexka', pa nōm mōg yāk-tōgnāg. 'Ūkxexka', pa yā kāmānat putuk. Yā 'āte 'āpata pix, yā kāmānat putuk. 'Āte 'āxop hāg teheh. 'Āpu kāmānat putuk kamah, nūy tikmū'ūn hā 'ātehet.

17 'Āxop te' yūmmūg nōm hāpxop xe'e nōmhā. 'Āxop te' mīy, nūy ta 'ākuxa hittup.

18 —'Āte 'āxop xohix xexka 'āktux 'ohnāg, tu tap-xet 'āktux. 'Āte yāy yōg yīmōgātux xop yūmmūg. Pa Topa yōg tappet te: “Tik xit 'ūgmūtik, tu 'ā tu' gāy”. Kaxīy. Ta hōnhā' gāy.

19 'Āte nōm 'āktux hōnhā. Hāpxip 'Thā 'āxop te nōm hāpxopmā'ax pēnāp-tup. 'Āte nōm 'āktux hōnhā, xayīy 'ākuxa mām putup, tu' yūmmūg putup 'ūg'āxet'ax 'ūgmūn yāg mūn. Kaxīy.

20 'Āte xa hāpxe'e 'āktux. 'Āte mō'pok tihik, ha ta xohix 'ūm te nōm putuppax yāg putuppax putuk.

Ha nôm tek putuppax te Topap-tuppax kamah, yâ  
Topa te mōgkutnâhã 'ũgmũn.

*Yot te' gây xop mōgâp-tup*

<sup>21</sup> Yeyox te hãm'âktux kux, tu' kuxa hittup 'ohnãg  
tu hãm'âktux, hu:

—'Âte xa hâpxe'e 'âktux, yâ' xip 'ũp-xet 'ãxop  
kopah, tu nôm te' gây xop mōgâp-tup 'ũg hah, puyîy  
'ũgxũygã'. Kaxîy.

<sup>22</sup> Ha Yeyox yōg tik xop te yây pênâhã', tu' kuxa  
te' yëy. Putep 'âktux?

<sup>23</sup> Ha ta' xip tihik Yeyox yōg tik xop kopah. Yâ  
Yeyox te mō nôm yây xe'ëgnãg, ha' yũm Yeyox yîkak,

<sup>24</sup> ha Ximãm Pet te nôm pu' yîm mahap, tu:

—'Ăpu 'ũyîykopit, putep xuktux. Kaxîy.

<sup>25</sup> Ha nôm mōg Yeyox yîkãgnãg, tu:

—Yâyã, 'ũ'ũm nō'ôm? Kaxîy.

<sup>26</sup> Ha Yeyox te:

—'Âte pãm mō'tat putup hep kopah, tu pãm hōm  
putup nôm tik pu'. Hamũn nō'ôm. Kaxîy.

Tu pãm paha', tu mō'tat hep kopah, tu Yot pu'  
hōm, yâ Ximãm 'Ixkanot kutok.

<sup>27</sup> Ha Yot te pãm paha', tu hâpxip 'ohnãg 'îhã  
Hãmgâyãgnãg te Yot hã mō'nâhã', ha Yot te  
Hãmgâyãgnãg 'ăpak. Ha Yeyox te:

—Xatep-tup, nũy hâpxopmã'. 'Ăpu 'ũmîy mō'ka'ok.  
Kaxîy.

<sup>28</sup> Pa xohix te mîmpe xit'ax tu' mãm, tu' yũmmũg  
'ohnãg, putep xuktux Yeyox Yot pu'.

<sup>29</sup> Yâ Yot te Yeyox yōg tik xop yōg tãyũmak tat'ax  
pênâhã', ha yãg te hãmpe'paxex Yeyox te Yot xat,  
pu mōg, nũy pãm pop 'ãmuk xexka pu', ha ta yãg

te hāmpē'paxex Yeyox te' xat, pu mōg, nūy tayūmak  
popmā 'ūhok xop pu'.

<sup>30</sup> Yot te pām paha', tu ta' mōg hāptopah. Yā 'āmnīy.

*'Ūxat'ax tup*

<sup>31</sup> Ha Yeyox te:

—Hōmā tikmū'ūn te' pēnāhā', 'ūmax xe'ēgnāg  
Tikmū'ūn Kutok. Tikmū'ūn tek yūmmūg, hu'  
yūmmūg Topa 'ūmax xe'ēgnāg.

<sup>32</sup> Tikmū'ūn tek yūmmūg, hu' yūmmūg Topa  
'ūmax xe'ēgnāg, yīy ta Topa te tikmū'ūn puk mūn  
mūg 'ūgmax xe'ēgnāg. Hāpxip kutōgnāg 'īhā Topa te  
nōm mīy putup.

<sup>33</sup> 'Ūkxape xop, hāpxip kutōgnāg hak xip kux'ax  
'āxop kopah. 'Āxop tek xak'ax, pa 'āxop tek mōg'ax  
yūmmūg 'ohnāg. Yā hōmā 'āte Yoneo xop pu nōm  
'āktux.

<sup>34</sup> 'Āte xa' hōm xat'ax tup, hu:

—'Āpu 'ānōy putuppax, 'āte 'āxop putuppax  
putuk.

<sup>35</sup> 'Āxop te 'ānōy putuppax, puxix tikmū'ūn xohix  
yūmmūg 'āxop pīp yōg tik xop kopah. Kaxīy.

*Yeyox te Pet mūtik hām'āktux*

<sup>36</sup> Ha Ximām Pet te:

—Yāyā, piyā 'āmōg? Kaxīy.

Ha Yeyox te

—'Ūkpe 'āmog yūmmūg 'ohnāg, pa hāpxip 'īhāg pe  
'āmōg putup. Kaxīy.

<sup>37</sup> Ha Pet te

—Texīy 'āpek mōg yūmmūg 'ohnāg hōnhā? 'Āte xa  
tuk xok putup. Kaxīy.

<sup>38</sup> Ha Yeyox te:

—Ok xate 'ã tu 'ãxok putup? 'Ãmhok. 'Ãte xa hãpxe'e 'ãktux, xate hãm'ãktux tikoyuk putup, hu: "Ãkxip'ah 'ũgmũn Yeyox yõg tik xop kopah". Kaxĩy. Hak-nãy tu xokakkak pit xatap-tup. Kaxĩy.

## 14

*Yeyox te tikmũ'ũn mõgãhã yãy tak hah*

<sup>1</sup> Ta Yeyox te:

'Ãkuxa nõg hok. 'Ãpu 'ãkuxa mãhãm Topa kopah. 'Ãpu 'ãkuxa mãhãm 'ũgkopah kamah.

<sup>2</sup> Yõgnũ 'ãtak pet kopa' pip pip'ax punethok. 'ũgmõg putup, nũy 'ãpip'ax max mĩy. Paxpu te kaxĩy 'ohnãg, kopxix xa' xuktux 'ohnãg nũhũ'.

<sup>3</sup> 'ũgmõg putup, tu' max mĩy putup 'ãpip'ax, tu putpuk nũn putup, tu 'ãxop mõgãp-tup, xayĩy pip 'ãpip'ax tu 'ũgmũtik.

<sup>4</sup> 'Ãxop te' yũmmũg putahat nõ' mõg 'ũkxip'ax tu'. Kaxĩy.

<sup>5</sup> Ha Tõmẽ te:

—Yãyã, 'ũgmũ'ãte' yũmmũg'ah. Piyã' yũm 'ãxip'ax? Texĩy 'ũgmũ'ãte' yũmmũg putahat? Kaxĩy.

<sup>6</sup> Ha Yeyox te:

'Ãte putat putuk, tu putat mõg yõgnũ 'ãtak hah. Hã kaxĩy 'ãte tikmũ'ũn mõgãhã yãy tak hah. 'Ap xip'ah putat nõy. 'Ãte tikmũ'ũn pu hãpxe'e yũmmũgãhã', tu tikmũ'ũn hĩnnãhã', puyĩy hi max, ha' kux 'ohnãg.

<sup>7</sup> 'Ãxop te' yũmmũg, tu yõgnũ 'ãtak yũmmũg putup kamah. Hamũn, 'ãxop te' yũmmũg yõgnũ 'ãtak. Kaxĩy.

<sup>8</sup> Ha Pinip te:

—Yāyā, 'āpu 'ūgmū'ā 'ōg 'ātak mūg. 'Ūgmū'āte xa tuk kax putup'ah hāpxop nōy. Kaxīy.

<sup>9</sup> Ha Yeyox te:

—'Āmnīy xohix hāg xip 'āxop mūtik. Pinip, 'ok xatek yūmmūg 'ohnāg? Tikmū'ūn 'ūm tek pēnāhā', hu yōg 'ātak pēnāhā kamah. Teptu xate' xuktux, hu: “'Āpu 'ūgmū'ā 'ōg 'ātak mūg”? Kaxīy.

<sup>10</sup> Pinip, 'ok 'ākuxa yūm 'ohnāg, 'ūkxip yōgnū 'ātak mūtik, ha yōgnū 'ātak xip 'ūgmūtik, tu yā kuxap-xet. 'Āte xa hām'āktux, 'a yōg'ah hām'āktux. Pa yōgnū 'ātak xip 'ūgmūtik, tu hāpxopmā max xe'ēgnāg.

<sup>11</sup> 'Āpu 'ākuxa mām nū hām'āktux kopah. Yā 'ūkxip yōg 'ātak mūtik, ha yōg 'ātak xip 'ūgmūtik, tu yā kuxap-xet. Pa yōg hām'āktux kopa 'ākuxa mām 'ohnāg, pa 'āpu 'ākuxa mām yōg hāpxopmā'ax kopah.

<sup>12</sup> 'Āte xa hāpxe'e 'āktux, tikmū'ūn 'ūm kuxa mām 'ūgkopah, yā nōm te hāpxopmā ka'ok xe'ēgnāg mīy putup, 'ūgmūn putuk. Yā 'āte hāpxopmā ka'ok xe'ēgnāg mīy, pa nōm te hāpxopmā ka'ok xe'ēgnāg punethok mīy putup, yōgnū 'ātak hak mōg putup hah.

<sup>13</sup> 'Āxop te Topa tu' xak hāpxop 'ūm, tu 'ākuxa mām 'ūgkopah, kopxix xa' popmāp-tup nōm hāpxop xohix. Topa te 'ā' popmāp-tup, ha 'āte xa nōm popmāp-tup. Hā kaxīy 'āxop te Topa max xe'ēgnāg yūmmūg putup.

<sup>14</sup> 'Āxop te 'ā tu' xak hāpxop 'ūm, kopxix nōm mīy putup. Kaxīy.

*Topa te Topa Koxuk hōm putup*

<sup>15</sup> Tu Yeyox te xe:

—'Āxop tek putuppax, nūy ta mīy putup 'āte nōm xat.

16 'Āte Topa tu' xak, ha tute xa Topa Koxuk hōm putup nōm te 'āxop hā' tep-tup, tute xa nōm hōm putup. Yāg mūn putuk, yā Topa Koxuk, yā hāpxe'e yōg, ha tute 'āxop mūtik nox xip'ax mōkuma'mōg hāmyāxatamuk xohix kux 'ohnāg hā.

17 Ha ta' kuxa mām 'ohnāg xop te Topa Koxuk pa yūmmūg 'ohnāg. Topa Koxuk pēnā 'ohnāg tu'. Pa 'āxop te Topa Koxuk yūmmūg, yā' xip 'āxop mūtik hah. Kaxīy.

18 Tu xe:

—'Āte 'āxop nīm tāmnāg putup'ah, yā 'āxop te' hok pip xop putuk putup'ah. 'Āte 'āxop nīm putup, tuk mōg putup, pak nūn putup putpuk 'ā hah.

19 Hāpxip 'īhā' kuxa mām 'ohnāg xop tek pēnāp-tup'ah, pa 'āxop tek pēnāp-tup, tu 'āxop pip putup, 'ūkxip putup hah.

20 Nōm 'āmnīy 'īhā 'āxop te' yūmmūg putup 'ūkxip yōgnū 'ātak mūtik, ha 'āxop pip 'ūgmūtik, yā kuxap-xet, hak xip 'āxop mūtik.

21 —Tikmū'ūn 'ūm te yōgnū xat'ax pop, tu nōm mīy, yā tutek putuppax, ha yōgnū 'ātak te nōm putuppax putup, nōm tek putuppax, ha 'āte nōm putuppax putup kamah, tu yāy mūg putup 'ōm pu'.

22 Yot xip, yā 'a' Yot 'Ixkanot'ah, pa' nōy, yā Yot te:

—Yāyā, texīy xate 'ūgmū'ā yāy mūg, pa' kuxa mām 'ohnāg xop pu yāy mūg 'ohnāg? Kaxīy.

23 Ha Yeyox te:

—Tikmū'ūn 'ūm tek putuppax, yā nōm te yōgnū hām'āktux pap-tup, tu' mīy putup, ha yōgnū 'ātak te nōm putuppax, tu' nūn putup, tu nūktu nōm ha' xupep, tu' xip putup nūmūtik.

24 Tikmũ'ũn 'ũm tek putup nōg, puxix yōgnũ hām'aktux 'āpak 'ohnāg, yā' yīpkox 'ohnāg. 'Āxop te hām'aktux 'āpak. 'A' yōg'ah hām'aktux, pa yōg 'ātak yōg. Tute nūgkutnāhā 'ūgmũn.

25 —'Āte xa nōm hāpxop 'aktux nōmhā, tuk xip 'āxop mūtik nōmhā.

26 Yōgnũ 'ātak te Topa Koxuk nũ'kutnāp-tup, ha tute 'āxop hā' tep-tup, yā 'āte 'āxop hāg teheh putuk, 'īhā 'ākuxa mām 'ūgkopah. Topa Koxuk tek mũn pupi' xip putup. Tute xa hāpxop xohix yūmmūgāp-tup, tu 'āxop pu xutīgāhā yōgnũ hām'aktux xohix:

27 —'Āte 'ākuxa māmāhā'. 'Ūgkuxa yūm ka'ok, ha 'āte 'ākuxa māmāhā', 'ūkputuk. 'Āte hām xexka yōg kummuk xop kuxa māmā 'ohnāg. 'Āpu 'ūyīpkutuk hok. 'Āpu 'ākuxa nōg hok.

28 'Āxop te' xupak, yā 'āte xa' xuktux hu: “'Ūgmōg putup, pa 'āhak nūn putup putpu'. 'Āxop tek putup-pax, nūy ta 'ākuxa hittup, yāg mōg putup yāy yōg 'ātak hah. 'Ūkxexka, pa nōm xexka nām.

29 Hōnhā 'āte xa hām'aktux hāptup yōg hāpxopmā'ax. Hāpxip 'īhā 'āxop te nōm pēnāp-tup, tu 'ākuxa mām putup 'ūgkopah.

30 'Āte xe hām'aktux kutīgnāg, yā Topa hā puknōg xop yōg xat'ax nūn hōnhā. Nōm tek xat 'ohnāg,

31 pa' max, pu tikmũ'ũn xohix yūmmūg 'āte yōgnũ 'ātak putuppax, nūy mīy tute nōm xohix xat. 'Āpu yūmū mōg. Kaxīy.

## 15

*Yeyox te tox kup kūnīy putuk*

<sup>1</sup> Ta Yeyox te:

—'Āte xa' yūmmũgāp-tup hāpxop. 'Āte tox kup kũnĩy xe'e putuk, yā mĩnta 'op yōg, ha ta yōgnũ 'ātak te tox pēnā'ax putuk.

<sup>2</sup> 'Ūgkopa kuxa mām xop te tox māg max putuk xix tox yīpkup max. 'Ūgkopa kuxa mām xop te hāpxopmā max, ha nōm te mĩnta ta pōpmā putuk. Ha tak kopa kuxa mām hok xop te tox māg kummuk putuk xix tox yīpkup kummuk. 'Ūgkopa kuxa mām hok xop te hāpxopmā max'ah, tu mĩnta ta popmā 'ohnāg putuk. 'Ūkuxa mām xop kuxa mām 'ūgkopah. Hā kaxīy tox māg te tox kup xahix tu' pip xix tox yīpkup te'. Yōgnũ 'ātak tep-tup'ah kuxa mām hok xop. Hā kaxīy tox pēnā'ax te mīm māg kummuk mep, tu' putyōn xix yīpkup kummuk. 'Ūkuxa mām hok xop te' kuxa mām xop nīm, ha' max nōmhā. Hā kaxīy tox māg kummuk pip'ah xix tox yīpkup kummuk pip'ah, ha ta tox yīpkup max te mĩnta ta punethok popmāhā nōmhā.

<sup>3</sup> Hōmā 'ākuxa mām yōgnũ hām'āktux kopah, ha yōgnũ 'ātak te 'ākuxa kummuk xit.

<sup>4</sup> 'Āpu 'ā tu pip ka'ok, ha 'āte 'āxop tuk xip ka'ok putup. 'Āxop 'ā tu 'āpip ka'ok 'ohnāg, nūy ta hāpxopmā max 'ohnāg, tu 'āxop te' mīy 'ohnāg putup Topa te nōm putup. Hā kaxīy tox māg te tox kup xahix tu' pip'ah xix tox yīpkup, puxix mĩnta ta popmā hok.

<sup>5</sup> —'Āte tox kup xahix putuk, ha 'āxop te tox māg putuk xix tox yīpkup. 'Āxop te 'ā tu 'āpip ka'ok, nūy 'ākuxa mām ka'ok 'ūgkopah, tu 'āxop tuk xip ka'ok, nūy hāpxopmā max xohix 'āxop mūtik, ha ta 'āxop hāpxopmā max punethok, nūy mīy Topa te



nōm putup. Pa 'āxop te 'ā tu 'āpip ka'ok'ah, nūy ta hāpxopmā max hok, tu' mīy 'ohnāg Topa te nōm putup. Hā kaxīy tox kup xahix xix tox māg xix tox yīpkup.

<sup>6</sup> Tox pēnā'ax te' putyōn tox māg kummuk xohix xix tox yīpkup kummuk xohix, ha' nak, ha tikmū'ūn te nōm yāy tu nū'xok, tu kuxap kopa mō'pok, ha' puk. Hā kaxīy putuk 'ūkuxa mām hok xop, yā 'ātu' pip ka'ok 'ohnāg.

<sup>7</sup> 'Āxop nox pip 'ā tu', ha yōgnū hām'āktux te' nox xip 'āxop tu', 'īhā 'ā tu' xak xate nōm putup, ha 'āte xa' popmāp-tup 'ūxohix.

<sup>8</sup> 'Āxop te hāpxopmā max punethok, yīy tikmū'ūn te' pēnāp-tup, yā' max xe'ēgnāg Topah. Hā kaxīy kama tikmū'ūn te' pēnāp-tup 'āxop mōg Yeyox mūtik, yā mīnta max punethok putuk.

<sup>9</sup> 'Āte mō 'āxop yāy xe'ēgnāg, yā yōgnū 'ātak te mōg mūn yāy xe'ēgnāg putuk. 'Āpu nox pi 'ūgmūtik, 'ūyīy mō 'āxop yāy xe'ēgnāg.

<sup>10</sup> 'Āxop te' mīy 'āte nōm xat, nūy ta nox 'āpip putup 'ūgmūtik, ha 'āte mō 'āxop yāy xe'ēgnāg putup. Yā 'āte' mīy yōg 'ātak te nōm xat. Hā kaxīy putuk 'āxop xik mūn.

<sup>11</sup> —'Āte xa nōm hāpxop 'āktux, nūy 'ākuxa hit-tupmā', ha 'ākuxa hittup xexka'.

<sup>12</sup> 'Āte 'āxop xat, hu: 'Āpu 'ānōy putuppax 'āte 'āxop putuppax putuk.

<sup>13</sup> Tikmū'ūn te yāy xape pupi' xok, puxix yāy xapep-tuppax xexkanām. Yā tikmū'ūn xohix te yāy xape pupi' xakix 'ohnāg.

<sup>14</sup> 'Āxop te yōgnū xat'ax mīy, 'īhā 'ūkxape 'āxop.

15 'Āte 'āxānā kux, hu: “Yōgnū kāmānat xop”. Kaxīy. Yā kāmānat xop te' yūmmūg 'ohnāg 'ūxat'ax xop yōg hāpxopmā'ax. Pa 'āte 'āxop xānāhā, hu: “'Ūkxape xop”. Kaxīy. 'Āte 'āxop pu' xuktux yōg 'ātak te nōm 'āktux.

16 'Āxop tek mūn yāykutnā 'ohnāg, pa 'āte 'āxop mūn yīmōgātux, tu mō 'āxop pok, xayīy hāpxopmā max punethok, yā mīnta ta punethok putuk. 'Āxop te hāpxopmā max putup, ha tikmū'ūn te nōm pēnāp-tup, hu' kuxa mām ka'ok putup, tu 'ā tu nox pip ka'ok putup. Ha 'āxop te yōg 'ātak tu' xak hāpxop 'ūm, tu 'ākuxa mām 'ūgkopah, ha tute xa' popmāp-tup hāpxop xohix.

17 'Āte 'āxop xat, 'āpu 'ānōy putuppax. Kaxīy.

### *Tikmū'ūn te' kute'ex kummuk putup Yeyox yōg xop*

18 Tu Yeyox te xe:

—'Ūkuxa mām hok xop te 'āxop putup nōg. 'Āpu hāmyūmmūg, nōm tek putup nōg hāmāxap.

19 Paxpu 'āxop kuxa mām hok xop kopa pip, nūy nūmūtik mōg, puxix 'āxop putuppax, yā yāy yōg xop putuppax. Pa 'āxop pip'ah nōm xop kopah. Pa 'āte 'āxop yāykutnāhā kuxa mām hok xop kopah. 'Āmūn 'ap kuxa mām hok xop'ah. Hā kaxīy nōm te 'āxop putup nōg.

20 Hōmā 'āte xa hām'āktux. 'Āpu hām'āktux'ax xaxok hok. 'Ūxat'ax xop yā' xexka', pa kāmānat xop yāg-tōgnāg. Tikmū'ūn tek kute'ex kummuk, puxix 'āxop kute'ex kummuk putup kamah. Tikmū'ūn te yōgnū hām'āktux 'āpak, tu' yīpkox pip, puxix 'ōg hām'āktux 'āpak putup kamah, tu' yīpkox pip.

21 Tikmũ'ũn te 'ãxop kute'ex kummuk te kaxĩy, 'ãxop yõgnũ hah. Yã nõm te' yũmmũg 'ohnãg Topah. Tute nũgkutnãhã'.

22 Paxpuk nũn 'ohnãg, puxix tikmũ'ũn yãy hãpkummuk mĩy'ax yũmmũg 'ohnãg. Pak nũn, tu tikmũ'ũn pu hãmyũmmũgãhã'. Nõmhã tikmũ'ũn te' yũmmũg yãy yõg hãpkummuk mĩy'ax.

23 Tikmũ'ũn tek putup nõg, xix yõg 'ãtak putup nõg kamah.

24 Æte hãpxopmã ka'ok xe'ẽgnãg tikmũ'ũn kopah, yĩy tikmũ'ũn te' pẽnãhã', tu yãy yõg hãpkummuk mĩy'ax yũmmũg, hu' yãyhãhup. Tik nõy te hãpxopmã ka'ok xe'ẽgnãg 'ohnãg, 'ak putuk'ah. Pa tikmũ'ũn te' pẽnãhã 'ãte hãpxopmã max, tuk putupnõg xix yõg 'ãtak putup nõg kamah.

25 Hõmã 'ũhittap Topa yõg tappet te: "Tikmũ'ũn tek putup nõg, pa 'ãte hãpkummuk mĩy 'ohnãg". Kaxĩy. Hamũn, hõnhã tikmũ'ũn te kaxĩy putuk, yã Topa yõg tappet te' koit 'ohnãg.

26 –Ta Topa Koxuk te xa hã' tep-tup, yã' xe'e Topa Koxuk. Hõnhã' xip yõgnũ 'ãtak mũtik, ha 'ãte xa nõm nũ'kutnãp-tup, ha tutek mũn 'ãktux putup.

27 Ha 'ãxop tek mũn 'ãktux putup kamah, yã 'ãxop pip 'ũgmũtik hãmyãxatumuk xohix hã nũnte hãm xexka tu'.

## 16

1 Ta Yeyox te xe:

–Æte xa' xuktux hãpxop xohix, xayĩy putat max xak hok.

2 Tikmũ'ũn te 'ãxop xat putup, xa mõxa hok Yoneo yõg Topa pet hã. Hãpxip 'ĩhã tikmũ'ũn te

'ăxop kix putup, ha 'ăxop xakix putup, ha tikmũ'ũn te hămpel'paxex putup Topa pu' hăm.

<sup>3</sup> Yă tikmũ'ũn te' mĩy putup yōgnũ 'ătak kopa' kuxa măm 'ohnăg tu', xik mũn kopa' kuxa măm 'ohnăg tu'.

<sup>4</sup> Pa 'ăte xa hăm'ăktux tikmũ'ũn te 'ăxop kum-mugăp-tup. Hăpxip ha ta tikmũ'ũn te 'ăxop kum-mugăp-tup, ha 'ăxop te' xuktux putup, hu: “Yă hamũn Yeyox te nôm 'ăktux hōmă. Yă hōnhă te kaxĩy”. Kaxĩy.

*Topa Koxuk te hăpxopmăp-tup*

Ta Yeyox te xe:

—Hōmă 'ăte xa nôm 'ăktux 'ohnăg, yăk xip 'ăxop kopah.

<sup>5</sup> Pa hăpxip 'ihăg mōg putup, yă nôm hak mōg putup, nôm te nũgkutnăhă', pa 'ăxop te' yĩkopit 'ohnăg, hu: “Tep hah?” Kaxĩy.

<sup>6</sup> Pa hōnhă 'ăte xa nôm 'ăktux, ha 'ăkuxa hittup 'ohnăg.

<sup>7</sup> Pa 'ăte xa hăpxe'e 'ăktux, yă' max noxk xip nũnteh, pa' max xe'ėgnăg 'ũgmōg. Paxpuk mōg 'ohnăg, puxix Topa Koxuk nũn putup'ah, nũy 'ăxop hă tu tehet. Pak mōg, kopxix nũ nôm kutnăp-tup 'ăxop hah.

<sup>8</sup> Ha ta' nũn putup Topa Koxuk, tu nũktu tikmũ'ũn pu hăm yũmmũgă', hu: “Tikmũ'ũn te hăpkummuk mĩy, tu tikmũ'ũn te hăm yok yũmmũg 'ohnăg, ha Topa te tikmũ'ũn yōg hăpkummuk mĩy'ax hă yănăn putup, tu nôm xũygăp-tup.” Kaxĩy.

<sup>9</sup> Topa Koxuk te hăm'ăktux putup, hu: “Tikmũ'ũn te hăpkummuk mĩy. Yă Yeyox kopa' kuxa măm 'ohnăg.” Kaxĩy.

10 Yāy yōg 'ātak hak mōg putup, ha ta Topa Koxuk nūn putup, tu nūktu tikmū'ūn pu hāmyok yūmmūgāp-tup, tu' xuktux putup, hu: “Yā' yok Yeyox”. Kaxīy.

11 Topa Koxuk te hām'āktux putup, Topa te tikmū'ūn yōg hāpkummuk mīy'ax hā yānān putup, tu nōm xūygāp-tup. Hamūn, Topa te' kuxa mām hok xop yōg xat'ax yānān, pu tu' kux, tu nōm xūygāhā', pu tu' kux.

12 –'Ūpip yōgnū hām'āktux nōy punethok. 'Āxop pu nōm yūmmūgāhā', pu' max, pa hōnhā 'āxop te hamyūmmūgā'ax xohix hā tot 'ohnāg.

13 Pa hāpxip 'īhā' nūn putup Topa Koxuk, tu xa hāmyok yūmmūgāp-tup. Tute 'āxop mōgāp-tup putat max hā, yā xa' yūmmūgāp-tup hāmyok xohix xexkah. Tute yāy yōg hām'āktux 'āktux putup'ah, pa hām'āpak 'āktux putup, tu xa nōm 'āktux putup, tu hāptup yōg hāpxopmā'ax 'āktux putup.

14 Āte tu' popmāp-tup hām'āktux, ha tute xa nōm 'āktux putup. Hā kaxīy xate' yūmmūg putup 'ūgmax xe'ēgnāg.

15 Yōgnū 'ātak yōg hāpxopmā'ax xohix xexka yā yōgnū kamah. Hā kaxīy 'āte xa hām'āktux Topa Koxuk te' pop putup yōg hāpxop, tu xa nōm yūmmūgāp-tup. Kaxīy.

*'Ūkuxa hittup 'ohnāg, tu' kuxa hittup*

16 Ta Yeyox te xe:

–Hāpxip kutōgnāg yīy ta 'āxop tek pēnāp-tup'ah, tu xe hāpxip kutōgnāg yīy ta xek pēnāp-tup. Kaxīy.

17 Ha Yeyox yōg tik yāg xop te:

–Teptu hām'āktux? 'Ūxuktux, hu: “Hāpxip kutōgnāg yīy ta 'āxop tek pēnāp-tup'ah, tu xe hāpxip

kutōgnāg yīy ta xek pēnāp-tup”. Kaxīy. Texīy hām'āktux? 'Ūxuktux, hu: “Hamūn, yōgnū 'ātak hak mōg putup”. Kaxīy.

<sup>18</sup> Teptu 'ūxuktux, hu: “Hāpxip kutōgnāg”? Kaxīy. 'Īntu', putep mūn 'āktux? Yūmū'āte' yūmmūg'ah. Kaxīy.

<sup>19</sup> Nōm tep-tup, nūy Yeyox yīkopit, ha Yeyox te' yūmmūg, tu:

—Hāpxip kutōgnāg yīy ta 'āxop tek pēnāp-tup'ah, tu xe hāpxip kutōgnāg yīy ta xek pēnāp-tup. 'Ok kaxīy 'āxop te yāy yīkopit?

<sup>20</sup> 'Āte xa hāpxe'e 'āktux. 'Āte 'āxop mūtik tip-tup'ah, ha 'āxop potap-tup, tu 'ākuxa hittup 'ohnāg putup, pa' kuxa mām hok xop kuxa hittup'ax. 'Ākuxa hittup 'ohnāg putup, pa hāpxip 'īhā 'ākuxa hittup putup.

<sup>21</sup> 'Āte xa' yūmmūgāp-tup hāpxop. Yā 'ūn tek-tok put putuk, yāk-tok put putup, ha' xūy. Pak-tok xip, ha ta' xūy xaxok, tu' hittup, 'ūk-tok pit xip hah, yā' xip 'ūk-tok pit nōy hām xexka tu'.

<sup>22</sup> Yā 'āxop putuk. Hōnhā 'ākuxa hittup 'ohnāg, pa hāpxip 'īhā 'āxop hak nūn putup putpuk, ha 'ākuxa hittup putup, ha tikmū'ūn te 'ākuxa hittup'ax nōā' yūmmūg putup'ah.

<sup>23</sup> —Hāpxip 'īhā 'āxop tek mūn tu' xak putup hāpxop 'ohnāg, pa 'āte xa' xuktux 'āxop te yōgnū 'ātak mūn tu' xak putup hāpxop, tu 'ākuxa mām 'ūgkopah, ha tute xa' popmāp-tup hāpxop xohix.

<sup>24</sup> Hōmā tu yā hōnhā 'āxop te Topa tu' xak 'ohnāg hāpxop, tu 'ākuxa mām 'ūgkopah. 'Āpu ta tu' xax, xayīy 'ākuxa hittup xexkanām.

*Yeyox te' kuxa mām hok xop pop*

<sup>25</sup> Āte xa hāmyūmmūgāhā, tu' xuktux tikmū'ūn te tox māg putuk xix kahnēn putuk. Hōnhā 'āte hām'āktux hā kaxīy. Pa hāpxip 'īhā kaxīy'ah, pa xa yāy 'ātak yūmmūgāp-tup mō'ka'ok.

<sup>26</sup> Āmnīy xupep 'īhā yōgnū 'ātak tu' xak putup hāpxop 'āxop te', tu 'ākuxa mām 'ūgkopah, ha 'āte xa hām'āktux'ah 'āte yāy yōg 'ātak tu' xak, pu xa' hōm hāpxop.

<sup>27</sup> Hamūn, yōgnū 'ātak te mō 'āxop yāy xe'ēgnāg, 'āxop tek putuppax hah, xix 'ākuxa mām hah. Yā 'ākuxa mām, tu' yūmmūg 'āte Topa tuk nūn.

<sup>28</sup> Hamūn, 'āte Topa tuk nūn, tu nūktuk xupep nūnte hām xexka tu', pa hōmāg mōg putup, yā hām xexka nīm putup, nūy yāy yōg 'ātak ha mōg putpu'. Kaxīy.

<sup>29</sup> Ha Yeyox yōg tik xop te:

—Nōmhā xate hām'āktux mō'ka'ok, 'ap xate hām'āktux nōy hā yūmmūgā 'ohnāg.

<sup>30</sup> Ūgmū'āte' yūmmūg xate' yūmmūg hāpxop xohix xexka'. 'A xatep-tup'ah tikmū'ūn te xa hāmyūmmūgāhā'. Yā xate' yūmmūg tikmū'ūn yōg hāmpē'paxex'ax xohix xexkah. Nōmhāg mū'āte' yūmmūg Topa tu 'ānūn. Kaxīy.

<sup>31</sup> Ha Yeyox te:

—'Ok 'ākuxa mām hōnhā.

<sup>32</sup> Hāpxip kutōgnāg 'īhā 'āxop te hāpxumā'ax yāy pet tu', koxix puxet hā xip putup. Pa 'a 'ūkpuxet xip'ah, pa yāy yōg 'ātak xip putup 'ūgmūtik.

<sup>33</sup> Āte xa nōm 'āktux, xayīy 'ākuxa mām, yā 'ākuxa mām ka'ok 'ūgkopah. 'Ūkuxa mām hok xop te

'āxũygāp-tup, pa 'ākuxa nōg hok, yā 'āte' kuxa mām hok xop pop, yā 'āte' xut. Kaxĩy.

## 17

### *Yeyox te Topa pu hām'āktux*

<sup>1</sup> Ta hām'āktux kux Yeyox, tu pepi' pēnāhā pekkox tu', tu Topa pu hām'āktux, hu:

—Tak, 'āmnĩy nō'ōm xupep xate nōm 'āktux. 'Āpu 'ũgxexka xe'ēgnāg mĩy, puyĩy tikmũ'ũn pēnā 'ũgmax xe'ēgnāg. Yā tikmũ'ũn te' yũmmũg putup kama 'āxexka xe'ēgnāg xix 'āmax xe'ēgnāg.

<sup>2</sup> Xatek mũn mĩy 'ũkxexka', yā tikmũ'ũn xohix yōg xexka', tu tikmũ'ũn xohix hĩnnāhā', hā hi xe'ēgnāg mōkuma'mōg, ha' kux 'ohnāg. Xate 'ā' popmāhā 'ũxohix, ha' kuxa mām 'ũgkopah. Yā 'āte nōm hĩnnāhā', ha' kux 'ohnāg.

<sup>3</sup> Texĩy tikmũ'ũn hi xe'ēgnāg mōkuma'mōg, ha' kux 'ohnāg? Yā tikmũ'ũn te 'āyũmmũg, yā Topa yũmmũg. 'Ap xip'ah Topa xe'e nōy. Texĩy tikmũ'ũn hi xe'ēgnāg mōkuma'mōg, ha' kux 'ohnāg? Yā tikmũ'ũn tek mũn yũmmũg. Xate nũgkutnāhā'.

<sup>4</sup> 'Āte tikmũ'ũn pu 'āmax xe'ēgnāg yũmmũgāhā'. 'Āte hāpxopmā kux xate 'ā nōm xax.

<sup>5</sup> Tak, 'ũkxip putup nōnteh 'āmũtik. 'Āpu 'ā' hōm hāpxop max xe'ēgnāg nōnteh, yā 'ũkxexka mĩy. Hōmā 'ũhittap 'a hām xexka xip'ah, hak max xe'ēgnāg xix xexka'. 'Āpu 'ām popmā 'ũxeheh nō'ōm.

<sup>6</sup> —Xate tikmũ'ũn yĩmōgātux hām xexka yōg tikmũ'ũn kopah, tu 'ā tikmũ'ũn popmāhā', pu 'ũgkopa kuxa mām, ha 'āte tu 'āyũmmũgāhā', yā yōgnũ tikmũ'ũn, ha xate 'ā' popmāhā nō'ōm, ha nōm te 'ōg hām'āktux 'āpak, tu' yĩpkox pip,



<sup>7</sup> tu nōm te' yūmmūg xate 'ā' popmāhā hām'ākux xohix, tuk ka'ogā punethok.

<sup>8</sup> Xate 'ā' popmāhā hām'āktux, ha 'āte tikmū'ūn pu nōm 'āktux, tu' yūmmūg xe'e', 'ātuk nūn, tu' kuxa mām xate nūgkutnāhā'.

<sup>9</sup> —'Āte yāy yōg kuxa mām xop 'āktux. 'A 'āte puknōg xop 'āktux'ah. Pa 'āte yāy yōg xop 'āktux xate 'ā nōm popmāhā', yā 'ōg kuxa mām ka'ok xop kamaḥ.

<sup>10</sup> 'Ūxohix xexka yōgnū tikmū'ūn xix 'ōgnū kamaḥ, ha tikmū'ūn xohix xexka 'ōgnū xix yōgnū kamaḥ, ha tikmū'ūn te' pēnāhā', tu' yūmmūg 'āte hāpxopmā xe'ēgnāg.

<sup>11</sup> Hāpxip kutōgnāg 'īhā 'ā hak mōg putup, tu 'ap 'ūkxip putup'ah hām xexka tu'. Pa yōgnū xop te' kuxa mām hok xop mūtik yāy kotīnnāp-tup. 'Āpu yōg xop hā 'ātehet. 'Āpu nōm pēnā max, 'āka'ok hah. Yā 'āka'ok, ha xatek ka'ogāhā hā kaxīy. 'Āpu nōm pēnā max, pu' xohix tu' kuxap-xet, yā yūmmūg putuk.

<sup>12</sup> 'Ūkxip yōg xop mūtik, tu nōm hāg teheh, tu' pēnā max. Xatek ka'ogāhā', hā kaxīy 'āte nōm hāk teheh, tu nōm xaxok 'ohnāg, yā' kuxa mām kux putup'ah, pa yā tik puxet xaxok. Yā hōmā 'ūhittap Topa yōg tappet te: "'Ūxaxogāp-tup yāp-xet". Kaxīy. Hā kaxīy 'āte' xaxok tik puxet.

<sup>13</sup> Hōnhā 'ā hak mōg putup. Tak, 'āte 'āmūtik hām'āktux hōnhā, puyīy' kuxa mām xop kuxa hit-tup xexka' ūgkuxa hittup putuk.

<sup>14</sup> 'Āte yāy yōg xop pu 'ōg hām'āktux hōm, ha' kuxa mām hok xop te' kuxa mām xop putup nōg. 'A' kuxa mām hok xop'ah nō'ōm, yāg mūn putuk. 'A' kuxa

măm hok xop yōg'ah 'ūgmūn.

<sup>15</sup> 'A 'āte xa tuk kax'ah, xayīy yāy yōg xop mōy 'ūkuxa măm hok xop kopah. 'Ămhok, 'ūmōy hok. Pa 'āte xa tuk kax, xayīy nōm pēnā max, puyīy Hāmğâyāgnāg nōm pop hok.

<sup>16</sup> 'Ūgmūn 'a' kuxa măm hok xop yōg'ah. Hā kaxīy nōm xop 'a' kuxa măm hok xop yōg'ah kamah.

<sup>17</sup> 'Āte hāpxe'e 'āktux, ha tikmū'ūn te' xupak, tu' yīpkox pip, tu' mīy, tu' āputuk. 'Ātep-tup nō'ōm.

<sup>18</sup> 'Āte yāy yōg xop mō'pok hāpxexka xohix tu. Xate nūgkutnāhā hām xexka tu', yā yāy putuk.

<sup>19</sup> 'Āte xa yāy mūn hōm, nūy mīy xate nōm putup, puyīy nōm xa yāy mūn popmā', nūy mīy xate nōm putup.

<sup>20</sup> —'Āte yāy yōg xop 'āktux 'āmūtik. Nōm te hām'āpak max'ax 'āktux putup, ha ta' nōy xop kuxa măm putup 'ūgkopah, ha 'āte nōy xop 'āktux 'āmūtik kamah.

<sup>21</sup> Tak, 'āte xa tuk kax, puyīy nōm xop xohix tu kuxap-xet, nūy yāy putuppax yā yūmmūg putuk. 'Āxip 'ūgmūtik, hak xip 'āmūtik. 'Ātep-tup, puyīy nōm xop tu kuxap-xet, nūy yāy putuppax, puyīy hām xexka yōg tikmū'ūn yūmmūg xate nūgkutnāhā'.

<sup>22</sup> Xatek mīy 'ūkxexka', tuk max xe'ēgnāg mīy. Hā kaxīy 'āte yāy yōg xop max xe'ēgnāg mīy, puyīy tu kuxap-xet, nūy yāy putuppax yūmmūg putuk.

<sup>23</sup> 'Ūkxip nūmūtik, ha 'āxip 'ūgmūtik, puyīy nōm xop tu kuxap-xehnāg, puyīy hām xexka yōg tikmū'ūn yūmmūg xate nūgkutnāhā puyīy hām xexka yōg tikmū'ūn yūmmūg xate mōg mūn yāy xe'ēgnāg.

24 Tak, xate 'ã nõm tikmũ'ũn popmãhã', ha 'ãteputup, puyĩy nõm nox pi' 'ãmũtik 'ũkxip'ax tu', puyĩy' pẽnã 'ũkxekah, tuk max xe'ëgnãg. Yã xatek mĩy 'ũkxekah, tuk max xe'ëgnãg mĩy. Hamũn, hõmã 'ũhittap hãm xexka 'ap xip'ah, ha xate mõg mũn yãy xe'ëgnãg.

25 Tak, xate hãpxopmã yok. 'Ũkuxa mãm hok xop te 'ãyũmmũg 'ohnãg, ha ta 'ãte 'ãyũmmũg, ha yãy yõg xop te' yũmmũg xate nũgkutnãhã'.

26 'Ãte nõm pu 'ãmũn yũmmũgãhã', tu xe nõm xop pu xe 'ãmũn yũmmũgãp-tup punethok, puyĩy' nõy putuppax xatek putuppax putuk. 'Ãte xe tu 'ãmũn yũmmũgãp-tup punenthok, nũy noxk xip nũmũtik. Kaxĩy.

## 18

### *'Ũgãy xop te Yeyox mũg*

1 Yeyox te Topa pu hãm'ãktux kux, tu ta' mõg yãy yõg tik te 12 xop mũtik, tu mõktu kõnãg kox Xet xak, ha ta' xip mĩm mãtiknãg max, ha Yeyox te nõ' mõxakux yãy yõg tik xop mũtik.

2 Pa Yot te mĩm mũtiknãg yũmmũg. Tute' gãy xop mõgãp-tup Yeyox hah, puyĩy Yeyox xũygã'. Yã mĩm mũtiknãg yũmmũg. Yã Yeyox xix yãy yõg tik xop te yãy tu nũ'nã punethok 'õnteh.

3 Ha ta' nũn Yot xonat xop mũtik xix Topa pet xexka yõg xonat xop mũtik. Yã 'ãmãnex xexka xop te nũ'pok Topa pet xexka yõg xonat xop xix Paniye xop te, ha mĩkaxxakka taha' xix mĩm topnãg pop xix kuyãnãm tat'ax tat.

4 Ha Yeyox te hãmyũmmũg hãpxopmã'ax xohix, hu ta' nõy ha' mõg, tu:

—Tep mūn xak? Kaxīy.

<sup>5</sup> Ha nōm te:

—Yā Yeyox mūn xak kōmēn Nāyane yōg Yeyox.  
Kaxīy.

Ha Yeyox te:

—Yāg mūn. Kaxīy.

Yā' xip Yot 'ūgāy xop mūtik.

<sup>6</sup> Ha Yeyox te:

—Yāg mūn. Kaxīy.

Ha nōm xop te' xām hā' mōg, tu hām tu' xakux.

<sup>7</sup> Ha Yeyox te xe:

—Tep mūn xak? Kaxīy.

Ha nōm te:

<sup>8</sup> —Yā Yeyox xak kōmēn Nāyane yōg. Kaxīy.

<sup>9</sup> Yā hōmā Yeyox te Topa pu hām'āktux hu: “Tak, xate 'ā' popmāhā nōm xop, ha 'āte' xaxok 'ohnāg”.  
Kaxīy. Yā nōmhā putuk hāpxopmā'ax.

<sup>10</sup> Ha' xip Xīmām Pet, tu' xut yāy yōg mīkaxxexka', tu' xak 'āmānex xexka yōg kāmānat yīpkox. Yā kāmānat 'ūxuxet'ax Mā'ok.

<sup>11</sup> Ha Yeyox te Pet pu hām'āktux, hu:

—Āpu mō'tat 'ōg mīkaxxexka 'ūxax hā. 'Ok xate hāmpē'āpaxex 'āte xūy hā tot putup'ah? Yā yōgnū 'ātak te 'ā xūy hōm putup. Kaxīy.

### *Yeyox te Ānān ha' mōg*

<sup>12</sup> Hāpxip 'īhā xonat xop te Yeyox mūg xix xonat xop yōg kapitām te' xix Topa pet xexka yōg xonat xop te', tu Yeyox kīy,

<sup>13</sup> tu ta' mōgāhā 'Ānān hah. 'Ānān yā Kaxpax xuxyā, ha Kaxpax te 'āmānex xop xat nōm hāmyāxatamuk hā.

14 Hōmā Kaxpax te Yoneo xop pu' xuktux 'ūmax, pu tik puxet te tikmū'ūn xohix xexka pupi' xok.

*Pet te hām'āktux Yeyox yūmmūg 'ohnāg*

15 Ha Xīmām Pet te Yeyox pe' mōg, ha ta' nōy te' pe' mōg, yā' nōy xip Yeyox yōg tik xop kopah, yā tik te 'āmānex xop xat hā xape' hu mō'nāhā tik te 'āmānex xop xat pet yōg hāmnuhnōg hā, yā Yeyox mūti' mōxaha',

16 ha ta' nox xip Pet hāptopa hāmpak'ax yīkox tu', tu 'ūn mūtik hām'āktux nōm te' yīkox pēnāhā', tu Pet nūnnāhā 'ūkopah,

17 ha 'ūn te Pet pu hām'āktux, hu:

—'Ok 'āxip Yeyox yōg tik xop kopah? Kaxīy.

Ha Pet te:

—'Āmhok. 'Ak mūn'ah. Kaxīy.

18 'Ūxapxūy, yī' kuhu' xonat te', xix mīptut pēnā'ax xop te' xix mīptut yōg hāmnuhnōg pēnā'ax xop te', tu kuxap xakot, tu nō xapuk. Ha Pet te kama nūmūtik xip, tu' xapuk.

*Yeyox mōg tik te 'āmānex xop xat hah*

19 Ha ta tik te 'āmānex xop xat te Yeyox yīkopit, hu:

—Texīy 'ōg tik xop. Xate putep mūn yūmmūgāhā'? Kaxīy.

20 Ha Yeyox te:

—Hōmā 'āte hām'āktux punethok tikmū'ūn xop kopah, ha' xohix te' xupak. 'Āte Yoneo yōg Topa pet kopa hām'āktux Yoneo xohix pu', ha' xohix te' xupak. 'Āte hām'āktux xaptop 'ohnāg.

21 Hamūn, teptu xatek yīkopit? 'Āpu' xupak xop yīkopit. Nōm te yōg hām'āktux 'āpak, hu hāmyūmmūg. Kaxīy.

<sup>22</sup> Yeyox te hām'āktux, ha xonat xip, yā nōm te mīptut pēnāhā' xix mīptut yōg hāmnuhnōg pēnāhā', tu' yīm hā Yeyox kix, tu:

—Texīy xate hām'āktux kummuk tik te 'āmānex xop xat pu'? Kaxīy.

<sup>23</sup> Ha Yeyox te:

—Paxpu hām'āktux kummuk, puxix' max, xa xuktux yā hām'āktux kummuk. Pa 'āte hām'āktux max. Teptu xatek kix? Kaxīy.

<sup>24</sup> Yīy ta mō Yeyox kutnāhā 'Ānān te', yīy ta' mōg Yeyox, tu pipkup māxap hā' kīy, ha' mōg, tu mōktu Kaxpax ha' xupep. Yā Kaxpax te 'āmānex xop xat.

*Pet te xe' xuktux Yeyox yōg tik'ah*

<sup>25</sup> Ha ta' nox xip tu kuxap hā xapuk, ha nōm te:

—'Ok 'āxip Yeyox yōg tik te 12 xop kopah? Kaxīy.

Ha Pet te:

—'Āmhok, 'ak mūn'ah. Kaxīy.

<sup>26</sup> Ha ta' xip tik te 'āmānex xop xat yōg kāmānat, yā hōmā Pet te' nōm yōg xape yīpkox xak. Kāmānat te:

—'Ōk 'āte 'āpēnāhā Yeyox mūtik mīptut yōg hāmnuhnōg kopah? Kaxīy.

<sup>27</sup> Ha Pet te:

—'Āmhok! Kaxīy.

Ha hāpxip 'ohnāg 'īhā xokakkak pit xataha'.

*Yeyox mōg Pinat hah*

<sup>28</sup> Māyōn kutōgnāg ha ta' mōg Yeyox gohenanok pet tu'. Pa Yoneo xop mōxa 'ohnāg. Yā Yoneo xop yōg xat'ax te' tux hok, pu tu mōxa hok Hōm xop pet kopah, 'īhā 'āmuk xexka mīy, yā 'āmuk xexka 'ūxuxet'ax Nōā'yēn.

29 Ha ta' mōg Pinat mīptut kūnāpah, nūy Yoneo xop mūtik hām'āktux, tu:

—Texīy hu' nūnnā'? Putep kummuk mīy? Kaxīy.

30 Ha Yoneo xop te:

—Hāpkummuk mīy 'ohnāg, kopxi' nūnnā 'ohnāg 'ā hah. Kaxīy.

31 Ha Pinat te:

—'Ūpip 'āxop yōg xat'ax, yā nōm kax'āmi tappet tu'. 'Āpu 'ūyōg hāpxopmā'ax kopit. Kaxīy.

Ha Yoneo xop te:

—'Āmhok, 'āpu 'ūkopit. 'Ūgmū yōg xat'ax te' xat 'ohnāg tikmū'ūn putex. Kaxīy.

32 Hamūn. Hōmā Yeyox te hām'āktux mīpkupnix yīmū' xok putup. Yā Hōm xop te tikmū'ūn kix mīpkupnix yīmū', pa Yoneo xop te tikmū'ūn kix 'ohnāg mīpkupnix yīmū'. Yā Yeyox te hām'āktux xe'e'.

33 Ha Pinat te putpu mō'nāhā mīptut hā, tu Yeyox pu hām'āktux hu:

—'Ōk xate Yoneo xop xat? Kaxīy.

34 Ha Yeyox te:

—'Ok yā 'āp-xet te hāmpē'āpaxex, huk yīkopit, pe' nōy te xa' xak, yīy xatek yīkopit? Kaxīy.

35 Ha Pinat te:

—'Ok hāmpē'āpaxex Yoneo xop kopak xip? 'Āmhok. 'Āxape xop te 'ānūnnāhā nūnteh. Putep kummuk mīy xate'? Kaxīy.

36 Ha Yeyox te:

—'Ūkxexkah, tu yāy yōg xop xat. Pa 'āte hām xexka yōg xexka xop putuk'ah. Hā kaxīy 'āte xat'ah. Paxpu hām xexka yōg xexka xop putuk, puxix yōg xop yāykix 'ūgāy xop mūtik, puyī' nōy 'ūgmōgā hok

Yoneo xop hah. Pa 'ãmhok. 'Ãte hãm xexka yõg xexka xop putuk'ah. Kaxĩy.

<sup>37</sup> Ha Pinat te:

—'Ok 'ãmũn xexka'? Kãxĩy.

Ha Yeyox te:

—Hamũn, xate nõm 'ãktux 'ũkxexka'. 'Ûgnũn hãm xexka tu', tuk nãhã', nũy hãpxe'e 'ãktux, yã hãpxe'ëgnãg. Hãmyoa'ax yõg tikmũ'ũn te yõgnũ hãm'ãktux 'ãpak, tu' yĩpkox pip. Kaxĩy.

<sup>38</sup> Ha Pinat te:

—Pute 'ũm hãmyok? Yã' xip'ah hãmyok. Pute 'ũm hãpxe'e? Yã' xip'ah hãpxe'e'. Kaxĩy.

### *Yoneo xop tep-tup nõg Yeyox*

Tu ta' mõg hãptopa Pinat, nũy Yoneo xop pu hãm'ãktux, hu:

—'Ap kummuk'ah tihik.

<sup>39</sup> Pa 'õg hãpxopmã'ax te kaxĩy. Yã hãmyãxatamuk xohix 'ĩhã' mĩy 'ãmuk xexka 'ũxuxet'ax Nõã'yën, 'ĩhã 'ãte kanet ka'ok kopa' xut tik puxet, pu mõg. Pi'yã 'ãxop tep-tup? 'Ok mõg putup nõm te Yoneo xop xat? Kaxĩy.

<sup>40</sup> Ha Yoneo xop te hãm'ãktux ka'ok, hu:

—'Ãmnok, 'a' mõg putup'ah. 'Ãpu Mahamax xut, pu mõg. Kaxĩy.

Yã' xupxet Mahamax.

## 19

<sup>1</sup> Ha Pinat te' xat ha xonat te Yeyox kix xikot hã.

<sup>2</sup> Ha xonat xop te' mĩy 'ũkuxxax, yã mĩmyãm tox mãg hã' mĩy, tu mõktu Yeyox putox yĩmũ' xix, puyĩy xexka xop putuk, tu Yeyox pu mõ' xax tat topixxax 'ãta', puyĩy xexka xop putuk.

<sup>3</sup> Tu' nũn xonat, tu hãpkute'ex, hu:



—'Āmax. Xate Yoneo xop xat. Kaxīy.

Tu' yīm hā Yeyox kix.

<sup>4</sup> Ha ta' mōg hāptopa 'ūxeheh Pinat, tu Yoneo xop pu hām'āktux, hu:

—'Ūxupax. 'Āte tik yōg hāpkummuk mīy'ax xak, pa' pipi 'ohnāg. 'A' kummuk'ah tihik. 'Āte nōm hā' nūnnāp-tup, xayīy yūmmūg 'āte yōg hāpkummuk mīy'ax pipi 'ohnāg, ti xūygāp-tup'ah. Kaxīy.

<sup>5</sup> Ha ta' mōg Yeyox hāptopah, hap-tox yīmū' yūm 'ūkuxxax, yā mīmyām tox māg hā' mīy, ha mō'tat topixxax 'āta'. Ha Pinat te:

—'Ūpēnā' tihik! Kaxīy.

<sup>6</sup> Ha 'āmānex xexka xop te hām'āktux ka'ok xix Yoneo xexka xop te', hu:

—'Āpu mīpkupnix yīmūp-tex pipkup hā, 'āpu mīpkupnix yīmūp-tex pipkup hā. Kaxīy.

Ha Pinat te' xat, hu:

—'Āpu 'ūmōgā, nūy mīpkupnix yīmūp-tex pipkup hā. 'Āte Yeyox yōg hāpkummuk mīy'ax pipi 'ohnāg, hu' xūygāp-tup'ah. Kaxīy.

<sup>7</sup> Pa Yoneo xop te hām'āktux yānān, hu:

—'Ūkax'āmi 'ūgmū yōg xat'ax, tu nōm te' xat, pup-tex. Hamūn, tute hām'āktux, "Ūgmūn yā Topak-tok". Kaxīy.

<sup>8</sup> Ha Pinat te' xupak, tu' kuxa nōg nōy nā' mōg.

<sup>9</sup> Tu xe mīptut hā mō'nāhā', tu Yeyox pu hām'āktux, hu:

—Hām 'ūm tu 'ānūn? Kaxīy.

Pa Yeyox te hām'āktux 'ohnāg.

<sup>10</sup> Ha Pinat te:

—'Ok hām'āktux 'ohnāg? 'Ok xate' yūmmūg, 'āte' xat, xa mōg, pa' xat hok, xa mōg hok. 'Āte' xat, puxix xonat 'āp-tex mīpkupnix yīmū'. Kaxīy.

11 Ha Yeyox te:

—Topa te' xat, xa' xat, pa' xat hok, xa' xat 'ohnāg. Xate hāpkummuk mīy, pa' nōy te hāpkummuk xexka mīy, nōm te 'āhak mōgāhā'. Kaxīy.

12 Ha Pinat te' xupak, hup-tup, nūy Yeyox xat pu mōg. Pa Yoneo xop te hām'āktux ka'ok, hu:

—Paxpu Yeyox xat, pu mōg, hu ta Hōm xop xape 'ohnāg 'āmūn. Hōm xop tep-tup nōg nōm te yāy xexka mīy. Kaxīy.

13 Ha Pinat te' xupak, tu ta xe mō'nāhā mīptut hā, tu ta Yeyox mōgāhā hāptopah, tu pa te hāmyūmmūg xop yōg mīmpe yīmū' yūm hām tu 'ūxuxet'ax Mīkax Pet Xax. Yā 'āxet'ax nōy yā Gabatah, yā Yoneo xop yīy'ax kopah.

14 Māyōn te yāykote' yūm'ax. Hāpxip 'īhā 'āmuk xexka mīy'ax, yā 'āmuk xexka 'āxet'ax Nōā'yēn. Ha Pinat te Yoneo xop pu hām'āktux, hu:

—'Ūxip nūnte 'ohnū xexka'. Kaxīy.

15 Pa Yoneo xop te:

—'Āpu 'ūp-tex, 'āpu 'ūp-tex, 'āpu 'ūp-tex mīpkupnix yīmū'! Kaxīy.

Ha Pinet te:

—'Ok 'ātep-tex'ax mīpkupnix yīmū tik te 'āxop xat? Kaxīy.

Ha 'āmānex xexka xop te:

—Yā Hōm xop yōg xexkap-xehnāg tek mūg xat. Puxix. Kaxīy.

16 Ha Pinat te xonat xop pu Yeyox hōm, pup-tex mīpkupnix yīmū pipkup hã. Ha xonat xop te Yeyox pēnãhã'.

*Yeyox putex mīpkupnix yīmū'*

17 Ha ta' mōg Yeyox, tu mīpkupnix taha', tu' mōg, tu mōktu' xupep hãm tu, yã hãhãm 'ūxuxet'ax putox kup, yã Yonet xop yãy yīy'ax tu Gok.

18 Ha xonat te pipkup hã' xuhnīy Yeyox mīpkupnix tu', ha' xup. Ha xonat te pipkup hã' xuhmīy kama tik tix nōy mīpkupnix nōy tu', hak-tetex tik tix, yãp-xet xup Yeyox yīpxax tu' xi' nōy xup Yeyox yīpxe'e tu', ha Yeyox xup yãykote'.

19 Ha Pinat te' kax'ãmi', tu' xat, pu nōm xix Yeyox yōg mīpkupnix xox putox tu'. 'Ūkax'ãmi, hu: “Kōmēn Nāyane yōg Yeyox. Tute Yoneo xop xat”. Kaxīy.

20 Ha Yoneo punethok te nō mōkupix. Hãmhūmnãg yūm kōmēn, tu yōg tikmū'ūn te' yīy'ax tikoyuk hã hãm'ãktux, yīy ta Pinat te nōm kax'ãmi 'ūyīy'ax tikoyuk hã', yã Yoneo xop yōg yīy'ax hã xix Hōm xop yōg yīy'ax hã xix Genex xop yōg yīy'ax hã.

21 Pa 'ãmānex xexka xop te Pinat pu hãm'ãktux, hu:

—'Ūkax'ãmi hok, hu: “Tute Yoneo xop xat”. Kaxīy. 'Āpu 'ūkax'ãmi, hu: “Tik te hãm'ãktux hu: “Āte Yoneo xop xat'”. Kaxīy.

22 Ha Pinat te:

—Puxix. 'Āte xe kax'ãmip-tup'ah. Kaxīy.

23 Yã xonat te pipkup hã' xuhmīy Yeyox, tu Yeyox yōg topixxax mōy, tu mō topixxax koxip, tu mōktu topixxax xop te' 4 mīy xonat te' 4 pu'. Nōm te' paha Yeyox yōg kayak, yã 'ūyōg xap'ax xip'ah.

24 Ha xonat xop te yăy mŭtik hăm'ăktux, hu: 'Ăpu yŭmŭ kayak koxip hok. 'Ăpu yŭmŭ mŭ xap yŏn, puyŭy xonat puxet pa'. Yă hŏmă 'ŭhittap 'ŭkax'ămi Topa yŏg tappet tu', hu: "Nŏm te mŭ'koxip yŏgnŭ topixxax, tu mŭ xap yŏn, nŭy yŏg kayak pa". Kaxŭy. Hamŭn, 'ŭkax'ămi xe'e'. Hă kaxŭy, yŭy ta xonat te' mŭy.

25 Ha ta' xip Yeyox yŏg mŭpkupnix yŭkăgnăg hă Yeyox mŭktut xix Yeyox mŭktut tutnŏy, yă Mănix, yă Konop xetut, ha Mănix Mănanĕn xip kamah.

26 Ha Yeyox te' pĕnăhă yăy tut xix tik te Yeyox yŏg tik te 12 xop kopa' xip, yă Yeyox te mŭ nŏm yăy xe'ĕgnăg.

Yeyox te:

—Măy, nŏ'ŏm 'ăk-tok pit. Kaxŭy.

27 Tu xe hăm'ăktux 'ŭnŏy pu', nŏm te Yeyox yŏg tik te 12 xop kopa' xip, hu:

—Nŏ'ŏm 'ătut. Kaxŭy.

Ha tik te 'ŭn mŏgăhă yăy pet hah.

### *Yeyox xok*

28 Ha Yeyox te' yŭmmŭg 'ŭhăm kux, tu hăm'ăktux, hu:

—Kŏnăg putup tek putex. Kaxŭy.

Yă Topa yŏg tappet yŏg hăm'ăktux putuk. Hŏmă 'ŭhittap nŏm te' kax'ămi Topa yŏg tappet tu'.

29 Ha ta' xip naxtox, ha kopa' xup xupyăg kum-muk, ha 'ŏm te tok hă hep tit, tu nŏm mŭm hă' xuhmŭy, tu' xix Yeyox yŭkox xax tu'.

30 Ha Yeyox te xo'op, tu:

—'Ŭkhăm kux. Kaxŭy.

Tup-tox put xok, tu' xok, ha ta' mŏg 'ŭkoxuk.

### *Xonat te Yeyox xuhmŭy*

31 Ta Yoneo xop te Pinat pu' xak. 'Ūp-tup, puyīy xonat xop xakix xop kup kūnākohoh. 'Ūp-tup kamah, puyīy mīpkupnix tu' mōy 'ūxakix xop. Yā xexta pet, ha nōm tep-tup nōg 'ūxakix xop kutetex pepix mīpkupnix yīmū nit xap hā. Nit xap yā Yoneo xop yōg 'āmnīy tuknōg, yā hām hok, ha nōm nit xap xexkah.

32 Ha ta' mōg xonat xop, tu tik puxet kup xa'ah, tu tik nōy kup xa'ah nōm xakix Yeyox mūtik.

33 Xonat nūn Yeyox hah, tu' pēnāhā' 'ūxok tāmnāg, yīy' kup xa'a 'ohnāg.

34 Xonat puxet te Yeyox puka xuhmīy pox xexka hā, tu hāpxip 'ohnāg 'ihā' xupep hep 'āta xix kōnā'āg.

35 Tak mūn Yoām. 'Āte hāpxop xohix pēnāhā', tu nōm kax'āmi, xayīy 'ākuxa mām Yeyox kopah. 'Āte' yūmmūg, yā hām'āktux xe'e'. 'Ap koit'ah.

36 Yā xonat te Yeyox kup xa'a 'ohnāg. Yā Topa yōg tappet te hām'āktux putuk. Yā Topa yōg tappet te: “Ūkup xa'ap-tup hok”. Kaxīy.

37 Yā Topa yōg tappet hām'āktux nōy putuk. Yā Topa yōg tappet te: “Nōm te' pēnāp-tup, yā 'ūxuhmīy pox xexka hā”. Kaxīy.

### *Yeyox hāpkot*

38 Hōmā kōmēn 'Animātex yōg Yoye te Yeyox pe' mōg. Pa Yeyox pe' mōg yāy xaptop, yā Yoneo xexka xop yīpkutuk. Ta' mōg Yoye', tu mōktu Pinat tu' kax Yeyox yīn, ha Pinat te:

—Mōy pa'. Kaxīy.

Yīy ta' mōg Yoye', tu' paha Yeyox yīn, tu' mōgāhā'.

39 Hōmā ha ta' mōg Nīkonēm 'āmnīy 'ihā', tu Yeyox mūtik hām'āktux. Tu ta' mōg Nīkonēm, yā Yoye

mũtik mōg. Nĩkonēm te' mōgāhā mĩm kōnyōn hax max, yā' xohix te' 45 kit, yā' xuxet'ax 'anoex xix mĩha'.

<sup>40</sup> Ta nōm tik tix te Yeyox yĩn kĩy topixxax tox hā, tu kopa' mām mĩm kōnyōn hax max. Hā kǎxĩy Yoneo xop te' mĩy, nũy yĩn hāpkot.

<sup>41</sup> Ha ta' yũm xukpot max hām tu Yeyox putex yĩkǎgnāg, ha xukpot tu' yũm mĩkaxxap kox, yā mĩkaxxap kox tũmnāg.

<sup>42</sup> Hāptup yā Yoneo xop yōg 'āmniy hām hok, yā nit xap, ha Yeyox yĩn yũm mĩkaxxap kox kopah. Yā hām hũmnāg mĩkaxxap kox.

## 20

### *Mĩkaxxap kox kox*

<sup>1</sup> Ye nomĩy hāptup'ax, yā hāpkoxtap ha ta' mōg Mānix Mānanēn, tu mōktu' xupep mĩkaxxap kox tu', tu' pēnāhā', pap xip hok mĩkaxxap xexka hāmmō'yĩnnĩn mĩkaxxap yĩkox tu'. Putep-te' xut?

<sup>2</sup> Ta' mōg mō'ka'ok, tu Xīmām Pet mũtik hām'āktux, xix' nōy mũtik hām'āktux, yā nōm xip Yeyox yōg tik xop kopah, yā Yeyox te mō nōm yāy xe'ēgnāg. Manix Mānanēn te:

–Tikmũ'ũn te' xut Yeyox yĩn mĩkaxxap kox kopah, hak mũ'āte' yũmmũg'ah hām 'ũm tu' yũm 'ũyĩn. Kaxĩy.

<sup>3</sup> Ha ta' mōg Pet xi' nōy mĩkaxxap kox hah.

<sup>4</sup> Ũmōg mō'ka'ok 'ūtix, pa' nōy mōg mō'ka'ok xe'e', tu mōktu' xupep hāmāxap,

<sup>5</sup> tu' mō' pa yũm, hu mĩkaxxap kox hā mō' pa yũm, tu' pēnāhā topixxax tox, pa mō'nā 'ohnāg.

<sup>6</sup> Hāpxip kutōgnāg 'ihā' xupep Xīmām Pet, tu mō'nāhā mīkaxxap kox hā, tu' pēnāhā topixxax yūm.

<sup>7</sup> Ha' xip topixxax tox nōy nōm te Yeyox putox kīy, yā' kīy, tu yāp-xehnāg tu' xip, yā topixxax nōy mūtik xip'ah.

<sup>8</sup> Ha nōm te mīkaxxap kox hā' xupep hāmāxap, tu mō'nāhā', tu' pēnāhā', tu' kuxa yūm.

<sup>9</sup> Pa nōm xop te' yūmmūg xe'e 'ohnāg. Yā Topa yōg tappet te: “Ūputpu' hi'ax”. Kaxīy.

<sup>10</sup> Tu ta' mōg putpu' Yeyox yōg tik xop yāy pet hah.

*Yeyox te Mānix Mānanēn pu' yāy mūg*

<sup>11</sup> Ha ta' xip Mānix mīkaxxap kox yīkak hāptopah, tu potaha', tu mō' pa yūm, tu kopa' pēnāhā'.

<sup>12</sup> Pa' pip pekkox yōg nū'pok xop yōg tik tix, tu topixxax ponnok mō'tat, tu' mām Yeyox yīn xip'ax tu', yā yāp-xet xip Yeyox pata xip'ax tu', ha' nōy xip Yeyox putox xip'ax tu',

<sup>13</sup> tu:

—Yāhāg, teptu 'āpotaha'? Kaxīy.

Ha:

Tikmū'ūn te' mōgāhā 'ūkxuxyā'. 'A 'āte' yūmmūg'ah hām 'ūm tu' yūm. Kaxīy.

<sup>14</sup> Tute hām'āktux, tu yōkānām, tu Yeyox pēnāhā, pa Yeyox yūmmūg 'ohnāg.

<sup>15</sup> Ha Yeyox te:

—Yāhāg, teptu 'āpotaha'? Tep mūn xak? Kaxīy.

Yā 'ūn te hāmpe'paxex yā tihik nōm te xukpot pēnāhā', tu:

—'Ok xate nōm mōgāhā'? 'Āpu 'ā' xuktux. Pi'yā yūm, hak mōg putup, nūy pa'. Kaxīy.

16 Ha Yeyox te:

—Mānix! Kaxīy.

Ha Mānix te hã' yōkanām, tu hām'āktux Yoneo xop yāy yīy'ax hã, hu:

—Hamōn! Kaxīy.

Yã tikmũ'ũn yīy'ax hã, “Yãyã”. Kaxīy.

17 Ha Yeyox te:

—'Āpu 'ũgmũg hok. Yãg mōg putup putpu' yōgnũ 'ātak hah. 'Āpu mōg 'ũkxape xop hah, nũy hām'āktux 'ũgmōg yāy yōg 'ātak hah, yã 'ōgnũ, yã yōgnũ Topa, yã 'ōgnũ. Kaxīy.

18 Ha ta' mōg Mānix Mānanēn Yeyox yōg tik xop hah, tu mōktu hām'āktux, yã yãyã Yeyox pēnāhã', tu Yeyox yōg hām'āktux 'āktux.

*Yeyox te yāy yōg tik xop pu yāy mũg*

19 Ye nomīy yōg 'āmāxak, ha ta' yāy tu nũ'nāhã Yeyox yōg tik xop, tu mōhāmyīnnīn pipkup hã, yã Yoneo xexka yīpkutuk. Ha ta' nũn Yeyox, tu nũktu' xip yāy yōg xop kopah, tu:

—'Ākuxa nōg hok. Kaxīy.

20 Yã tute hām'āktux, tu nōm pu yāy yīm mũg xix yāy puka mũg, yã kayax mũg, ha nōm te yāy xuxyã pēnāhã', hu' hittup xexka'.

21 Ha Yeyox te:

—'Ākuxa nōg hok. Yōgnũ 'ātak te nũgkutnāhã'. Hã kaxīy 'āte 'āxop mō'pok kamah. Kaxīy.

22 Tute hām'āktux, tu' nōy yīmũ' xitxok, tu:

—'Āpu 'ūpa Topa Koxuk.

23 'Āxop te tikmũ'ũn yōg hāpkummuk mīy'ax xaxok, ha' kux, puxix Topa hāpkummuk mīy'ax xaxok, ha' kux kamah. Pa 'āxop te tikmũ'ũn yōg



hāpkummuk mīy'ax xaxok 'ohnāg, ha' kux 'ohnāg, puxix Topa hāpkummuk mīy'ax xaxok putup'ah, ha' kux 'ohnāg kamah. Kaxīy.

*Yeyox xix Tōmē'*

<sup>24</sup> Ha ta' xip Tōmē Yeyox yōg tik xop kopah, yā kama 'ūxuxet'ax kutonnix. 'Ap xip'ah 'īhā' xupep Yeyox.

<sup>25</sup> Ha Yeyox yōg tik xop te Tōmē pu hām'āktux hu:  
—'Ūgmū'āte yāy xuxyā pēnāhā'. Kaxīy.

Ha Tōmē te:

—'Āte' pēnā 'ohnāg 'ūyōg kayax 'ūyīm tu', pipkup te nōm xuhmīy, kopxix 'ūgkuxa yūm putup'ah. Tuk yīpkutok hā kayax 'āpit 'ohnāg, kopxix 'ūgkuxa yūm putup'ah, tuk yīm hā 'āpit 'ohnāg 'ūpuka', kopxix 'ūgkuxa yūm putup'ah. Kaxīy.

<sup>26</sup> Xēmān puxet nōg, 'īhā yāy tu nū'nāhā Yeyox yōg tik xop mīptut kopah, ha' xip Tōmē nūmūtik. Nōm te mōhāmnīnyīn pipkup hā, pa Yeyox nūn, tu nūktu nōm xop kopa' xip, tu:

—'Ākuxa nōg hok. Kaxīy.

<sup>27</sup> Tu Tōmē pu hām'āktux, hu:

—'Āpu 'āyīm xix nūnte. 'Āpu 'ūgyīm pēnā'. 'Āpu 'āyīm hāg 'āpit 'ūkpuka'. 'Āpu 'ākuxa yūm 'ohnāg kuxyā'. 'Āpu 'ākuxa yūm. Kaxīy.

<sup>28</sup> Ha Tōmē te: Yāyā, yōgnū Topah. Kaxīy.

<sup>29</sup> Ha Yeyox te:

—'Ok 'ākuxa yūm, xate hāmpēnāhā tu?' 'Ūhittup tikmū'ūn kuxa mām, pa' pēnā 'ohnāg. Kaxīy.

<sup>30</sup> Ta Yeyox te hāpxopmā ka'ok xe'ēgnāg nōy punethok, pa nōm kax'āmi 'ohnāg nū tappet tu'.

31 Pa hăpxopmă'ax kax'ămi, xayîy 'ăkuxa măm, yă Yeyox yă Kunnix, yă Topa te nŭ'kutnăhă'. Yă' kax'ămi, xayîy 'ăkuxa măm, yă Yeyox yă Topak-tok. 'Ăkuxa măm Yeyox kopah, nŭy ta hi xe'ëgnăg mőkuma' mōg, ha' kux 'ohnăg.

## 21

### *Yeyox te yăy yōg tik te 7 pu yăy mŭg*

<sup>1</sup> Ta Yeyox te yăy yōg tik xop pu yăy mŭg 'ŭxeheh konăg xexka Timenit yōg hăpkux tu'. Yă' yăy mŭg hă kaxîy.

<sup>2</sup> 'Ũpip Xīmăm Pet, xix Tōmē 'ŭxuxet'ax Kutonnix kamah, xix Nătănăyet, yă xiptuxexka Kănă yōg tihik hăpxexka Ganinet tu', xix Yemeneo kutok xop, xix tik tix nōy, yă Yeyox yōg tik xop kopa' pip.

<sup>3</sup> Ha Xīmăm Pet te' nōy pu hăm'ăktux, hu:

—'Ũgmōg, nŭy măm xuk. Kaxîy.

Ha xape xop te:

—'Ăpu yŭmŭ mōg. Kaxîy.

Tu ta' mōg ka'măm, tu mōktu mŭpkox tu' mōxaha', tu' mōxakux, tu ta' mōg kōnăg xexka tu', tu măm xuk 'ămnîy tox hă, pap xuk 'ohnăg.

<sup>4</sup> Măyōn xupep, 'Thă' xip Yeyox hăm kux tu', pa Yeyox yōg tik xop te' yŭmmŭg 'ohnăg, yă' xip Yeyox.

<sup>5</sup> Ha Yeyox te:

—'Ũkxape xop, 'ok măm 'ŭm xuk hok? Kaxîy.

Ha nōm te:

—'Ap xuk'ah. Kaxîy.

<sup>6</sup> Ha Yeyox te:

—'Ăpu mō măpxuk'ax yōn mŭpkox yōg yŭpxe'e hă' yŭm, tu 'ăxop te' pipip-tup. Kaxîy.

Ha nōm te' mīy, ha mām nū'xīmnāg 'ūxuk'ax hā, ha tik te mām xuk'ax mōy yūmmūg 'ohnāg.

<sup>7</sup> Ha' xip tihik, yā Yeyox yōg tik xop kopa' xip, yā Yeyox te mō nōm yāy xe'ēgnāg. Tute Pet pu hām'āktux, hu:

—Yā yūmūg xuxyā nō'ōm. Kaxīy.

Ha Xīmām Pet xaxtop, hu mō toppixxax tat, tu' pūn kōnāg kopah.

<sup>8</sup> Ha ta xape te yā' pip mīpkox kopah. Ha ta mīpkox xix hāpkux yōg mēn xohix te' 100. Ha ta' mōg, tu māpxuk'ax nūnnāhā kōnāg kopah, yā mām nū'xīmnāg.

<sup>9</sup> Tu' mōg, tu mōktu' mōxaha hāpkux tu', tu hāpkux tu' mōg, tu mōktu kuxap pēnāhā', tu mām pugā pēnāhā xix pām.

<sup>10</sup> Ha Yeyox te:

—Putnū' māhām 'āxop te' xuk. Kaxīy.

<sup>11</sup> Ha ta mō'nāhā Xīmām Pet mīpkox hā, tu māpxuk'ax yīkūy, tu' nūnnāhā', yā mām nū'xīmnāg mām xohix te' 153. 'Ūxohix māhām, pa māpxuk'ax yāy pot 'ohnāg.

<sup>12</sup> Ha Yeyox te:

—Mā, nūy 'āxit. Kaxīy.

Ha tik te' yīkopit 'ohnāg, hu:

—'Ū'ūm 'āmūn? Kaxīy.

Yā hā kaxīy yīkopit 'ohnāg, pa' yūmmūg, yā' xuxyā'.

<sup>13</sup> Yeyox te pām pop, tu tik pu' popmāhā', tu mām pop, tu tik pu' popmāhā'.

<sup>14</sup> Hāmūn, Yeyox te putpu' hi', tu yāy yōg tik xop pu yāy mūg tikoyuk.

*Yeyox xix Pet*

15 Ta' xit kux, ha Yeyox te Xīmām Pet pu hām'āktux, hu:

—'Ok xatek putuppax xexka, pa 'ōm putuppax kutōgnāg? Kaxīy.

Ha Pet te:

—Yāyā, hamūn, xate' yūmmūg, 'āte 'āp-tuppax. Kaxīy.

Ha Yeyox te:

—'Āpu tikmū'ūn pu yōg hām'āktux yūmmūgā', nūy nōm pēnā'ax putuk. Kaxīy.

16 Ha Yeyox te:

—Xīmām, yā Yoām Kutok, 'ok xatek putuppax? Kaxīy.

Ha:

—Yāyā, hamūn, xate' yūmmūg, 'āte 'āp-tuppax. Kaxīy.

Ha Yeyox te:

—'Āpu tikmū'ūn pēnā' kahnēn pēnā'ax putuk. Kaxīy.

17 Ha Yeyox te xe hām'āktux, hu:

Xīmām, yā Yoām kutok, 'ok xatek putuppax? Kaxīy.

Ha Pet kuxa hittup 'ohnāg, Yeyox te' yīkopit tikoyuk hah tu:

—Yāyā, xate' yūmmūg hāpxop xohix xexkah. Xate' yūmmūg, 'āte 'āp-tuppax. Kaxīy.

Ha Yeyox te:

—'Āpu tikmū'ūn pēnā', kahnēn pēnā'ax putuk.

18 'Āte xa hāpxe'e 'āktux. Hōmā 'ātuktup, tu yāy kūnāy hīy, nūy ta mōg, tu hāpkumep hām xohix tu' xatep-tup. Pa hāpxip 'īhā 'ākutut'ax, tu 'āyīm yoap-tup, ha' nōy te 'āyīm kīy putup, tu 'āmōgāp-tup hām tu xatep-tup'ah. Kaxīy.

19 Hã kaxĩy Yeyox te hãm'ãktux hã kaxĩy Pet putex putup, puyĩy tikmũ'ũn yũmmũg 'ũxexka Topah. Yeyox te Pet pu hãm'ãktux hu:

—'Ăpu 'ũkpe mōg. Kaxĩy.

*Yeyox te tik nõy 'ãktux*

20 Pa Pet te yōkãnãm, tu tik nõy pẽnãhã', yã Yeyox te mō nõm yã xe'ẽgnãg. Yã hõmã nõm xip Yeyox yĩkãgnãg, tu' yĩkopit, hu: “Yãyã, tep-te' gãy xop mōgãp-tup 'ã ha, puyĩy 'ãxũygã'?” Hã kaxĩy nõm te hãm'ãktux hõmã.

21 Ha Pet te nõm pẽnãhã', tu Yeyox pu hãm'ãktux, hu:

—Yãyã, xix 'õhõm tihik. Tikmũ'ũn te nõm pu putep mũn mĩy putup? Kaxĩy.

22 Ha Yeyox te:

—Paxpu 'ãtep-tup tik nox xhip nõnte, ha mōktuk nõn putpuk, ha ta xate' yũmmũg putup'ah. 'Ăpu 'ũkpe mōg! Kaxĩy.

23 Yĩy ta Yeyox mũtik mōg xop kopa hãm'ãktux punethok, yã hãm'ãktux tik xok putup'ah. Pa 'ãmhok. Yeyox 'ap xuktux'ah 'ũxok putup'ah. Pa Yeyox te: “Paxpu 'ãtep-tup tik nox xhip nõnteh, ha mōktuk nõn putpuk, ha ta xate' yũmmũg putup'ah”. Kaxĩy.

24 Nõ'õm tihik yãg mũn. 'Ăte hãpxop xohix xe'e 'ãktux, tu nõm kax'ãmi nõnteh. Yũmũ'ãte' yũmmũg 'ũxe'e nõ hãm'ãktux.

*'Ūkux*

25 Yeyox te hãpxopmã nõy punethok kamah. 'Ūkax'ãmi Yeyox yōg hãpxopmã'ax xohix xexka', puxix pip'ax tappet xohix xexkah. 'Ăte

hãmpēkḡaxēx hãm xēxka putuk'ah tappet xohix.  
Yã hãm xēxka kutõgnãg, pa nõm tappet xēxkah.  
Tu ta tu' kux.

**Topa Yōg Tappet**  
**New Testament in Maxakalí (BR:mbl:Maxakalí)**

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
a212b59e-62d7-5a38-9773-b0ce1d5b248b